

嘛。小事則獨裁決定。儼如立憲國之內閣總理。噶廈爲西藏政府之最高機關。儼如國務院。由噶倫四人組織而成。儼如內閣大臣。司倫爲之長。噶倫四職。藏方例定二俗二僧。總攬全藏立法行政司法等大權。秉承達賴喇嘛及司倫之命。以合議制行使之。噶倫二僧之職。應由達賴喇嘛指派。監理教政。倘遇重要教務。另由三大寺選派喇嘛公同決定。噶倫會議之主席爲司倫。噶倫之下設孜本。代本。商卓特巴。孝德巴等職。分掌行政各事。伊倉爲全藏民衆總代表之機關。等於秘書處。內設中譯慶莫。卽秘書長。凡各寺喇嘛上書達賴喇嘛者。均須經中譯慶莫之批閱。始能呈交達賴喇嘛。此外更有馬基。管理軍務。卽藏軍之總司令。不立司專司警務。札本專司郵政。及外交實業等機關。均受達賴喇嘛及司倫之指揮。達賴喇嘛圓寂後。藏中政權則由司倫噶倫負責。教務則由中譯慶莫處理。軍務則由馬基秉承司倫之命指揮。此時達賴喇嘛之佛印。暫由基巧堪布卽機要堪布保管。不能動用。俟下世達賴喇嘛轉世卽位。始能啟用。在不動用期間。由司倫噶倫等會同簽署。

後藏政教。分歸班禪額爾德尼管理。駐錫於札什倫布寺。卽西藏之副王。人民崇拜信仰。與達賴喇嘛無異。藏諺有云。天上的日月。人間的班達。於此可見民衆之心理矣。班禪額爾德尼之下。設札薩羅門罕。子轄。中譯青布。尼倉青布。雖本青布。民尼青布。巴本（印刷官）。如本。尼倉。洛雲。孝德巴。卓尼。甲本。納倉巴。分掌軍民財等職。

凡喇嘛首領。上至達賴喇嘛班禪額爾德尼。下迄各寺呼圖克圖等。未逝之前。自示轉生地址。或圓寂後用卦卜之。一面行文各路人民。聞其生子靈異者。各首事卽至其處訪謁。轉生甄別。概由寺中當家喇嘛數人評定。並以生前常用數物雜以同樣他物試之。若嬰兒指取不誤。卽迎入寺中卽位。傳授衣鉢。如達賴喇嘛班禪額爾德尼之轉世。關係重大。常於達賴喇嘛圓寂後三四年。班禪額爾德尼邀集司倫噶倫及色拉布賚絀噶勒丹三大寺之大喇嘛若干人。若爲班禪額爾德尼圓寂時。則由達賴喇嘛邀集之。至拉穆寺。求問呼畢勒罕降生何處。吹忠降神。龍單批令。共

同決定。依預定方向。尋覓達賴喇嘛或班禪額爾德尼呼畢勒罕轉世之地。其父母。其降生之年。其宅旁樹木之種類等項。於是按地步行。前往蹤跡。常得三四幼孩。其生時皆有異瑞。如生時虹見屋上。或其父母自感天兆。由神祝喇嘛決定採擇。孰爲眞達賴喇嘛之呼畢勒罕。但須認識其前世所用之瓔珞鈴鐸及他法器。且其身體相貌。必有數處與常人異。如一。腿上有類似虎皮之斑點。二。眉目頗長。其外端上灣。三。大耳。四。肩上有肉兩片。五。一掌中有海螺形印。將各尋獲幼孩之姓名。用漢滿藏合璧文。各寫一籤。納入大昭清高宗所頒發之金本巴瓶中。誦經禮佛。公同籤掣。夾取其一。昔時由駐藏大臣主籤。司抽籤職。被抽中者。卽爲眞正達賴喇嘛之呼畢勒罕。由駐藏大臣呈報中央。被迎至拉薩之布達拉宮。舉行呼畢勒罕典禮。舉典禮後。卽依班禪額爾德尼達賴喇嘛互爲師徒之例。拜班禪額爾德尼爲師。教授經典。由榮增師傅及副榮增師傅。撫抱之。看護之。並予以初期教育。更受小戒大戒。幼時達賴喇嘛之呼畢勒罕。雖爲西藏元首。而從博學之喇嘛學習經典時。常坐於較低之

座位。此時西藏之政教大權。由司倫代攝。經十八年。呼畢勒罕期滿。卽正式就教王位。啟用佛印。總攬大政。執行西藏元首之職權焉。

第二節 第一世達賴喇嘛

無上至尊宗喀巴佛之高足弟子根敦珠巴。卽後人稱謂第一世達賴喇嘛也。根敦珠巴。法語成就僧之意。西藏噶路孟珠伯人也。父格巴達里。母哲茅奈札。兄弟五人。大師居三。生於第七甲子之第五年辛未。卽明洪武二十四年。時至尊宗喀巴年已三十五矣。大師初生時。家爲盜劫。父母均被擄。縛大師於兩石間。羣鴉護之。其地農人。欲抱之去。卒以鴉護而未果。及父母返。見之驚曰。此子幼少。已有黑神維護。長則必能救濟衆生。爲黃教之祖矣。五歲。在喀達屯地方爲人牧羊。每日用白土在大石上寫六字真言。其父問曰。寫此何爲。大師答曰。我欲普濟世人之父母。故寫此咒以超度之。七歲喪父。爲作八百律部經以超度之。旋行化波噶頓。乞食於其地之寺院。衆僧爭相議論。以爲此少年得非喇嘛乎。一高僧見而讚曰。此人已得菩提道。

心。維護黃教。捨此誰依。遂止衆僧毋得喧譁忘言。大師在其處發願化緣。乞食道路。有路伯喜拉巴喇嘛者。係藥師佛化身。博通五明。覩見大師深器之。遂收爲徒。受在家戒。法名伯孟達奇。從薩仁伯拉習漢文。從札哲伯拉習藏蒙各文。從瓦堂習梵文。乙酉年三月二十一日。年十五。受小戒。法名根敦珠巴。旋加以薩婆之名。其時羅伯喜拉巴任堪布。欽鮑覽達任戒師。欲發願西行。庚寅年二十歲時。二月十二日。復在其地受大戒。受堪布灌頂禮。法師拉克伯喜拉伯。教之藥師佛經長壽佛經諸典籍。年二十五。稟堪布欲西行。晉謁至尊宗喀巴。及抵喀伯才噶。從哲蘇噶森喇嘛習簡密經。抵通波欽。從超里倫登喇嘛習波羅密經。旋赴拉喜達喀晉謁至尊宗喀巴。從學密乘典籍。至尊深器之。賞以裙。并授以戒律。遊歷噶勒丹森波諸寺。復從至尊宗喀巴及甲薩等輩。諦聽妙法。己亥年。至尊在布賚紉寺圓寂後。大師抵森波。在坦摩曼學殿傳法。夜夢釋尊現身於東方。頂發百寶月亮。落在大師體中。醒後。以夢訴諸喜饒森格。喜饒森格賀曰。此乃上天降福於大師之意。我亦嘗作夢。覩大師之體發

光。斯時空中忽現木翁日夏克哇噶ལོ་ཤར་ཀུན་གྱི་ལྷ་མོ་。六字梵咒降於至尊舌上。發
汰蛇之聲三次。丙午年與喜饒森格同抵後藏。在哲欽達納才隆等處傳法。爲時十
二載。喜饒森格回前藏。祖師留後藏達地方之南北各處修法。後至巴孟欽特。從班
禪超拉習佛母經五明顯乘典籍。榮贈陽哲欽巴根敦珠巴之號。復至哲拔欽修法。
抵拔達晉謁超森拔拉喇嘛。習吉祥天母小法經。喇嘛謂之曰。余於前夜夢於黑暗
颶風之中。自南來一形似婦人之比丘。歡迎入室。醒後尤意我徒拔朗卯。恐被其人
攝去。孰憶爾之來此。己午年回前藏。至格色寺從欽那喀巴勒習金剛佛經。復往烏
官之哲耶林欽哲爾森。習時輪金剛經。復與喜饒森格同抵後藏。至那陽則欽各處
傳法。往倫布蛇。從札格哲關拉喇嘛及特欽齊之蘭欽坦哲巴拉喇嘛。習各經典。喜
饒森格在後藏修至尊像。自丁卯夏動工。至翌年圓滿。初札什倫布寺後有山。至尊
在世時。已預言其處其人及修法建寺等之各種徵兆。至是大師抵噶勃修法時。夜
夢至尊坐於札什倫布山巔。堂爾才菩薩坐於山腰。謂大師曰。奉至尊命。令爾駐錫

於山下。繼而至尊用柔音發噶噶之聲。並說因明甚解經。醒後全身擅動。及至波達。復夢婦人發柔聲告大師曰。奉佛母命來告。此處係大師建寺之所。世世相傳。護持黃教。初喜饒森格晤至尊時。卽告之曰。可在奈湯創一寺院。其地初爲牧場。有小姑告人曰。此地係根敦珠巴放牛之所。精修寺宇。規模宏大。僧衆尤多。時人目爲狂語。至今果驗。先是至尊五十七歲。丁卯年。修噶勒丹寺。大師八歲時。修布賚紉寺。十一歲時。修色拉寺。至三十九歲。親建札什倫布寺。其寺式後像象鼻。東像琵琶。北像財寶天王手執樹鼠之形。西像鳳凰。南像寶劍。西南像立海螺。山石下滾。係表財寶來臨之意。於卯年九月吉日。由薩那模巴失大達等資助動工。大殿之柱數四十有八。彌勒殿柱十二。靜室柱六。佛母殿柱六。護法殿柱二。上樑時。天空現虹。成衆寶色。久繞不散。大殿供釋尊像。開光時。天雨寶花。十方振動。是時。寺名未定。大師夜宿布房中。夢佛母告之曰。寺名可取札什倫布。己巳冬畢工。傳經闡化。迄甲午年。在此二十六年中。每屆夏季。均設盛大法會。宏揚黃教。常夢至尊來授奧義。年八十有四。大師

遵至尊所定律儀。在札什倫布寺開盛大法會。越三年。復在寺中開法會。勝愈前會。是年十一月初七日。命徒堂森拉克巴邦爾達領衆至。乃前諭曰。我將去矣。願爾輩遵守前法。闡揚黃教。維護札什倫布。賞彌勒佛像一尊。翌晨跏趺坐而寂。時明成化十二年丙申也。化身上昇華樂天。色身入於法身。天雨寶華。太空現虹。弟子等爲建銀塔。樹立寺中。永奉祀。

第三節 第二世達賴喇嘛

第二世達賴喇嘛。法名貢敦嘉錯。生於明成化十二年丙申。在後藏札朗轉世。初生卽能誦度母佛經中奧義。並親見至尊宗喀巴佛現身。復見文殊師利佛及各護法神現身。靈異旣著。乃迎至札什倫布寺。年至十一。由第二世班禪額爾德尼四朗曲朗。傳授小戒。二十歲。由捻宜曲濟喇嘛傳授大戒。嗣根敦珠巴之位。統治藏事。自置第巴等代理兵刑賦稅。其弟子稱呼圖克圖。則分掌教化。呼圖克圖之稱始於此。親纂至尊宗喀巴佛及佛母讚頌。繼又從藏人之請。移居拉薩之別蚌寺。名德愈

隆。威望益顯。入室弟子。幾不能容。遂按照前世由甲噶爾所得各徵兆。就別蚌寺側。復建一寺。曰兜室宮。一名瓊科爾結寺。以爲新學喇嘛研究經典之所。自是喇嘛精通秘密蓮華部法者無算。其地可稱爲西藏文學之淵藪。佛教之根據地焉。教化旣行。活佛之名。益喧傳於內地。明正德十年。武宗遣劉允率將校十人。士千人迎之。貢敦嘉錯不願行。藏人匿之。將士欲脅以兵。爲藏人所襲。遁還。時武宗已崩。世宗嗣位。盡逐由藏留於內地之喇嘛。而奉道教。藏人乃益服其有先見之明。愈加禮敬焉。嘉靖二十一年壬寅。在布賚綳幹墊頗章寺內圓寂。享年六十有七。

第四節 第三世達賴喇嘛

第三世達賴喇嘛。法名索倫嘉錯。生於明嘉靖二十二年癸卯。在前藏堆噶轉世。初生卽能朗誦噶嘛呢叭嚩吽六字大明咒。及至尊宗喀巴佛出世源流。親見各護法神現身。從幼卽能認識前世所用之人。能預知種種前因。由仁青四郎札巴喇嘛傳授小戒。由噶勒丹池巴格勒擺桑布。傳授大戒。智慧道德。靡不圓通。修建裏塘

寺、古綳降巴嶺寺、俺奪降巴嶺寺、勒協嶺寺、瓊科爾結崙珠格采寺。隨登坐布賚綳色拉各寺講經之座。其身實得禪定。慈忍淵默。雖具他心宿命。通而不自耀。於是紅教中大寶大乘諸法王。均俯首稱弟子。改從黃教。化行諸部。東西數萬里。熬茶膜拜。視若天神。諸番王徒擁虛位。不復能施其號令。青海河套及諸蒙古。罔不嚮服。

蒙古元太祖十七世孫阿勒坦汗。卽俺答。據十二土默特部而居。領左翼三萬衆。勢極盛。用兵并瓦剌四部。卽今之青海地也。明嘉靖時。屢擾中國。隆慶五年。與明和。封爲順義王。萬曆元年。兵力西漸。進擊西藏。收服阿木多、喀木等部。卽今之西康。於是阿里克喇嘛。爲汗唎誦大有利益。分別取舍等經。解脫三惡緣。及來世罪孽。汗遂揣志經典。始念六字大明咒。其姪鄂爾多斯部博碩克圖濟農。往見其叔阿勒坦汗。諫曰。前世失陷城池。因與中國之人結仇。以致出亡失絕。今汗壽已高。漸至於老。事之有益。今生及來世者。惟有經教。今聞西方純雪地方。大慈大悲觀世音菩薩出現。祈遣使請來。依前往神祖。忽必烈汗與拔思巴喇嘛。設立道教。豈非盛事乎。阿勒

坦汗然之。遂於萬曆七年。射入藏迎索倫嘉錯。道侵瓦刺。爲所敗。乃遣使至藏。時索倫嘉錯默坐微笑曰。阿勒坦汗前世已經善緣。我今必往。於是左翼蒙古三萬人。議於青海之察卜齊勒雅地方。修造寺宇。初遣八百人往迎。次遣千人往迎。再遣三千人往迎。四次汗自領萬人。迎於察布哈勒廟。卽仰華寺也。每次獻幣帛諸寶駝馬無算。大會諸部。飲長生水。喇嘛爲各言其前世三生善緣。於是徹辰洪台吉奏言。前世成吉思汗之孫庫騰汗。與忽必烈汗。以道教使天下太平。今值屢世爭鬥之餘。但聖識喇嘛與大力汗二人相遇。伏願而今將湧血之大江。變爲溢乳之滄海。普遍大衆。無有窮極。是時漢番蒙古等十餘萬衆。莫不贊歎希有。

旣而阿勒坦汗以足疾殺馬取治。空中忽現白色人。如索倫嘉錯像。謂曰。爾何得作此惡業。阿勒坦汗大懼。乃從阿里克喇嘛教。日持六字大明咒百八遍。以爲懺。又時阿勒坦汗子死。其母哈屯莫倫。依蒙古俗。爲殺百童子百駝駒殉葬。以此業緣。其母尋死。墮於鬼身。日日纏擾阿勒坦汗乞救。索倫嘉錯乃依秘法。爲修三角護摩。

爐。如法持誦。而以哈屯莫倫骨殖焚於爐內。將焚之際。衆見一蛇形異蝎。鑽入屍衣。昂首領外。索倫嘉錯爲誦眞言。蝎卽點頭三次。寂然不動。索倫嘉錯又爲作三世佛大供。供畢。焚屍及蝎。衆咸見爐煙忽化白光一道。旋繞昇空。變爲童子。合掌而去。自是蒙人益加誠服。索倫嘉錯嘗諭諸蒙古汗王台吉及其部下曰。以前蒙古人死。其妻奴牛馬皆活焚而死。此後爾等不可犧牲生命。又曰。若爾等仍如往昔。妄殺一人。則爾等生命。將脫離爾之軀殼。若殺牛馬。則爾等財產。將被沒收。若毆辱僧侶。則爾等田宅必被毀。從前爾等每年每月犧牲牛馬於死者影像之前。今宜取而焚之。不然。則爾之宅將被毀。昔日置影像處。爾等必以六臂觀世音菩薩像替之。以乳及乳油乾酪祀之而已。不得用血肉。又曰。汝不可爲盜賊。宜如在衛及藏之所爲。如是引伸之例甚多。難以枚舉。自此蒙古改按八節。持戒誦經。每月治齋三日。禁殺生漁獵。創立十善福政。凡出家人違教娶妻。在家人違教殺生者。皆罪以黑烟塗面等罰。蒙古佛教於是復大興。乃尊索倫嘉錯以聖識一切瓦齊爾達賴喇嘛之號。達賴之名。

始於斯時。其意爲包羅萬衆喇嘛。執掌雷電大法師。索倫嘉錯稱爲慧海之車。喇嘛亦贈汗台吉等。以經教護法之號。阿勒坦汗許於歸化城立廟。以八寶莊嚴佛像。博碩克圖汗許將一百函甘珠經。用寶石金銀裝修。索倫嘉錯亦許於尼濟木塔拉地。造彌勒佛像。先遣班禪索納木札克巴小呼圖克圖往。戒以到卽入馬頭明王定三日或七日。彼土神將獻所藏物。小呼圖克圖如教入定三日。忽一白衣少年白袈裟掛白念珠出。禮小呼圖克圖訖。跪白瓦齊爾前。命藏物之因。今當如令呈出云。白瓦齊爾者。索倫嘉錯之號也。明日果一衆寶莊嚴之馬鞍。自然而出。小呼圖克圖乃築像基。甫就。而索倫嘉錯至。初有一托音齊。卽蒙古喇嘛之弟子。以索倫嘉錯像贈薩木達汗之父。汗父取而擲諸地。卽夢有黑衣人。以水晶刀刺其心。次日諸竅流血而死。薩木達汗悔懼。疾以精金寶玉等獻諸索倫嘉錯。乞爲造像。懺父之罪。索倫嘉錯許之。汗乃大喜。至是索倫嘉錯以其金玉并土神所出之衆寶。和合造成大慈彌勒佛像。躬自開光。天雨寶華。異香普聞。奇祥靈瑞。不可勝紀。又時有術士博訥木則者。

屢以術害索倫嘉錯而不得。一日忽來稽首請罪曰。我以術死九十七人。獨達賴喇嘛三次不傷。我知罪矣。我死必墮三惡道。今願於觀世音菩薩前懺悔歸依。乞爲授戒。并示以道路。索倫嘉錯如其願。逾七日果死。索倫嘉錯爲引入菩提道焉。其他種種靈蹟。不勝紀錄。

時阿勒坦汗謀報瓦剌。索倫嘉錯止之。勸令東還。並戒其好殺。阿勒坦汗亦勸其通中國。乃自甘州遣大學士張居正書。自稱釋迦牟尼比丘。居正以聞。神宗命通使焉。旣而阿勒坦汗於萬曆九年死。徹辰洪台吉相繼沒。各部復迎索倫嘉錯。得其允許。途次明甘肅。其長官進獻供養。時香煙忽結成一壽字。撥之不散。衆咸驚異。明人因求法。索倫嘉錯爲授灌頂。且以經文傳之。已而寧夏等處長官。悉來禮供。索倫嘉錯於大衆中。現身爲白色四臂觀音之像。一面二手合掌。一面左手執青蓮花。右手執水晶念珠。結跏趺坐。具足莊嚴璀璨。放五色光。照徹十方。大衆益敬信焉。在鄂爾多斯坐禪三月。又在土默特焚化阿勒坦汗骨殖。自是遍於伊可錫巴爾博碩克

圖十二土默特喀爾喀等地宏傳灌頂密教。度化無算。

萬曆十五年。察哈爾圖們汗遣使來迎。索倫嘉錯謂使者曰。明年上季或可往。遲則不暇矣。衆皆不喻。使者阿穆岱獨知之。乃授以灌頂法。十六年。神宗遣使。以千人厚禮來迎。適與圖們汗來迎之千人遇。各敦請往宣法教。索倫嘉錯曰。二大國王之請。非爲己身。實爲衆生扶持佛教。欲往之心。非不甚切。但凡物之生。有始必有終。今將往他處宏法利濟矣。至三月十六日。索倫嘉錯會集大衆及兩國使者告誡畢。卽入極樂通慧神變三昧。泊然而寂。茶毗之時。頂現觀世音菩薩像。復於像頂現藥王佛像。慈悲慧眼。明照四方。衆人感動。傾心皈依。黃教聲威。遂遍傳於西藏青海蒙古及內地矣。東西數萬里。熬茶膜拜。不辭跋涉。諸王部長。莫不稟教行政。不復自施號令。索倫嘉錯享年四十有六。於明萬曆十六年戊子。在卡歐吐密地方圓寂。

第五節 第四世達賴喇嘛

第四世達賴喇嘛。法名雲丹嘉錯。於明萬曆十七年己丑。在蒙古德青王斯齊

地方轉世。爲阿勒坦汗之曾孫。圖古隆汗族敬格爾家之第四子。從幼親見四臂觀世音菩薩。及至尊宗喀巴佛現身。年十四來藏。由噶勒丹寺之池巴桑結仁青。傳授小戒。又從第四世班禪額爾德尼羅桑曲吉甲參。傳授大戒。精通秘密。卽於藏地。隨緣行化。一時隴地某寺。以銅鎔金。造一彌勒佛像。莊嚴完美。極盡神妙。方欲開光。像首忽然傾斜。衆匠皆不能正。適雲丹嘉錯至。禮像畢。略加省視。曰。像首上對寺脊內。有一得道喇嘛屍。像首避之。故傾斜也。卽令人登脊察視。果有人屍。取棄諸江。雲丹嘉錯乃爲像散花開光。像首卽時復正。衆見此瑞。咸生淨信。自是廣建法幢。宗風大闡。靈蹟昭著。並將欲貽黃教之害者。預示化誨。止其惡念。又於石上留手足模印。登布賚繡色拉噶勒丹三大寺講經座位。宣揚佛法。顯示各種妙術。興旺黃教。於是河套青海蒙古。守其戒不敢侵掠邊陲者。殆五十年。黃教之勢。因之更浸灌於內外蒙古。與伊犁矣。明萬曆間。神宗遣使封爲沙市達多爾濟桑結名號。賜印敕。喀爾喀人因欲宣揚黃教於外蒙。乃議別設一坐牀掌教喇嘛於庫倫。雲丹嘉錯命札阿囊昆

噶寧波以往。更賜以大慈邁達里呼圖克圖之號。此卽蒙古設立哲布尊丹巴呼圖克圖之濫觴。雲丹嘉錯享年二十有八。於明萬曆四十四年丙辰。在色拉寺圓寂。

第六節 第五世達賴喇嘛

第五世達賴喇嘛。法名阿旺羅桑嘉錯。於明萬曆四十五年丁巳四月初八日。在前藏瓊結地方薩爾合王家轉世。親見阿底霞佛及至尊宗喀巴佛並觀世音菩薩馬首金剛巴墊神母現身。第四世班禪額爾德尼羅桑曲吉甲參知之。六歲。至其家。阿旺羅桑嘉錯見之卽曰。羅桑曲吉甲參爾來何遲也。卽相與講論秘密奧義。聞者駭訝。乃由第四世班禪額爾德尼羅桑曲吉甲參傳授大小戒。十歲。以圖巴克洪台吉及蒙古掌教喇嘛等誠請。往授消災吉祥之六臂者吉囉（梵語。此云如意輪）觀自在灌頂法。卽爲衆現六臂觀世音身。微妙嚴肅。光明照徹。衆心歡悅。信爲觀世音菩薩之化身。

清太宗崇德二年。喀爾喀三汗。奏請發幣使。延第五世達賴喇嘛。四年。因厄魯

特使察漢喇嘛等致書於圖伯特汗。其詞曰。

大清國寬溫仁聖皇帝。致書於圖伯特汗。自古國君所製之經典。朕不願其泯滅而不傳。故特遣使延致聖僧。爾圖伯特主。能佈佛教於天下之賢人也。倘惠然肯來。則朕心甚悅。至延請所以之詞。俱着所遣之額爾德尼達爾漢等口傳。五年。太宗復遺書於圖伯特之諾們罕喇嘛。其詞曰。

寬溫仁聖皇帝致書於諾們罕喇嘛。喇嘛護持聖道。利濟群生。能普行此二事。朕心甚悅。用是致書報答。喇嘛可詢之於圖伯特汗。許來則卽遣人報知。朕可遣使敦請。若不許或喇嘛無意。卽當明言。

因以上之二書。第五世達賴喇嘛乃與第四世班禪額爾德尼會商。遣伊喇固克散呼圖克圖。及藏巴汗青海固始汗之使代青綽爾濟等。進統一天下瑞兆及方物。繞道塞外數萬里。以崇德七年至盛京。太宗親率諸王貝勒大臣。出懷遠門迎之。太宗率衆拜天。行三跪九叩首禮。既畢。伊喇固克散等捧第五世達賴喇嘛之書及黃氍

嚮等。上之太宗。太宗立而受之。遂携手相見。乃命古安式安布。宣讀第五世達賴喇嘛及藏巴汗之來書。尊太宗爲曼殊師利大皇帝。（曼殊皆書作曼珠。華言妙吉祥也。當時引爲光榮。而種族之名。遂於是萌。嗣以同音作滿珠。後又作滿洲。）賜茶。喇嘛等誦經一遍。方欲飲。乃大宴伊喇固克散呼圖克圖及同來之喇嘛等。各獻駝馬及西番之菩提數珠。黑狐皮。褐絨花毯。茶葉。狐腋裘。狼皮等物。仍酌納之。伊喇固克散呼圖克圖就地宏傳如意輪灌頂法。遂大啟盛京諸地人民之信仰。時號伊喇固克散爲巴克什喇嘛。八年。大宴第五世達賴喇嘛使者伊喇固克散呼圖克圖。及厄魯特部之代青綽爾濟等於崇政殿。仍命八旗之諸王貝勒等。各大宴一次。每五日備筵一次。賜伊喇固克散呼圖克圖及同來之喇嘛等。銀器。緞疋。朝衣等物。有差。太宗率諸王貝勒。送至演武廳。大宴以餞之。並派恰甘喇嘛至藏。諭云。清室後代。願作達賴喇嘛及班禪額爾德尼之施主。與第五世達賴喇嘛書曰。

大清國寬溫仁聖皇帝。乃致書於金剛大士達賴喇嘛座前。今者承喇嘛普濟

衆生雅意。欲興扶佛法。遣使通書。朕心甚悅。茲將恭候安吉。凡所欲言。俱由察干格龍巴喇等口悉。附金碗一。銀盤一。銀茶桶三。瑪璃杯一。水晶杯二。玉杯六。玉壺一。鍍金甲二。玲瓏撒袋二。雕鞍二。金鑲玉帶一。鍍金銀帶一。玲瓏刀二。錦緞四。盔甲全副。特奉以侑緘。

又與第四世班禪額爾德尼。紅教喇嘛及其他各呼圖克圖之書皆同。是年。厄魯特部之固始汗奏言。達賴喇嘛之功德甚大。應請使至京師爲福祉生靈之計。

初。圖伯特分四部。東部曰青海。曰喀木。西部曰衛。曰藏。青海之固始汗者。本蒙古厄魯特部之人也。於明季併吞青海喀木二部。以青海地廣。令子孫游牧。而喀木則致其賦稅於固始汗。西部之衛地。則第巴卽掌藏政之官。奉達賴喇嘛居之。藏地則藏巴汗居之。第四世達賴喇嘛於明神宗萬曆三十二年。在蒙古土拉河畔之庫倫。爲置大喇嘛一。以處理教務。黃教之勢愈增。而紅教之妬愈甚。紅教喇嘛乃假藏地藏巴汗之勢力。以壓抑黃教喇嘛。第五世達賴喇嘛時。第巴桑結與藏巴汗不和。

以藏巴汗虐其部衆毀蔑黃教爲詞。乞師於厄魯特部之固始汗。固始汗助黃教。以兵殺藏巴汗而剪滅之。紅教喇嘛乃南遁不丹尼泊爾。西藏全境。遂盡爲黃教喇嘛之勢力。時明思宗之崇禎十六年。卽清崇德十年也。固始汗乃以西藏主教之權授第五世達賴喇嘛。於衛地修建布達拉宮。以居第五世達賴喇嘛。其後歷世達賴喇嘛。均駐節於此。而以藏地之札什倫布寺。居班禪額爾德尼。使分主前後二藏。

清初天下混一。順治元年。世祖遣使於圖伯特。偕伊喇固克散呼圖克圖。往迎第五世達賴喇嘛。仍以書諭厄魯特部之固始汗使知之。三年。使還。第五世達賴喇嘛第四世班禪額爾德尼及厄魯特部之固始汗等。遣班第喇嘛等。同來北京。上表候安。獻金佛數珠。氍毹。絨。盔。甲。馬。匹。等物。賜以盔。甲。弓。矢。撒。袋。大。刀。鞍。轡。銀。器。緞。疋。皮。張。等。賞。答。之。四年。第五世達賴喇嘛第四世班禪額爾德尼。上表頌功德。益獻方物。五年。欽派噶足喜饒喇嘛等赴藏。敕令第五世達賴喇嘛赴京。七年。噶足喜饒喇嘛再入藏。派令隆青喇嘛隨行。賚到敕旨。再飭令速赴京。八年。復遣多卜藏古西等

赴藏。賜敕書禮物。三次宣旨。往召第五世達賴喇嘛。後固始汗來貢。是年十二月。欽差偕噶足喇嘛恰噶達爾罕等二百餘人。特來迎接。旋卽具奏。擬於次年赴京。九年。第五世達賴喇嘛欲來朝。表奏啟行日期。世祖遣理藩院侍郎沙濟達喇等迎之。行至青海恰甲。欽差內務府大臣霞古達熱康主僕。前來迎迓。賚頒諭旨。賜賞御物。行至西寧甲噶布。欽派阿格前來迎接。行至窩克昔巴。由國庫賞發口糧。行至滿洲朶巴容台。欽派郎青喇嘛克牙齊佐領前來。頒發敕書及珍珠念珠。行至根協。賞賜金頂黃轎。第五世達賴喇嘛奏朝見之地。或於歸化城。或於代噶地方。請示孰宜。世祖諭諸王大臣九卿科道曰。

當太宗皇帝之時。以喀爾喀一隅未附。外藩蒙古。惟喇嘛之言是聽。因是延請達賴喇嘛。其使未還。而太宗皇帝晏駕。後睿王攝政之時。遣使往請達賴喇嘛。達賴曰。我今不往。然我必欲往。當於卯年（順治九年）送馬匹。辰年（順治十年）前來。朕親政之後。召之。今達賴喇嘛卽啟行而來。從者三千人。朕欲親

至邊外迎之。使達賴住於邊外。俾外藩蒙古之貝子等。欲見達賴者。即可在外相見。若使達賴入於內地。則今年之歲收甚歉。達賴之從者又衆。恐於我無益。若不往迎。則我既召之以來。勢必中途而返。恐喀爾喀部因此阻其歸順之心。究竟應否往迎。爾等各舒所見以奏。

時滿洲諸臣議曰。我等往請。達賴卽來。上親往邊外迎之。使達賴住於邊外。若達賴欲入內地。少帶隨從。亦可聽其自便。上親往迎。則喀爾喀部亦隨之而來。大有裨益。特請而不迎。恐於理未當。我以所敬之禮敬達賴。而不入其教。亦何妨之有。衆漢臣議曰。帝爲天下國家之主。奚可往迎達賴。達賴之從者三千餘人。又值歲歉。亦不可使入於內地。以特請之故。可於諸王大臣之中。派遣一人代迎。且使住於邊外。遣以金銀等物。亦所以敬之也。兩議具奏。世祖曰。朕當裁之。仍諭第五世達賴喇嘛詔曰。朕欲出邊躬迎。而內地西南盜發。羽書時聞。國之大務。難可輕置。用是不能出邊遠迎。特遣親王大臣前往。俟寇靖事無。當圖親來。倘仍有事。則惟於邊內近

地相迎。

第五世達賴喇嘛再奏請。世祖諭之曰。爾於邊內多疾疫。以邊外相見爲便。今朕當至邊外代噶地方迎爾。第五世達賴喇嘛又奏。欽賞及勅諭。俱已收到。今兼程前進。俟至代噶地方。尙須密奏。世祖將親往代噶地方。大學士洪承疇陳之遴等奏言。

臣等閱欽天監奏。昨太白星與日爭光。流星入於紫微宮。竊思日者。人君之象也。而太白敢與爭明。紫微宮者。人君之位也。而流星敢於突入。上天垂象。誠宜警惕。且今年南方苦旱。北方苦澇。歲饑寇警。處處入告。宗社重大。非聖躬遠行之時。雖百神呵護。六軍扈從。自無他虞。然邊外不如宮中之固。遊幸曷若靜思之安。達賴喇嘛自遠方來。遣一大臣迎接。已足見優待之意。亦可服蒙古之心。何勞聖駕親往。天道深遠。固非臣等之所能測度。但乘輿將駕。而星變適彰。此誠上蒼仁愛陛下之意也。不可不深思以爲戒。

疏入。世祖曰。此奏甚是。朕卽行停止。第五世達賴喇嘛又奏。帝願於代噶地方相見。

不勝懽懽。自當兼程而進。更有密語。由去使面奏。世祖命和碩承澤親王碩塞等往迎第五世達賴喇嘛。賞賜寶物。並諭之曰。

前者朕下諭。願親往迎迓。近頃盜賊間發。羽檄時聞。國家重務。難以輕置。未能前往迎迓。特遣和碩承澤親王及內大臣代迎。當適朕不能親行之意。

第五世達賴喇嘛行至腔畢河邊。欽派洛桑格隆來迎。奉諭旨問起居。勅賜珍品。行至清河橋。欽派親王帶領馬隊三千餘來迎。賞黃傘旛幢。順治九年十二月十六日。至京師。適世祖出獵。延謁之於南苑獵場。賜坐。賜茶。賜宴。命戶部撥供養銀九萬兩。第五世達賴喇嘛進馬匹方物。世祖納之。十七日。移居新建黃寺。初。世祖於京師安定門外鑲黃旗教場北。卽清淨化城處。建西黃寺。以居第五世達賴喇嘛。十九日。世祖御太和殿賜宴。賜以金器綵緞鞍馬等物。時厄魯特部之固始汗。亦上表貢方物。兼請第五世達賴喇嘛歸國。

十年正月十一日。第五世達賴喇嘛親往皇宮慶賀。欽派內務府大臣前來迎

接皇宮。世祖諭曰。朕登座位。爾達賴喇嘛着亦同時登座。照前一同吃茶。賞賜大宴。隨行第穆呼畢勒罕擺曲堪布等十五人。亦賜宴暨賞撥銀兩緞疋。自十二日起。遵照諭旨。誦經祝禱。另繕寫哈達遞呈。念經時。柱上忽流水。數日不斷。嗣後流水處。復生花枝。亦經世祖御覽。駐錫黃屋時。一夜有黑雲與煙相合。聚成腔足神。捉拿凶惡妖魅。恐懼戰慄之狀。近前僧俗均見之。嗣因連紀拖榮與降嶺諾罕們二人。講經爭論。時兩家從役。亦分黨相爭。當將其情形奏聞。奉諭旨。二喇嘛不和。緣因講經而起。着由達賴喇嘛按照經規了結。當即按照經中規矩辦理。後奏聞。二月十二日。欽派大臣前來賞賜珍珠斗篷並衣服全套。大緞綬緞各十五疋。及銀器鞍馬等物。第五世達賴喇嘛奏言。此地水土不宜。多病。而從人亦病。意欲告歸。世祖命議政王大臣令議具奏。其一議曰。達賴喇嘛原係特召。當詢其事情。倘不一加詢問。俾達賴含憤而去。則喀爾喀厄魯特等各部必叛。詢之。而達賴之言宜於我。則從。不宜則已。似不可不一詢問。其一議曰。達賴不可詢問也。若詢之而不用其言。則達賴益含愠而去。

且我荷天佑。征服各處以成大業。其時亦無達賴也。既係特召。當賜以金銀緞幣。酌封名號。給之冊印。以不加詢問爲便。二議奏入。世祖曰。詢問且止。仍使部臣諭第五世達賴喇嘛。略曰。

所云水土不宜良是。我等始至此地。亦嘗不宜水土。病後乃相宜。達賴既來。且暫留此。從容往代噶。俟草青之時。當更召外藩之王貝勒等。與達賴相會。

二月十八日朝見。世祖御太和殿宴之。奉諭旨。賞給黃金五百五十兩。銀一萬一千兩。大緞一千疋。金馬鞍十副。虎皮豹皮獺皮各十張。金盤一對。銀茶筒九個。大銀饋一個。茶一百箱。皇太后又賞賜黃金一百兩。銀一千兩。大緞一百疋。越二日。第五世達賴喇嘛奏報起程返藏。欽派內務府大臣賚頒極鉅珍珠朝珠一串。並奉諭旨。前賞大傘旂幟幡幢儀仗等項。可在前擺列。命和碩承澤親王碩巴偕固山貝子古爾瑪紅及吳達海。率八旗官兵。送至代噶地方。又命叔父和碩親王濟爾哈郎禮部尙書覺羅郎丘。餞之南苑德壽寺。嗣又遣禮部尙書覺羅郎丘理藩院侍郎古達禮等。

於五月至代噶地方。賚送諭旨珍品。及頒到金冊金印。晉封第五世達賴喇嘛。金印上刻漢滿蒙藏四體字。文曰。統領西方佛教普通瓦赤拉日拉達賴喇嘛之印。並准其持掌西方政教事務。其金冊十五頁。用漢滿藏三體文字。其文曰。

朕聞兼善獨善。與開宗之義不同。與世出世間設教之途亦異。然而明心見性。淑世覺民。其歸一也。茲爾樂布藏札。暴素達賴喇嘛。襟懷貞朗。德量淵深。定慧雙修。色空俱泯。故宜宣揚釋教。誨導愚蒙。因被化西方。馳名東土。我皇考太宗文皇帝。聞之欣尙。特遣使迎聘。爾早識天心。許以辰年來見。朕荷皇天眷命。撫有天下。果如所聞。應聘而至。儀範可親。語默有度。臻般若圓通之境。擴慈悲攝受之門。誠覺路之梯航。禪林之山斗也。朕甚嘉之。茲冊封爾爲西天大善自在佛。掌領天下釋教普通瓦赤拉日拉達賴喇嘛。于戲。應現身。興隆佛化。隨機說法。利濟衆生。不亦休哉。

第五世達賴喇嘛既至代噶。停鞭暫息。止於黃幕。遇邪魔弄術。忽見天上。兩月

齊出。念真言解之。衆見一月落於山後。行旅無恙。旋由代噶之地起程還國。世祖命固山貝子吳達海主其行。第五世達賴喇嘛上表謝領賜冊印及封號。附獻馬匹琥珀等物。十一年。世祖遣使至藏。存問第五世達賴喇嘛。第四世班禪額爾德尼及厄魯特之固始汗。賜以嵌松子石珊瑚金銀桶及玉瓶緞疋等物。頒銀修建布達拉及黃教寺院六十二處。西藏暨康巴等處。共有寺院三千零七十處。自本年起。每年由清廷國庫頒發經費口糧之費。順治十八年。世祖駕崩。聖祖入繼大統。奉諭旨。每年照常頒給緞疋哈噠等物。康熙九年。奉諭旨。嗣後爾喇嘛所上奏書內。無容繕寫座前及具陳字樣。康熙十四年。聖祖諭旨。賞給黃金曼達一座。計重一百三十兩。黃金一條。計重一百兩。銀茶筒一對。銀四百五十兩。大緞二十疋。哈噠五百。

第五世達賴喇嘛回藏之後。常登坐布資綳色拉諸寺之講經座位。宣演秘法。纂註以前所得因果。暇則退隱寺中。以政務交於第巴之名桑結者。於是第巴桑結之勢日盛。平西王吳三桂之王雲南也。每歲遣人至藏煎茶。叩拜第五世達賴喇嘛。

情誼極篤。康熙十三年。三桂謀叛。聖祖命青海蒙古之兵。自松潘以入四川。第巴桑結使第五世達賴喇嘛。上書聖祖曰。吳三桂若窮蹙乞降。則宥其一死。倘竟鴟張。則不若裂土與之罷兵。聖祖嚴斥之。後清兵圍吳世璠於雲南。世璠通書西藏。請割中甸維西二地。求援於厄魯特部。其書爲清兵所獲。遂不得達。聖祖亦不之問。康熙二十一年壬戌。第五世達賴喇嘛圓寂於布達拉宮。享年六十有六。第巴桑結欲專國政。秘不發喪。譌稱第五世達賴喇嘛常入定。居高閣不見人。凡事皆稱第五世達賴喇嘛之命行之。由是第巴桑結益專橫。既祖準噶爾以殘喀爾喀。復唆準噶爾以鬪中國。又外構策妄。內鬪拉藏汗。致招準兵寇藏之禍。擾攘數十年。皆第巴桑結一人之所致也。

準噶爾。在阿爾泰山以西。天山以北。游牧於伊犁。有噶爾丹者。亦四厄魯特之一。綽羅斯部之人也。曾入西藏爲喇嘛。與第巴桑結相睦。及其兄僧格死。還伊犁殺兄子索諾木阿布坦。而篡汗位。自言受第五世達賴喇嘛之封。稱準噶爾博碩克圖。

汗。有陰窺喀爾喀之志。時喀爾喀部之車臣汗與土謝圖汗交惡搆兵。康熙二十三年二月。聖祖遣使命第五世達賴喇嘛和解之。勅曰。

朕統御寰區。願中外無征戰之勞。離散之苦。使羣生皆臻安樂。近者喀爾喀札薩克圖汗。屢走右翼。子弟人民離散奔入。左翼索之未還。爾喇嘛從來積大福力。永遠真誠。慈悲濟衆。聲聞炳著。無不欽乃高行而讚頌之者。喀爾喀諸汗貝子。皆供奉爾喇嘛。信爾之教。而尊崇道法。爾於本朝。亦誠心敬慎進貢。來往不絕。今天下共享太平。而札薩克圖汗人民離散。未得完聚。朕心大爲軫惻。念其中必有父子兄弟骨肉分離者。未必不生事互殺。交相戰爭。兵戎一起。姑無論人民困苦。卽兩汗亦豈能並存。伊等於朕。向來恭順。竭誠奔走。於爾喇嘛。亦爲護法久矣。何忍默視。使至此極乎。朕與爾俱當遣使往諭。將札薩克圖汗離散人民給還。俾兩翼永歸於好。旣副朕一視同仁之至意。而於爾喇嘛六度之行。四無量之心。亦符合矣。爾喇嘛其遣大喇嘛一人。與朕行人會於喀爾喀境內。

定期而遣之。朕於此亦遣使臣。赴所約之地。與爾使同往。

第巴桑結奏使第五世達賴喇嘛之大弟子噶勒丹錫喀圖。往諭喀爾喀。錫喀圖者。蒙語喇嘛之坐牀也。而喀爾喀部之第一世哲布尊丹巴呼圖克圖。亦奉聖祖詔而蒞盟壇。與噶勒丹錫喀圖並座。噶爾丹遣其族人多爾濟札布隨之。以窺其釁。乃責喀爾喀部待第五世達賴喇嘛之使者無加禮。而詬之。遂爲土謝圖汗所殺。於是噶爾丹以報讐爲名。侵襲其部。喀爾喀東走。聖祖申命第五世達賴喇嘛。遣使罷兵。第巴桑結使濟隴呼圖克圖往。反陰喉之。康熙二十九年。遂入寇漠南。聖祖討之。敗其軍於烏拉布通。噶爾丹託隆代乞和。頂佛立誓而遁。第巴桑結內懼。乃託第五世達賴喇嘛之意。合青海蒙古及厄魯特之各台吉。於二十九年十一月甲辰。奉聖祖尊號。聖祖不受。並卻其貢。屢遣京師之喇嘛入藏探之。皆還言。第巴桑結使人對之遙望禮拜。第五世達賴喇嘛則於高樓之上。而立於絳紗之中。然香烟繚繞。觀之均不分明。三十二年。第五世達賴喇嘛遣使入貢。奏己年邁。國事決於第巴桑結。乞賜之。

封爵。聖祖詔以第巴桑結爲圖伯特國王。三十五年。聖祖親征噶爾丹。至克魯倫河。噶爾丹敗竄。慰其部下曰。此行非我意。乃第五世達賴喇嘛之使言南征大吉。是以深入也。聖祖謂第五世達賴喇嘛若存。必無是事。乃遣使賜第巴桑結書曰。

朕詢之番人。皆言達賴喇嘛久脫緇衣。爾至今匿不奏聞。且達賴喇嘛存在之日。塞外無事者六十餘年。爾乃屢唆噶爾丹興戎樂禍。道法安在。達賴與班禪分主教化。向來相代持世。達賴如果厭世。當告諸護法主。以班禪主宗喀巴之教。乃不使衆人尊班禪而尊自己。又阻礙班禪京師之行。朕欲和解喀爾喀與準噶爾兩部。爾乃使有虧行之濟隴以往。烏拉布通之役。爾爲賊軍卜日誦經。張蓋山上。以觀勝負。勝則獻帕。首額之飾盛軍容者也。不勝則又代爲講款。以誤我邊師。爾曾袒庇噶爾丹。今爲殄滅準夷告捷禮。仍遣使以噶爾丹之佩刀一。及其妻阿奴之佛像一佩符一。遣使賚爾。可令與達賴喇嘛相見。令班禪來京。執濟隴以毘我。如其不然。朕且徵雲南四川陝西之師。俾見爾於城下。爾其

糾合四厄魯特之衆以待之。其母悔。

第巴桑結得書惶恐。乃於三十六年。遣使密奏言。衆生不幸。第五世達賴喇嘛已於壬戌年示寂。轉生淨體。今十五歲矣。前以慮圖伯特民人生變之故。未發喪。今當以丑年十月二十五日。出定坐牀。求大皇帝切勿宣泄。至班禪額爾德尼因未出痘。不敢來京。濟隴喇嘛當竭力索之。可致京師。幸全其身命。乞其戒體。並封進第五世達賴喇嘛臨終牀簀尸鹽之拌像。聖祖初爲秘之。至是年十月。始宣示內外。而第巴桑結使者歸。途遇策妄那布坦會擒噶爾丹之兵。復宣言。第五世達賴喇嘛已厭世。爾部落兵。毋得妄行。策妄那布坦哭而歸。聖祖以第巴桑結始終反復持兩端。乃追還其使。召集各蒙古。宣示第巴桑結之密封。則像首已墜。第巴桑結之使。驚仆於地。時第巴桑結憶昔噶爾丹進兵漠北之際。其姪策妄那布坦。盡收準噶爾之故地。後噶爾丹爲清兵所敗。進退失據。遂仰藥死。因此怨忌策妄那布坦。奏於聖祖。宜防其猖獗。而策妄那布坦亦奏第巴桑結之奸譎。舉發其所立新第六世達賴喇嘛之僞。欲

藉詞侵藏。其奏於聖祖之疏曰。西藏之舊例。以能掌教者掌而傳之。自開宗門以來。普通菩薩（謂達賴喇嘛）海潮大士（謂班禪額爾德尼）無不如是。第五世達賴喇嘛圓寂之後。第巴桑結匿而不宣。捨正傳聖徒之班禪。以自尊其身。別奉紅教喇嘛。卽謂爲達賴之化身。詐傳法旨。擾亂諸部。此青海諸台吉之所共知也。請明正其罪。懇請睿鑒。聖祖以二人皆巨測。不之許。詔答之曰。朕曾勅責第巴桑結。具奏認罪。若怙終不悛。朕不輕恕也。并遣侍讀學士伊通等齎敕往。

四十四年。第巴桑結謀毒拉藏汗不遂。欲以兵逐之。拉藏汗集衆討第巴桑結。而誅戮之。聖祖詔封拉藏汗爲翊法恭順汗。拉藏汗者。青海固始汗之孫也。固始汗已以衛藏二地。爲達賴喇嘛班禪額爾德尼之香火地。留其長子鄂齊爾汗統轄其衆。使次子達賚巴圖爾台吉佐之。固始汗卒於順治十三年。鄂齊爾汗卒於康熙九年。達賚巴圖爾台吉卒於康熙三十六年。達賚巴圖爾台吉之子拉藏汗嗣爵後。欲議立新達賴喇嘛。故與第巴桑結交惡。至是奏以欲廢第巴桑結所立之假達賴喇

嘛構兵。第巴遂亡。聖祖詔執假達賴喇嘛獻京師。行至青海病死。於是拉藏汗與西藏人謀。立博克達山之伊西嘉錯。爲第六世達賴喇嘛。而青海諸蒙古復不信之。別奉裏塘之倉央嘉錯。爲真正之第六世達賴喇嘛。諸蒙古迎之。至於青海使坐牀。奏請賜册印。於是與西藏所奏。互相是非。聖祖恐其構釁。詔青海之第六世達賴喇嘛。暫居西寧衛紅山寺。旋移塔爾寺。兩部之爭議相持未決。於是策妄那布坦擾亂西藏之事起焉。

初。策妄那布坦娶拉藏汗之姊。又迎拉藏汗之子丹衷於伊犁。不令歸。贅其女。康熙五十五年。策妄那布坦以送丹衷夫婦歸西藏爲名。遣其台吉大策零敦多布。領精兵六千。繞戈壁。踰和闐南之大雪山。涉險冒瘴。晝伏夜行。始達於西藏之界。聖祖以準噶爾譎詐。敕拉藏汗勿恃親而疏防備。拉藏汗毫而酖飲。不以爲意。準噶爾兵突入。遂圍攻布達拉。誘其衆內應開門。殺拉藏汗及其二子。搜索各廟重器。送之伊犁。禁拉藏汗所立之新第六世達賴喇嘛於札克布里廟。聖祖詔西安將軍額爾

倫特領兵往征。大敗。準噶爾兵益熾。青海蒙古皆憚進兵西藏。奏曰。達賴喇嘛若聽其隨地安禪。則王師可免遠涉之勞。聖祖不許。續議進兵西藏。命皇十四子親王胤禩。爲撫遠大將軍。移師西向。分軍兩路直擣西藏。至是西藏人民。亦知青海之新第。六世達賴喇嘛之呼畢勒罕爲眞。合詞乞擁置禪榻。詔許給冊印。於是蒙古之汗王貝勒台吉等。各自率所部之兵。或數千或數百。隨清兵。於五十九年。扈從第六世達賴喇嘛入藏坐牀。乃大破準噶爾之衆。西藏於是始定焉。蓋自第五世達賴喇嘛圓寂之後。兩立假達賴。紛紜擾亂。至三十餘年。論者謂達摩創法震旦。有一花五葉之讖。至六世果以衣鉢啟事。故六祖不復傳衣鉢。與達賴喇嘛傳至第六世之事。若一轍。物盛難繼。始必有終。天數所及。佛法不能違。而況人事歟。留蒙古兵二千。以拉藏汗舊臣貝子康濟鼐掌前藏。台吉頗羅鼐掌後藏。是爲派置大臣入藏之始。取拉藏汗所立之博克達山喇嘛。送於京師。執附逆黑教喇嘛百餘。斬其渠藍占巴托宰桑等。撫諭圖伯特。西藏平。六十年九月丁巳。聖祖親製平定西藏碑文。勒石建之於拉

薩大昭寺其詞曰。

聖祖仁皇帝御製平定西藏碑文

昔者太宗文皇帝之崇德七年。班禪額爾德尼達賴喇嘛固始汗。謂東土有聖人出。特遣使自人跡不至之區。經讐敵之國。閱數年始達盛京。至今八十載。同行善事。俱爲施主。頗極安甯。後達賴喇嘛之歿。第巴隱匿不奏者。十有六年。任意妄行。拉藏滅之。復興其法。因而允從。拉藏苦苦腦兒群衆公同之請。中間策妄阿喇蒲坦。妄生事端。動準噶爾之衆。肆行奸詐。滅壞達賴喇嘛。並廢第五輩達賴之塔。辱巖班禪。毀壞寺廟。殺戮喇嘛。名爲興法。而實滅之。且欲竊據圖伯特國。朕以其所爲非法。爰命皇子爲大將軍王。又遣朕子孫等。調發滿洲蒙古綠旗兵各數萬。歷煙瘴之地。士馬安然而至。賊衆三次乘夜盜營。我兵奮勇擊殺。賊皆喪胆遠遯。一矢不發。平定西藏。振興法教。賜今呼畢勒罕冊印。封爲第六世達賴喇嘛。安置祥楊。撫綏圖伯特僧俗人衆。各復生業。於是文武臣工。咸

謂王師西討。歷瘴癘險遠之區。曾未半載。輒建殊勳。實從古所未有。而諸蒙古部落及圖伯特酋長。亦合詞奏曰。皇帝勇略神武。超越往代。天兵所臨。邪魔掃蕩。復興蒙古所向尊奉法教。藏衛等部人衆。咸得拔離湯火。樂土安居。如此盛德大業。非臣下頌揚所能宣罄。請賜御製碑文。鐫勒招地。以垂永久。朕以何功焉。而群衆勤請不已。爰記斯文。立石西藏。俾中外知達賴喇嘛等三朝恭順之誠。諸部落累世崇奉法教之意。朕之此舉。所以除逆撫順。綏衆興教云爾。

第七節 第六世達賴喇嘛

第六世達賴喇嘛。法名倉央嘉錯。於康熙二十二年癸亥。在捫地松度地方出世。初生卽言。我係阿旺羅桑嘉錯化身。常念密仔瑪經。親見至尊宗喀巴佛馬首。金剛班墊神母現身。二十歲時。諸蒙人迎至青海。奏請清廷。俟其坐牀時。賜以金冊。適先立之兩假達賴喇嘛。亦互相攻訐。奏請辨別真僞。清廷恐其構釁。命倉央嘉錯暫居西寧之紅山寺。未久又移至塔爾寺。及清兵破厄魯特。藏人始信倉央嘉錯爲真。

正轉生者。遂合辭請封爲第六世達賴喇嘛。守護禪榻。於是蒙古諸部。發兵擁護。第六世達賴喇嘛入西藏。軍容甚盛。聖祖遣章嘉呼圖克圖等赴藏。迎至布達拉坐牀。詔加封第六世達賴喇嘛宏法覺衆四字。賞賜甚多。由第五世班禪額爾德尼傳授小戒。在色拉寺及拉魯格青寺等處石上。留印足跡手跡。沐浴之水。上現八寶。靈妙非常。隨在色拉寺布賚紉寺噶勒丹寺瓊科爾結寺。登座講經。復於前藏大昭樓頂。新建金剛寶頂及佛尊甚多。年至二十有五。勅入覲。於康熙四十六年。行至青海工噶洛地方圓寂。

第八節 第七世達賴喇嘛

第七世達賴喇嘛。法名噶桑嘉錯。於康熙四十七年戊子。在裏塘出世。初生之際。彩雲呈祥。雨暘時若。常念拉莫經。親見至尊宗喀巴佛十八羅漢金剛菩薩等神現身。前世所使之人。均如相識。預知各項前因。常顯極妙之法。年僅七歲。卽與僧俗數千傳經。纂集佛典讚頌。右臂有蓮花之樣。左臂有海螺之形。左手掌中。現有法輪。

之形。肩頭之下。多有祥徵。下身成虎皮之文。於康熙五十三年。取道德格。前赴青海。途間忽生水泉。前世認識之人。凡來見面。皆如素識。及抵滾布。途次青海阿齊圖台吉之帳。清廷派欽差大臣來迎。諭旨勅令進京。五十四年。派大臣工噶落爾頒旨。着先駐錫滾布。五十五年。諭旨預備行轅。暫住滾布。繼又奉到諭旨。青海各官齊集之日。達賴喇嘛親身會面一節。朕心甚喜。洵爲真正呼畢勒罕。朕乃施主。三年內當與僧人一百三十四人賞發冬夏衣料。隨備謝恩奏書。專差前往呈進。厥後因事返回前藏。將緣由託青海長官轉奏。旋奉諭旨。達賴喇嘛係屬皇帝轉世。爾大衆須要恭敬。爾青海各官。不准稍生歧異。當知一手難遮天日也。又旨諭曰。爾達賴喇嘛福德皆裕。須要勤加薰修。冀黃教振興。由察汗諾們罕丹巴堅參披剃傳經。五十九年正月初一日。勅令皇子撫遠大將軍胤禩。移師穆魯斯烏蘇。以宗室延信爲平逆將軍。率領清兵三千。護送第七世達賴喇嘛返藏。駐錫布達拉。頒發金印一顆。文曰。振興黃教普度生靈七輩達賴喇嘛之印。又金冊十三頁。並金銀大緞供器等物。九月十

五日。欽派大將軍二人并內務府大臣一人暨吐觀呼圖克圖噶足達喇嘛司員筆帖式佐領等。以及青海庫倫各王公官兵。護送第七世達賴喇嘛至佈達拉坐牀。並賜極長黃哈達。暨銀一萬兩。六十一年。貢使倉卓喇嘛根登頓柱丹達二人。入貢清廷返藏。聖祖賜勅書藥王經卷。並稀奇念珠寶器等物。隨因聖祖崩位。世宗欽派札薩克喇嘛等赴藏。諭旨熬茶作喜。布施三大寺銀各一千兩。其他寺院。共賞銀三千兩。大哈噠各寺一百。小哈噠各寺一千。茶百甌。大緞二十四疋。金曼達一座。

羅卜藏丹津者。固始汗嫡孫也。初羅卜藏丹津從清軍入藏歸。以青海及圖伯特。舊皆屬其祖父固始汗。謀恢先人霸業。乃於雍正元年夏。誘諸部會盟。令各仍故號。不得復稱王公貝勒等爵。自號達賴渾台吉以統之。遂欲據圖伯特。以遙制青海。會青海有大喇嘛曰察汗諾們罕者。自西藏來。爲番衆所信。羅卜藏丹津以術誘煽。使之從己。於是青海諸寺喇嘛。衆各數千。羣起騷擾。世宗命年羹堯岳鐘琪率師平之。羅卜藏丹津投準噶爾。乃改西寧衛爲府。設青海辦事大臣。追奪各寺明所頒國

師禪師印。並定制。寺舍毋逾二百楹。每寺喇嘛。毋逾二百人。禁藏兵器。四年。按寺每年發給衣單口糧。勅建廣惠祐甯二寺。並賜碑文。

勅賜廣惠寺碑文

黃教之興。盛於西土。其道根源天竺。演說因果。覺悟羣生。使爲善者知勸。作惡者思懲。與作善降祥。作不善降殃之理。默相符合。所以易風移俗。俾助於王化。爲益洪矣。西甯舊有郭莽寺。地處通途。爲邊方古刹。從西藏進口之喇嘛。皆於茲託足。卽佛家所謂十方院也。自羅卜藏丹津悖義作逆。茲寺奸頑喇嘛。與相連接。煽動部落。遂使修行之區。轉爲藏奸之藪。是以大兵進討。除其衆而毀其寺。所以阻惡止亂。非得已也。邇來氛翳廓清。疆土甯謐。宜振興黃教。以綏撫番夷。爰發帑金。遣官往爲重建佛殿經堂僧舍山門。規模復舊。丹牕一新。常住之僧。以二百人爲限。俾其宣揚妙法。且使往來僧衆。有所棲憩。董役之臣。請易嘉名。賜額曰廣惠寺。所望重建之後。遐邇番夷。一心信奉。敦崇善行。以延慶祐。永

享我國家億萬載太平之樂。是朕錫福拯民。躋諸仁壽之意也。紀文勒石。用昭示於久遠焉。

勅賜祐甯寺碑文

西甯郭隆寺。地處通途。喇嘛之自西藏來者。於茲取道。爲邊陲古刹。自羅卜藏丹津之叛。結連奸頑喇嘛。煽惑番夷。一時蠢動。是以大兵進討。燒焚寺宇。俾奸究無所藏匿。凶徒既殄。邊境敕甯。梵宇舊基。理宜修復。爰發帑鳩工。遣官往董其事。山門佛殿。規則秩然。僧舍經堂。一準舊式。限令延僧二百人。常住董修。宣揚妙法。往來梵衆。亦得棲息之所。役既告竣。以舊稱不雅。敕定嘉名。賜額曰祐甯寺。並紀文刻石。以昭久遠。夫黃教之傳。盛於西域。凡厥部衆。尊崇信奉。遠邇一心。其爲道蓋佛氏之支流。開示迷途。因俗利導。於治化不爲無助。書曰。惠迪吉。從逆凶。惟影響覽。茲寺興廢之由。順逆之理。昭然矣。我國家洪敷德澤。以振興黃教。撫綏番夷。繼自今恪守清規。虔修梵行。諸部落歸依崇奉之。願久且益。

堅。將見鴻慈普祐。永戴清甯。茲寺與西土山川同其悠久可也。

雍正元年。世宗賜第七世達賴喇嘛。黃金寶器及大小哈噠等。並撤回漢兵。二年。欽派達喇噶足洛桑邊覺司員等來藏。頒發諭旨。照第五世達賴喇嘛振興西方黃教普化生靈綏靖地方。並頒金冊一道。計十六頁。金印一顆。係漢滿蒙藏四體字。文曰。西天大善自在佛統領天下釋教普通瓦赤拉且拉達賴喇嘛之印。呈進登極。貢使卓尼堪布等回藏。勅賜諭旨一道及寶器。三年。世宗遣札薩克喇嘛洛桑格隆及司員等至藏。勅賜第五世達賴喇嘛頒發所刊之藏經。及至尊宗喀巴佛章嘉佛源流各經卷。初次刷印各經暨寶器。五年。移第七世達賴喇嘛於裏塘西之惠遠寺。避準噶爾之亂也。

初。準噶爾之策妄那布坦。於雍正元年正月丙午。遣垂納木喀等抵京師。世宗命都統拉錫理藩院尙書特古忒。傳諭之。二年冬。西藏之噶倫等三人。忌貝子康濟鼐之權。聚兵害之。欲投準噶爾。詔將軍查郎阿。率川陝滇三省之兵一萬五千進討。

未至。而台吉頗羅鼐。率後藏及阿里兵九千。截敵去路。擒首逆以聞。是年。準噶爾之策妄那布坦死。其子噶爾丹策楞嗣。請赴西藏煎茶頂佛。且聲言送還前所擄拉藏汗之二子。世宗不許。詔嚴兵備之。八年。遷第七世達賴喇嘛於泰甯。以兵一千護之。且令藏兵嚴防準噶爾。十二年。準噶爾請和。世宗勅令阿格親王章嘉呼圖克圖大臣以及大小各官。率領清兵。護送第七世達賴喇嘛由西寧回西藏駐錫。勤衍黃教。綏靖地方。並賜寶噐。減戍西藏兵四分之一。賞給榮增師傅噶勒丹寺池巴阿旺曲墊。爲宣衍黃教阿齊圖諾們罕名號。章嘉呼圖克圖爲第七世達賴喇嘛。請以巴塘裏塘之地隸西藏。以裏塘爲第七世達賴喇嘛之降生地也。詔以其商稅賜之。其地仍內屬。十三年。賞給色拉布賚綳噶勒丹三大寺茶銀哈噠。遣總兵大員派領兵丁五千名。常川駐於惠遠廟。番名噶達廟。在康定之西。舊名打箭爐。地當川藏通道。亦要塞也。世宗憲皇帝。有御製惠遠廟碑文。其詞曰。

我國家受天眷命。撫御寰瀛。光被四表。莫不尊親。太宗文皇帝崇德七年。班禪

額爾德尼達賴喇嘛。知東土有聖人。遣使通款。路涉萬里。時經數載。始達盛京。逮世祖章皇帝時。遂親至京師朝覲。備蒙恩眷。後以策妄阿喇蒲坦。肆惡逞奸。殘蹂西藏。皇考聖祖仁皇帝。將遣大師。計日平定。撫綏人衆。各復生業。賜今呼畢勒罕册印封號。安置禪榻。重興黃教。用以慰番衆皈依佛法之誠。至酬班禪達賴喇嘛累世恭順之悃也。朕御極以來。加意護持。俾安淨土。因思古今之有佛教。特以勸善懲惡濟人覺世爲本。黃教之傳。所以推廣佛經之旨也。演教之地愈多。則佛法之流布愈廣。而番夷之嚮善者益衆。西藏既有班禪額爾德尼。而近邊之番夷。離藏遙遠。皆有皈依佛法之心。因川省打箭爐之外。有地曰噶達。昔年達賴喇嘛曾駐錫於此。爰相度川原。創建廟宇。發帑金數十萬兩。遣官董司工役。仿西方達賴本佛廟之圖式。凡爲殿堂樓房。一千餘間。又爲平房四百間。賜額曰惠遠。丹艴輝煌。器用完備。置兵以衛之。達賴喇嘛來登禪榻。率諸徒衆。咸就新居。諸番耆弱。踴躍欣喜。使臣奏言。彼土早寒。自造寺以來。氣候和

暖。深秋未凍。則知茲寺之建。人神胥慶。山川著靈。朕所以仰體皇考。厚酬達賴喇嘛累世恭順之忱。且以廣布黃教宣講經典。使番夷僧俗。崇法慕義。億萬斯言。永躋仁壽之域。則以佐助王化。實有裨益。是用紀文豐碑。以昭示遠焉。

世宗駕崩。熬茶作善。欽差達喇嘛曲批達結等至藏。奉諭旨曰。

自前以來。大局既爲一體。應宜恪遵列祖列宗聖意。爾喇嘛尤須照前。和衷認真。勤衍黃教。以期常承恩澤。並附頒賞三大寺熬茶銀三千兩。大小哈噠各三百根。茶八百甌。其餘寺院。公給銀三千兩。小哈噠三千根。茶八百甌。

乾隆元年。章嘉呼圖克圖同齋詔熬茶之侍衛。帶領副將張聖學並原護送第七世達賴喇嘛來藏之川兵。自藏起程入都。欽差達喇嘛曲批達結。洛桑邊覺及司員等來藏。頒發勅書四道並賜物以及登極事宜。三年。準噶爾之噶爾丹策楞。復請入西藏煎茶頂佛。高宗始許之。由部奉到諭旨。略曰。

西藏各寺。約有一千餘廟。商上應撥各經費甚繁。均須由商上撥給。節經列祖

列宗優加鴻仁。今着每年由天津欵項內賞銀五千兩。轉交達賴喇嘛買茶之人承領。

先是雍正二年。以頗羅鼐有除西藏噶倫之功。詔進貝子。總藏事。旋復晉爵郡王。且留正副大臣二人。分領四川陝西之兵二千。駐紮於前後藏以鎮撫之。是爲駐藏大臣之始。已而頗羅鼐卒。其子朱爾默特那木札勒襲封郡王。奏罷駐防之兵。陰通書於準噶爾。請兵爲外援。並欲除駐藏大臣。又襲殺其兄。揚言準噶爾兵至。聚其黨二千謀變。時駐藏大臣都統傅清。左都御史拉布敦。覺其謀逆。欲先發而左右無一兵。乃以計誘之。寺中登樓而手刃之。珠爾默特那木札勒之黨。復殺傅清與拉布敦。第七世達賴喇嘛使班第達攝藏事。擒逆黨以聞。高宗使將軍策楞。班第達二人。率兵至西藏。詔以二大臣事先靖變。贈一等伯。卽以其地立雙忠祠以祀之。至是西藏始不封汗王貝子。以四噶倫分其權。而總於達賴喇嘛。增兵千五百戍西藏。九年。第七世達賴喇嘛之父。公爵索木朗達爾濟病故。十五年。高宗舉行大婚典禮。賞給

回藏貢使。玉如意及御衣等物。十一月戊辰。旨諭第七世達賴喇嘛管格隆事公班第達及衛藏所屬番衆等曰。

前因珠爾默特那木札勒肆行暴虐。與達賴喇嘛爲讐。又荼毒所屬番衆。戕害伊兄。種種不法。駐藏大臣傅清等。日擊番衆人人怨恨。且恐其不利於達賴喇嘛。奏請辦理。朕本欲降旨令前往駐藏大臣班第達。會同達賴喇嘛。明正珠爾默特那木札勒之罪。以爲達賴喇嘛除患。且爲藏地番民除兇暴而抒公憤。設令駐藏大臣於接到此旨之後。遵照辦理逆黨。自不致擾亂。乃駐藏大臣傅清等。迫於事勢。未及奉到諭旨。卽行便宜誅戮。以致逆黨乘機倡亂。人衆驚惶。朕聞信卽降旨。遣四川總督策楞。提督岳鍾琪。統領官兵。前往安撫藏地。搜捕逆黨。此外一無所問。今據總督策楞等奏到。藏內近日情形。又據班第達奏稱。卓呢羅卜藏札什并其餘黨。以次就擒。藏地現已寧謐等語。朕心深爲欣慰。朱爾默特那木札勒罪惡昭著。藏地人衆。既可共洩讐怨。今餘黨就擒。地方安謐。自

可無庸派動大兵。致滋驚擾。故特諭令前所派官兵不必赴藏。提督岳鐘琪亦不令赴藏矣。惟令總督策楞赴藏。問候達賴喇嘛。及辦理一切事宜。班第達辦理此事甚屬可嘉。着加恩賞賜內庫緞疋。卽着派往大臣帶往。所有已獲餘黨。着牢固看守。俟總督策楞欽差大臣兆惠那木札勒班第等。公同查審。照內地之例。分別首從。惟誅首惡及附和爲惡者。其餘脅從人等。俱從寬概無誅及。所有擒獲逆黨之頭目人等。着班第查明。俟策楞到日。酌量賞賜。以示鼓勵。其劫奪銀兩。事甚微末。當擾亂之時。乘機攘竊。無從一一查究。轉恐累及無辜。其已追得者。交司員收貯。未得者免其查追。朕此番辦理。惟欲藏地永遠甯謐。敬奉達賴喇嘛。令人心悅服。達賴喇嘛班第達。將朕此旨通行。明白曉諭所屬番衆人等。令其安靜樂業。永享昇平。以副朕恩德綏懷之至意。

十六年。榮增師傅噶勒丹寺池巴諾們罕阿旺曲墊圓寂。旋奉諭旨。着委派噶倫四員。以助執行政務。十八年。札什倫布貢使來朝。十九年。堪布貢使來京。並賜佛

用器皿甚多。二十年。因體不適。由摺奉到諭旨云。

聞達賴喇嘛復染涼寒。現今朕望達賴喇嘛速得全愈。囑令章嘉呼圖克圖等。率領衆僧念經祝禱。所有達賴喇嘛將放朝講經等事。暫須停止。並宜好爲保養。

旋又奉諭旨云。

聽聞達賴喇嘛之病。尙未痊愈。朕心甚爲繫念。現已囑章嘉呼圖克圖暨在京喇嘛僧人。虔情念經。並派明醫四人。往送醫生。順便前往問候。專派大臣。已令刻日起程赴藏。

二十一年。章嘉呼圖克圖等抵藏。翌年。清廷平準噶爾。藏地始靖。

初。厄魯特世濟其兇。亦名扶黃教。自固始汗卽以此據衛藏雄諸部。及噶爾丹自藏歸。稱受博碩克圖汗之封於第五世達賴喇嘛。策妄那布坦破藏歸。復稱受寶權大慶王之封於僞達賴喇嘛。皆鑄鐵章梵文以賜。於是立固爾札廟於伊犁河北。

立海努克廟於河南。取所掠藏中供器實之。飯厄魯特喇嘛六千餘。供養以九集賽萬六百戶。其大喇嘛坐牀者四人。曰錫崙圖。其誦經室曰都綱。梵刹螺唄。幾將西藏大疑大計。皆就決焉。策妄那布坦、噶爾丹策楞、及那木札爾三世嗣位。皆請赴藏熬茶。誦經。每次費二十餘萬。清廷亦賜茶葉香帕。以助其施。達爾札達巴齊之得立。及與阿睦爾撒納之構釁。皆伊犁喇嘛爲之。阿睦爾撒納從清兵定伊犁。卽使人赴藏熬茶。祝己得四總部時。當振興黃教。又使固爾札廟喇嘛。請將軍必使己主伊犁。迨叛後。上疏清廷。猶以各大臣踞高坐。見喇嘛激變爲詞。劫奪喇嘛馬駝以遁。清軍進至伊犁。焚固爾札廟。初。固爾札廟三層繚垣。周一里許。當噶爾丹策楞時。以五集賽更番居此誦經。每歲首盛夏。準噶爾之衆。膜拜頂禮者。遠近咸集。其俗素奉黃教。往往捐珍寶。施金銀。以事莊嚴。廟之閔瞻。遂甲於漠北。至是被焚。復於乾隆二十九年。於熱河山莊東北岡阜。肖固爾札廟之制。營建新廟。勅賜曰安遠。集梵僧演步踏以慶歲事。

乾隆二十二年。由護送來藏吐爾扈特熬茶之人。致敕書並玉靶傘大緞等物。其年二月初三日。第七世達賴喇嘛在布達拉圓寂。享年五十。初高宗以達賴五十壽誕。特派大臣二人。賚祝書壽品來藏。至已圓寂。卽供壽品於金塔前。熬茶布施。飭命札薩克喇嘛阿旺邊覺呼圖克圖等來藏。賚到大哈噠二十方。念經哈噠六百根。織金大緞八疋。無金大緞十二疋。大緞一百疋。銀一萬兩。以作圓寂後之布施。並諭旨云。

着將七輩達賴喇嘛各額眞容。畫成佛軸七道。並須將各世護法等神。一併附畫妥協。開光後送京。欽此。

第九節 第八世達賴喇嘛

第八世達賴喇嘛。法名降白嘉錯。在後藏拖結拉熱扛地方。於乾隆二十三年出世。二十六年。迎至札什倫布寺。高宗勅令妥爲保護。並諭旨云。

達賴喇嘛乃係黃教領袖。不得視如尋常喇嘛。總須好爲侍奉。當派通曉經典。

喇嘛數人。常令在前隨侍。若能勤習經卷。庶與黃教有俾。着由班禪額爾德尼暨第穆呼圖克圖。會同揀選深通經卷之喇嘛數人。教授呼畢勒罕經卷。一面着班禪額爾德尼。與達賴喇嘛之呼畢勒罕講經授戒。旨派普爾覺阿旺降巴降孜曲吉喇嘛甲頃巴。阿旺曲札曲桑呼圖克圖二人。爲榮增師傅。

二十七年八月初十日。迎至布達拉坐牀。欽差喀爾喀親王策丹。並佐領果蟒呼圖克圖阿嘉呼圖克圖。以及司員等來藏。賜勅書暨器皿等物。二十九年。由堪布囊素回藏。賚到勅書珍品。由是年起。兩年一貢。三十年六月初四日。由第六世班禪額爾德尼傳授小戒。並賜大哈噠一方及綠玉如意嵌寶念珠等物。三十一年。欽差大臣及邊覺呼圖克圖。賚到勅書並御賜珍品。三十三年。第八世達賴喇嘛親至前藏攢招具奏。奉到珠批。

此次攢招。洵與朕心符合。實與振興黃教之事。甚屬可嘉。欽此。

隨在色拉布賚紉噶勒丹三大寺。登坐講經臺。宣衍經義。僧俗均皆歡忭。貢使堪布

囊素等回藏。賜器物甚多。三十六年。同前年呈進六旬萬壽貢品專使回藏。賜勅書珍品。四十年。因第八世達賴喇嘛患病。欽派醫生并司員等來藏。四十二年四月十五日。由第六世班禪額爾德尼。傳授格隆大戒。是年爲高宗皇太后升遐。欽派額爾德尼諾們罕堪布阿旺楚稱等來藏。賚到勅書御賜物。並賞給色拉布賚紉噶勒丹三大寺。熬茶銀一千兩。大小哈噠各一千。札什倫布寺暨其餘寺廟等共賞銀四千兩。小哈噠四千。茶一千甌。四十五年。高宗七旬萬壽。第六世班禪額爾德尼來朝祝釐。圓寂於北京。時第八世達賴喇嘛年已二十有二。尙未受封。至是班禪額爾德尼圓寂。乃於四十六年。欽差果蟒呼圖克圖札薩克堪布達喇嘛。並大臣司員等多官來藏。賚到勅書諭云。

爾達賴喇嘛今已年長。精通上乘妙典。爲慈航普渡。宣衍黃教。係屬釋迦牟尼佛所遺。凡於生靈。並無歧異。視如子嗣。覺悟普度。藉以靜安西方。欽此。

又金冊三十頁。上有漢滿蒙藏四體之字。文曰。獎賜西天大善自在佛統領天下釋

教普通瓦赤拉日拉達賴喇嘛。並頒金印一顆暨佛前用品。呈高宗七旬萬壽貢品。專使堪布回藏。賞賜各種器皿。第六世班禪額爾德尼貢使回藏。賜賞珍品。是年護送第六世班禪額爾德尼龕座之欽差大臣來藏。五月初一日。諭旨云。

茲據駐藏大臣奏稱。達賴喇嘛之巴噶克噶勒丹錫喀圖羅布藏丹巴圓寂。遺缺請與喇嘛噶青夷喜堅參。補放巴噶克一摺。並稱曾與阿旺楚稱會商達賴喇嘛近前。若有深通經典喇嘛常川勸導之時。裨益甚深等語。該噶青夷喜堅參。多年坐靜。練習經咒。是以精通黃教。又據章嘉呼圖克圖具奏前來。今達賴喇嘛亦請與伊補放巴噶克。甚屬要協。朕心喜悅。噶青夷喜堅參着補授隨侍。達賴喇嘛之巴噶克。並加恩賞給名號念珠哈噠大緞等物。着該大臣等。即將此情形轉告達賴喇嘛。並傳諭噶青夷喜堅參。勤謹隨侍達賴喇嘛。等因。欽此。四十八年。將訪得第七世班禪額爾德尼真正呼畢勒罕。情形具奏。賞賜玉器緞疋哈噠等物。四十九年。欽派大臣並果蟒呼圖克圖以及司員等來藏。頒賜玉如

意等物。賚到玉冊玉印。並奉諭旨曰。

若遇慶典事件。則鈐用玉印。其尋常之事。仍用舊印。欽此。

五十年。北京白塔寺塔頂。忽有哈唾。隨摺奉到好旨。是年札什倫布寺貢使堪布回藏。賚到玻璃所造經板。由駐藏大臣來藏時寄到。五十五年。特爲恭祝高宗萬壽。在前藏及其附近地方。新建寺宇內。由榮增班第達並僧人百名。於萬壽之期。念誦長壽經卷。祝禱萬福萬壽。奏明後。蒙高宗與新建寺院。賞賜榮壽寺四體字匾額一道。並御書四字匾額一道。是年。貢使堪布返藏。賚到佛軸一道。並滿文經典五部。奪迭滾却經六部。經板包袱絲繩鬚子全套。實用珠寶念珠暨其他器皿等物。五十六年。因呈進八旬萬壽貢品。專使堪布返藏。賜佛用器皿甚多。

是年。廓爾喀進兵。茲擾藏屬地方。初。乾隆四十五年。高宗七旬萬壽。第六世班禪額爾德尼來朝祝釐。圓寂於北京。翌年春。舍利金龕西歸。清廷所賜賚。在京各王公及各番蒙所供養。其徒擁之歸者。無慮數十萬金。而寶冠瓔珞念珠。晶玉之鉢。鏤

金之袈裟。旃檀華旛磁茗采帛珍珠。不可勝計。仲巴呼圖克圖者。第六世班禪額爾德尼之兄也。爲班禪額爾德尼治商上事。遂盡有其財。雖其弟沙瑪爾巴。亦以習紅教。不得分惠。於是沙瑪爾巴垂涎不遂。憤唆廓爾喀引之入寇。時第八世達賴喇嘛年少。駐藏大臣巴忠。四川總督鄂輝。四川將軍成德等。復調度賄和不敢戰。於是廓爾喀無忌。飽颺而去。五十六年七月。廓爾喀復擾後藏邊界。占據聶拉木。圍困噶倫。誘執噶倫丹津班珠爾以歸。駐藏大臣保泰。一聞賊至。卽於八月十六日。移第七世班禪額爾德尼。由羊八井北路。奔赴前藏。八月二十日。廓爾喀擾至札什倫布寺。該寺負山面海。形勢鞏峻。且有喇嘛數千。乘墉而守。可以待援。而仲巴呼圖克圖於十九日夜挈資先遁。濟仲喇嘛與札蒼堪布喇嘛等。復託言卜之於吉祥天母。不宜戰。衆心遂潰。僧俗紛紛逃避。廓爾喀大掠札什倫布。西藏大震。八月二十六日。第七世班禪額爾德尼抵前藏。駐錫布達拉。時敵勢張皇。保泰又奏請移第八世達賴喇嘛於西甯。移第七世班禪額爾德尼於泰寧。擬棄藏地。達賴喇嘛班禪額爾德尼均飛

章告急。時巴忠爲侍衛。從高宗在熱河。聞變畏罪。自投水死。鄂輝猶爲四川總督。因盡以罪委忠。曰。彼解圖伯特語。故皆其一人之所私議。吾二人不知也。成都將軍奉到御賜珍珠念珠一串。賞給第八世達賴喇嘛。復又奉到諭旨曰。

駐藏大臣二人。將達賴喇嘛班禪額爾德尼。迎至察木多。欲將布達拉交於賊手。達賴喇嘛於此大事。乃能定斷。住居布達拉。甚屬可嘉。今達賴喇嘛及黃教爲重。擬派天兵萬餘。剿辦廓番。所需軍糧。撥給銀數百萬兩。等因。欽此。

高宗以衛藏爲皇祖皇考戡定之地。久隸職方。僧俗人等。胥霑醲化。百有餘年。況其處爲歷輩達賴喇嘛班禪額爾德尼駐錫之地。蒙古番衆素所崇奉。及聞廓爾喀擾亂後藏。保泰失職東竄。勅諭鄂輝等到藏。將保泰喚至第八世達賴喇嘛第七世班禪額爾德尼前。對衆眼同傳旨。重責四十板。再行枷號。仍將諭旨內。指出保泰種種貽誤緣由。向達賴喇嘛班禪額爾德尼濟隴呼圖克圖及各呼圖克圖大喇嘛等。明白宣示。十一月癸酉。旨派福康安帶領巴圖魯侍衛章京等統領勁兵進剿。福

康安等自馳抵後藏。卽整兵進勦。於擦木邦杏連獲勝仗。以次復濟隴。攻克熱索橋。協布嚕東覺集木集等處。所向克捷。深入廓爾喀境數百餘里。其酋拉特納巴都爾及伊叔巴都爾薩野。畏懼潛伏。將上年裹去之噶倫丹津班珠爾等送出。差大頭人朗穆幾爾幫哩等四名。赴營遞稟乞降。並以此次擾至後藏邊界。皆由誤聽沙瑪爾巴指使。本欲將首謀喇嘛送出。適先病斃。五十七年三月二十三日。高宗旨諭駐藏大臣云。

仲巴呼圖克圖。在札什倫布廟內。一聞賊至。卽行逃避。應令押解赴京。另行酌量安插。至札蒼喇嘛羅巴藏策登等四名。係隨同羅巴藏丹巴。占卜惑衆。案內應行解京要犯。並着孫士毅。一並派員解京。欽此。

七月二十七日。廓爾喀又差頭目塔曼薩野。前赴軍營。投遞稟帖。繳出前此搶掠札什倫布寺銀物等件。暨從前頒賞班禪額爾德尼之金冊。呈獻沙瑪爾巴骨殖。並備辦貢品。馴象番馬及廓爾喀樂工。一併呈進。高宗既定西藏。仍以番兵三千。漢

兵蒙古兵一千。戍西藏。自是駐藏二大臣之行事儀注。始與達賴喇嘛班禪額爾德尼平等。其四噶倫及番目缺。均由駐藏大臣與達賴喇嘛會同選授。定商上喇嘛銀錢出入之額。與春秋巡查鄂博之制。於是事權始歸一。

是年。高宗使御前侍衛惠倫。乾清門侍衛阿爾塔錫第。齎金本巴瓶來藏。於十一月二十日抵拉薩。恭送金本巴瓶於向來唵誦伊羅爾經之大昭佛樓上。至尊宗喀巴佛前。敬謹供奉。選派誠實喇嘛。專司看守。以昭誠肅。並令拉穆吹忠內噶瓦東薩穆葉等四人。俱使其熟習經典。試驗降神之法。設遇達賴喇嘛班禪額爾德尼示寂後。吹忠等四人。須認真作法。尋覓實有福相聰慧之呼畢勒罕。指出數名。將其姓名生年月日。各寫一籤。貯於欽頒金本巴瓶內。揀選熟習經典喇嘛。虔誠誦經七日。傳知各呼圖克圖喇嘛等。齊集佛前。駐藏大臣親往監視。凡達賴喇嘛班禪額爾德尼之呼畢勒罕。卽仿互爲師弟之義。倘吹忠四人所指皆同。惟一呼畢勒罕出世者。擬寫名籤一枝。另加空籤一枝。入於瓶內。如法誦經。若對衆掣出空籤。則名籤之呼

畢勒罕。並非真確。是以不爲佛佑。卽別尋呼畢勒罕。另行籤掣。以杜吹忠等串通妄指之弊。籤上須寫漢滿藏三體字。使大衆一望而知。不致爲所蒙混。至前後藏各大呼圖克圖之呼畢勒罕。亦令駐藏大臣。監同達賴喇嘛。照例掣籤。方可定籤。其餘如察木多類烏齊等處呼畢勒罕。距藏較遠。所出之呼畢勒罕。非大呼圖克圖可比。向來不由藏地吹忠指認。仍照舊令其徒衆自行尋覓。

五十八年。清廷將廓爾喀收歸版圖。呈表謝恩。五十九年。賞賜御物。轉旨駐藏二大臣云。

此次廓爾喀擾亂西藏。釀事爲首之人。已經福中堂和總督生擒。着將此喜信。轉達賴喇嘛和班禪額爾德尼。且福中堂往勦廓番之時。與達賴喇嘛和睦等語。朕聞甚屬欣悅。是以特降此旨。着與廓番通信。等因欽此。

嘉慶元年。貢使堪布返藏。敕賜佛器甚多。四年。奉到諭旨云。

前大行皇帝龍馭上賓之時。聞達賴喇嘛甚屬憂愁。親往大昭燃燈。飭令僧人

數萬念經。實屬可嘉。特賜極長哈唾。並差欽差熬茶。札薩克喇嘛格勒朗卡。堪布達喇嘛甲木養模郎。大臣二人。司員筆帖式來藏。賚到御賜物品。

五年。仁宗諭旨第八世達賴喇嘛曰。

准達賴喇嘛所請之訪尋已故榮增班第達出世幼子等語。茲加恩着卽訪尋已故榮增出世之子。俟訪獲後。繕寫名籤。入於金瓶掣定。作爲榮增班第達夷喜堅參出世之呼畢勒罕。迎至崇壽寺。俾與黃教有益。此乃朕振興佛教之意。欽此。

六年。由第七世班禪額爾德尼至拉薩。傳授大戒。仁宗諭旨曰。

聽聞章嘉呼圖克圖安抵前藏。所有章嘉經典。預須如前輩一般。着達賴喇嘛妥爲傳授。

八年。第八世達賴喇嘛之親族公饒丹朗結病故。九年。第八世達賴喇嘛患痘。於十月十八日。在布達拉圓寂。享年四十有七。旋奉諭旨曰。

達賴喇嘛爲衆呼圖克圖領袖。現在忽聞圓寂之信。朕心甚惜。今派大臣恭賚賞品赴藏。並着噶勒丹錫喀圖呼圖克圖并敏珠爾呼圖克圖。在雍和宮並各寺內。選擇一寺。認真念誦經卷。稍盡朕心。並賞銀五千兩。莽緞二十疋。大緞一百疋。大哈噠二十。小哈噠三百。

第十節 第九世達賴喇嘛

第九世達賴喇嘛。法名隆哆嘉錯。於嘉慶十年乙丑十二月初一日。在康巴墊曲科地方轉世。爲春科土司丹怎吹忠之子。始生卽喚母名。念經數句。歷六越月。卽能舉步行動。至八越月。遂能言語。看見根敦珠巴佛像。言云。此乃我身。一日。忽言。距此迤東。有我之寺院。隨往東方水邊。到一大石之前。言云。是此均見石上有熱松貢布佛經咒。本處老人均皆記憶。又言。聽得布達拉鐮鉢之聲。陸格協熱亦在彼處。我係阿旺羅桑嘉錯之身。至迭斯桑結甲木養札巴奪吉堅參。均在我之寺院。係熱沃德青所言。概係第五世達賴喇嘛在世之事。并能認識前輩所用各器。是以僧俗大

衆均皆誠心信服。第七世班禪額爾德尼亦歡喜禮敬。十三年正月十八日早晨。忽言清帝與我降有恩旨。時清駐藏大臣玉寧見此瑞應。乃奏請認爲第九世達賴喇嘛之眞正呼畢勒罕。不必用金本巴瓶故事。仁宗允之。十三年隨摺奉到諭旨云。

現在若能自知爲五輩達賴喇嘛之身。卽屬不昧前因。認識前輩所用各器。實屬毫無錯誤。猶如大行皇帝在位之事。允宜優加鴻仁。毋庸入瓶籤掣。卽作爲達賴喇嘛之呼畢勒罕。着賞賜大哈噠長壽佛寶石念珠鈴杵等項。交欽差將軍迅速齎藏。

並定九月二十三日坐牀。旋奉諭旨云。

所奏達賴喇嘛之呼畢勒罕。於九月二十三日坐牀。詢屬吉祥之事。着照辦理。屆時再命大臣恭齎賞品。至達賴喇嘛之呼畢勒罕。雖僅四歲。來往一切。預須妥爲備辦。備得觀瞻。着加恩准用黃轎。前輩達賴喇嘛所得金印。於坐牀後。謝恩奏書。准其蓋用金印。欽此。

嗣後披剃取名。第九世達賴喇嘛言云。今已受戒爲佛教之首。係三寶佛恩德。應往各寺佛尊之所。遞呈哈唾。隨引父母親到各佛前。並逐一指告。此係何佛。指示明白。是日見四方祥雲捧日。又見祥雲聚成旛幢旗彩。汝結賽呼畢勒罕改桑吐布丹濟克美甲錯。第穆呼圖克圖羅布藏吐布丹濟克美甲磋二人。補授榮增師傅。具奏後隨摺奉到諭旨云。

着賞給汝結賽呼畢勒罕諾門罕名號。

同年八月。給第九世達賴喇嘛之父敏珠爾奪爾濟策結頭品頂戴。又來藏安牀欵。差哈拉沁親王等來藏。寄來御賜佛品。九月二十三日。在布達拉安牀。頒賞御物甚多。十八年。由第七世班禪額爾德尼傳授小戒。年至十一歲。於嘉慶二十年乙亥二月十六日。在布達拉圓寂。旋奉諭旨云。

查達賴喇嘛爲各呼圖克圖領袖。坐牀未久。遽行圓寂。深加悼惜。着在靈前燃燈念經。並賞給熬茶銀五千兩。由西藏銀庫撥給。轉交第穆呼圖克圖。先行作

善。至緞疋哈噠。再當派專員賚藏曇花一現。遊戲人間。不勝慨然也。

第十一節 第十世達賴喇嘛

第十世達賴喇嘛。法名楚珍嘉錯。於嘉慶二十一年丙子。在裏塘仲奪地方轉世。是日祥雲聚於房頂。並各吉祥徵兆極多。誕生之屋木柱。忽見流乳。房內忽有丸藥撒地。言語行動。均與凡人迥異。洵屬不昧前因。預示前事。聰慧穎悟。凡閱看經卷。卽能背誦。於道光二年壬午正月十五日。由二駐藏大臣奏明入瓶籤掣。於三月三十日。奉到諭旨云。

據駐藏大臣等奏。稱訪尋達賴喇嘛之呼畢勒罕之幼子三人。入瓶掣出。裏塘番民洛桑捨札之子改桑堅參。徵兆洵屬吉祥。實係達賴喇嘛轉世之身。僧俗大眾。均皆誠心信服等語。朕心甚覺欣悅。茲發去呼畢勒罕哈噠一方。長壽佛一尊。珊瑚念珠一串。着卽轉發祇領。至達賴喇嘛定於八月初八日坐牀。着該大臣與成都副都統以及章嘉呼圖克圖等。會同照料。屆時再行賞賚等因。欽

此。

並賞給第十世達賴喇嘛之父洛桑捻札頭品頂戴。六月十八日諭旨云。

所請噶勒丹錫喀圖薩瑪第巴着授爲榮增大師傅。舊任噶勒丹池巴阿旺捻札及榮增班第達降擺夷喜丹貝堅參二人補放副榮增師傅。

又奉諭旨云。

從前達賴喇嘛之呼畢勒罕坐牀。曾准鈐用金印。今達賴喇嘛坐牀。於謝恩奏書。仍准鈐用金印。

是年八月初八日。欽派駐藏大臣成都副都統以及章嘉呼圖克圖等。賚到坐牀並賜御物。四年。第十世達賴喇嘛之父頭品頂戴洛桑捻札。病故頒賞。並賞給第十世達賴喇嘛之親改桑彭磋頭品頂戴。八年。生擒叛逆張格爾。經囊索洛桑稱勒恭代。第十世達賴喇嘛由部呈進謝恩。十四年。由第七世班禪額爾德尼。傳授第十世達賴喇嘛格隆大戒。是年七月初一日。諭旨云。

達賴喇嘛。班禪額爾德尼。哲布尊丹巴呼圖克圖。前輩均蒙加恩。賞有黃圍幔。黃車黃轎。着於坐牀事畢。撤去呼畢勒罕字樣。

八月初八日。旨賞。

第十世達賴喇嘛大榮增師傅薩瑪第巴前賞四字名號之上。今着加賞二字名號。次榮增師傅降擺夷喜丹貝堅參。着加恩賞給諾們罕名號。小榮增師傅噶勒丹池巴阿旺曲批。着賞給班第達名號。

十五年。皇太后六旬萬壽之日。第十世達賴喇嘛親赴大昭。與色拉布賚紉噶勒丹三大寺。熬茶布施。並前藏大昭攢集僧衆。虔誠念誦長壽經。十七年丁酉九月初一日。在布達拉圓寂。享年二十有二。

第十二節 第十一世達賴喇嘛

第十一世達賴喇嘛。法名克珠嘉錯。於道光十八年。在噶達地方轉世。徵兆極靈。先是第十世達賴喇嘛於新派噶達堪布阿旺嘉磋起程。與達賴喇嘛辭行摩頂。

第十世達賴喇嘛與堪布笑。給磁器靶碗。持至噶達。以作將來徵兆。誕生前一年。噶達地方忽生向來所無之青黃花。過冬不萎。復於該處寺院。又生歷未看見之花。一枝上有花三朵。房前水井內均見彷彿有各色牛羊。又見寺院樓頂。有五色祥雲。似此吉祥徵兆。僧俗見者甚多。於道光十八年九月初一日寅時誕生。是日自早晨起。皆見祥雲聚成旛幢等形。至幼孩常言准備行裝到我寺院。又向衆言云。看見觀世音菩薩之像。此乃我身所化。凡見前世所供僧俗人等。逐一均能認識。又常誦經卷。見商上迎請之人前來。甚覺喜悅。是日噶達寺作會。遞呈哈噠之際。又見祥雲聚成彩旛。有金川大世家。隨帶從役人等。晨早前來。見面摩頂。迨至晚間辭行。所帶人役更多。凡早間已摩頂者。均能分別清楚。雖朝見人多。毫無怯意。即使延擱。亦無疲倦。由噶達起程回藏之日。均見種種白色祥雲。行至裏塘言云。此地係我家鄉。所言均係第七世達賴喇嘛轉世之事。並能認識第七世達賴喇嘛在裏塘所建佛尊。寺壁所畫布達拉。用手指與衆人觀看。言云。此係西藏觀世音菩薩駐錫之所。問或觀看。

天上所言均與歷世達賴喇嘛所行事件相符。是以衆皆誠心信服。當同第七世班禪額爾德尼與駐藏大臣孟海。認識前世所用器皿。當將情形具奏。

二十一年五月二十五日。在大昭高宗容前。入於金本巴瓶掣定。是日布達拉樓頂。祥雲聚彩。吉祥徵兆甚多。隨由第七世班禪額爾德尼披剃授戒。經駐藏大臣孟海。將入瓶掣定情形具奏。謂訪獲弱子四名。當同衆人。入於金本巴瓶。掣出噶達。番民策旺頓柱之子朗迥奪吉。實爲第十一世達賴喇嘛之呼畢勒罕。洵與黃教有俾。僧俗大衆。莫不歡忭等語。旨准。賞給哈達一。長壽佛一尊。鈴杵一份。珊瑚念珠一串。二十二年四月十六日。旨令安牀。册印飭理藩院另頒。並着直隸陝西四川各總督巡撫。會派道員知府副將參將等官。妥爲護送。並賞庫銀一萬兩。九月初九日。奉諭旨云。

孟達奏前輩達賴喇嘛所得金印。着訪獲呼畢勒罕坐牀後。准其鈐用。並加恩。照前准用黃轎黃韁黃圍幔等項。

坐牀之時。自薩木丹起程。晨早降雨。天晴霽後。見五色祥雲甚多。至午刻。又見祥雲聚頂。行抵布達拉之日。彩雲聚成旛幢等形。十月初二日。旨封。

達賴喇嘛之父策旺頓柱。應行隨侍達賴喇嘛。着加恩賞給公爵。

二十三年正月初六日。旨勅云。

昨章嘉呼圖克圖由藏到京。朕詢問現在達賴喇嘛面容經學如何。據稱甚屬聰慧靈妙等語。所有達賴喇嘛爲黃教領袖。凡西方生靈。均蒙護庇。朕心甚屬欣悅。刻下達賴喇嘛年甚幼小。更宜認真勤習黃教。並着隨侍之人。於飲食起居。一切小心認真。着將此旨。傳知噶勒丹錫呼圖薩瑪第巴等。須知達賴喇嘛身體緊要。務須留心認真侍奉。好爲傳教經典。以昭朕維持黃教之至意。

二十四年。駐藏大臣奏革噶勒丹錫呼圖薩瑪第巴諾們罕。其人初名阿旺禮布巴勒楚勒齊木。洮洲人。先時在京師。以第十世達賴喇嘛圓寂至藏。並受勅封。向例。達賴喇嘛圓寂。以班禪額爾德尼。或濟隴呼圖克圖第穆呼圖克圖及諾們罕等代理。

呼圖克圖較尊。諾們罕次之。噶勒丹錫峰圖薩瑪第巴諾們罕。前後代理達賴喇嘛事二十餘年。跋扈不法。第十世達賴喇嘛圓寂。藏人洶洶。言其咒詛。堪布及衆喇嘛。群訴於駐藏大臣。事無左驗。莫能究也。有不服者。更以抵罪。因之益驕。黨羽日衆。厚結大臣以自固。至是敗竄黑龍江。宣宗諭旨。

着濟隴呼圖克圖。並降孜曲吉羅布藏崙珠。補放正副榮增師傅。

二十六年四月初七日。第七世班禪額爾德尼。傳授第十一世達賴喇嘛小戒。並賞佛器。三十年。皇太后升遐。念經作善。旨勅賞給三大寺等各寺茶銀等物。宣宗龍馭上賓。頒旨赴藏。並施各物。

咸豐二年。遣貢品專使巴雅爾堪布降曲丹批。恭賀文宗登極。呈進奏書。回賜御物。第十一世達賴喇嘛按據前世例規。恭祝文宗萬福萬壽。並黃教興旺。親往布賚。綳色拉噶勒丹三大寺及瓊科爾結等處寺廟。燃燈講經。熬茶布施。三年。第十一世達賴喇嘛特爲廣西軍務。念經解息刀兵。四年諭旨云。

德柱寺呼圖克圖充任噶勒丹池巴羅布藏青饒汪曲。補充正榮增師傅。汝結賽呼畢勒罕阿旺羅布藏拖美丹增甲錯。補放副榮增師傅。

五年。文宗諭旨云。

達賴喇嘛現已年長。着卽管理政務。並准其使用第八輩達賴喇嘛所得印信。是年正月十三日。掌管政教事務。十二月二十五日。在布達拉圓寂。享年一十有八。當經駐藏大臣具奏。奉諭旨云。

滿慶奏稱達賴喇嘛突然圓寂。朕心深屬悼惜。加恩着滿慶。卽於達賴喇嘛靈前賜奠。由藏着賞銀五千兩。

旋欽派章京來藏。賚到御賜團龍絁緞二十疋。大緞一百疋。大哈噠二十。小哈噠三百。

第十三節 第十二世達賴喇嘛

第十二世達賴喇嘛。法名勤勒嘉錯。於咸豐六年丙辰。在沃卡俱卓地方轉世。

是年冬季。牆園內忽生樹木。上有五朶花枝。生產之時。見兩手合掌下地。卽能在地盤膝。右足心有紫黑喙字之形。房柱牆壁。或見流有露水。又南邊窗外見有婦女。身佩全副首飾。來往房內。石梯上。一日留有脚印。此石現供布達拉。徵兆甚屬吉祥。於咸豐八年正月十三日。駐藏大臣滿入於金本巴瓶掣定。四月十二日。奉諭旨云。

達賴喇嘛之呼畢勒罕。經滿慶奏稱已訪獲。今於金瓶掣出沃卡俱卓。彭錯策旺之子足美丹增甲錯。徵兆靈異。實係真正呼畢勒罕。大眾均皆歡喜等語。甚屬可嘉。

九年。第十二世達賴喇嘛之呼畢勒罕。擇定於七月初三日。在布達拉坐牀。勅賜御物。並賞給第十二世達賴喇嘛之父彭錯策旺。公爵頂戴。十年七月初三日。賚賜敕書。並御賜大佛軸及銀一萬兩。旋奉諭旨云。

准第十二世達賴喇嘛撤去呼畢勒罕名號。

副榮增師傅汶結賽呼圖克圖辭退。遺缺於同治元年。蒙與普爾覺沙布隆羅布藏

楚稱隆白甲磋。補放榮增師傅。掌辦商上事務。略徵阿齊圖呼圖克圖阿旺夷喜楚。稱堅參。因布施事。聯合色拉寺。與布賚綳噶勒丹兩寺。不勝。攜印潛逃。赴京。詔黜其名號。命諾們罕汪曲結布。協理商上事務。汪曲結布原係俗裝。曾任噶倫之職。因與略徵忤。辭官。薙髮爲僧。至是復起用。乃創修拉薩城垣。自西而東。工未竣而沒。遂罷役。

三年四月十三日。由榮增正師傅舊任噶勒丹池巴。德柱寺呼圖克圖羅布藏青饒汪曲。爲第十二世達賴喇嘛傳授小戒。並勅賜漢滿蒙藏四體福田妙果匾額一道。四年。勦平瞻對西番。貢布朗給鑪關上下。均獲安靜。奉旨將上中下三瞻地方。賞給第十二世達賴喇嘛管轄。建寺焚修。五年。第十二世達賴喇嘛坐牀事畢。派貢品專差堪布羅桑稱勒獻貢。賞給第十二世達賴喇嘛之兄伊喜洛布汪曲公爵。世襲罔替。復賞戴花翎。六年。駐藏大臣奏請前輩達賴喇嘛所得冊印。免其呈繳。此後歷輩邀懇從新頒給。七年。第十二世達賴喇嘛熬茶作善。由布達拉親至大昭。攢集

色拉布賚紉噶勒丹三大寺。寺僧二萬餘名。恭祝清帝萬福萬壽。國政興旺。黃教順利。生靈均獲清平。又因內地洪楊之肆擾。由第十二世達賴喇嘛念誦經卷。解消刀兵。頒賜御物。九年。第十二世達賴喇嘛按照前世例規。親往布賚紉色拉二寺。熬茶佈施。講經祝禱。十二年。第十二世達賴喇嘛年至十八歲。於二月十四日遵旨。掌管教政事務。並前世達賴喇嘛所得玉印玉冊。凡遇吉祥呈進奏書。蓋用玉印。尋常用件。仍用舊印。並諭旨云。

達賴喇嘛榮增師傅。着與噶勒丹池巴札巴頓柱補放。

第十二世達賴喇嘛傳受大戒事畢。十三年。親至前藏攢招。旋奉諭旨云。

達賴喇嘛親往噶勒丹及瓊科爾結一帶熬茶作善。實係認真化導愚番。朕心喜悅。着照案揀派漢官兵丁前往。小心護衛。

光緒元年。親至大昭。攢集衆僧念經。是年三月二十日。在布達拉圓寂。享年二十。駐藏大臣具奏清廷。奉諭旨云。

希奏達賴喇嘛現已圓寂等語。查達賴喇嘛爲黃教之首。今受戒未久。遽爾辭世。令朕深爲悼惜。希卽於達賴靈前賜奠。並由藏庫撥銀五千兩。轉給祇領。至每年所賞一千兩。茲達賴雖已圓寂。仍着一併賞給。以示優眷。

四年。欽差章欽等至藏。賚到賞賜粧緞及各色大緞二十疋。大緞一百疋。大哈噠二十。小哈噠三百。

第十四節 第十三世達賴喇嘛

第十三世達賴喇嘛。法名阿旺羅桑圖丹嘉錯直占旺楚雀賴藍布爾解旺德。於光緒二年丙子五月初五日。在達布甲擦營官屬下朗頓家轉世。初。第十二世達賴喇嘛圓寂時。面向東南而逝。嗣將靈位移至大殿。安置鹽中。面容朝南。其時並無一人移動面容。復自行轉向東南。各情形。均經榮增師傅普爾覺呼圖克圖及其隨從人等。共知共見。維時大衆喧傳。呼畢勒罕應在東南轉世。既由商上求降桑葉寺兩護法神。亦向東點頭行禮。拋遞哈噠。又向第八世班禪額爾德尼卜算。諭云。第十

三世達賴喇嘛之呼畢勒罕。若能於東南方出世。實與衆生有益。此外凡於各佛鎮教護法佛先後所卜問。亦云東方及東南出世等語。均屬符合。且商上鎮教箭頭寺大護法。在達賴喇嘛靈前舉行夏祀。並遇神在之日。節次降神。皆望東點首爲禮。拋遞哈噠。諭云。中心所祀之事。其果定能結於東南。繼又諭云。門前流水不斷。後山形如傘蓋等語。嗣後光緒二年。奉到箭頭寺護法諭云。主佛出世之地。前已略示等諭。復因布賚紉寺衆僧朝見之時。與掌辦商上事務通善。濟嚨呼圖克圖。並布賚紉寺領袖喇嘛呼畢勒罕衆僧人。以及商上供職僧俗番衆等。諭云。吾等主佛出世之處。從此起必在迤東。父名工噶。母名竹瑪之家。爾等須選清正誠信可靠之人。前往尋訪。必有應驗。吾神自能護持。隨卽請示地域。據云。迤東及東南方。自打箭爐關以下。遠近各地。開列明白。可否差派格昔喇嘛往查。去後奉到諭云。着派上溫都遜寺舊堪布羅布藏達爾濟。親往藏東瓊科爾結地方。在拉莫神母前。念誦剛瓦經十萬遍。虔情祈禱之後。往視海中。自有靈異等語。當卽差派上溫都遜寺舊堪布。帶領僧人。

由藏起程。在瓊科爾結神母附近之處。念誦剛瓦經十萬遍後。往視佛母海。時值九月。恐海水凍冰。迨至往看。並未成冰。得見海水甚清。有一村東西甚長。東邊田地。東北方有一舊古塔。東南牆圍內。四方小院。三層房樓一座。又見古塔與房院中間接連。皆屬房屋。後見海水大半成冰。南角見騎馬之人甚多。均向東走。或覺往西來往。迨至古塔及房寨。雖被冰封。而冰上仍存其影。後見冰如明鏡。又見兩邊房屋狹小。并有草廠。其地極長。當即念經祝禱。即於十月初三日寅刻。夢見自身在於兩邊房中行走。迨走出房屋。又有數房。看見有一向南小院。見男女兩人。懷抱一小孩。言云。此乃達賴喇嘛化身。當即轉抱在懷。即以手指指着堪布臉面額鼻言云。我生已五月。然此刻不可遽離父母。且易令人知覺。聲音清朗。該堪布在彼。將經妥協念畢之際。旋由瓊科爾結營官投遞駐藏大臣夷稟內稱。訪得藏東達布朗頓家。父名工噶仁青。母名洛桑竹瑪。於丙子年五月初五日。太陽出山。得生一子。其時樓上現出彩雲旛幢等項。於乙亥年七月初三日。在本家油廠內。包裹酥油。皮包及裝所雖作一

樣。忽見包內酥油自行外溢。門前向有梨樹數株。九月間。一株忽開花。枝葉甚繁。本處男女諸人。均屬眼見。樓頂常有祥雲。以及別項吉祥徵兆甚多。當由舊堪布羅布藏達爾濟。親往朗頓途間。看見一切。與海中所睹。均皆符合。迨抵朗頓。見房後山形如傘。門前流水。並父母名譯。均如箭頭寺護法卦諭。海中所見古塔形影。亦甚相同。查其幼孩品貌行爲。洵屬異常靈妙。見人毫不拒怯。抱捉懷中。卽用手在於臉鼻指畫言云。吾生已至五個月。暫不可離開父母及遽行告知外人。一切皆與夢合。堪布當時言云。可否進藏。彼聞言覺得甚喜。隨後又言。吾欲告辭進藏。嗣後再會。其意甚悅。旋經掌辦商上事務通善濟囉呼圖克圖。并商上供職僧俗番官。齊集言云。箭頭寺護法觀此呼畢勒罕。業已如各佛神及大護法卦諭。所叙出世地方父母名譯。並一切無差錯。所有尋獲達布朗頓所生幼孩。實係真正呼畢勒罕。徵兆洵屬吉祥。當由護法向東南跳舞。點頭行禮。拋遞哈噠。并諭云。而今既已尋得眞佛。爾僧俗諸人。猶須傾心信服。則吾神亦當認真維持等語。惟因事關重大。班禪額爾德尼並掌辦

事務通善濟。嚙呼圖克圖。又在各處護法神等處卜問。奉到卦諭。均言達布朗頓地方所生幼孩。實係第十三世達賴喇嘛之真正呼畢勒罕。不可稍有猶豫。諸處卦諭。均屬相同。且呼畢勒罕日覺成長。體貌出衆。於十月二十五日。爲至尊宗喀巴佛法會之期。晨早。彩雲數道。結連聚於樓頂左右。本地男女。均皆覩見。於光緒三年正月二十五日。生長如珍珠般下牙二顆。身上別無痕跡。兩足心有諸般之輪形紋。手足指生出明亮小包。髮黑而亮。頭頂有長白髮一根。間能言語。站立兩手維持。亦能舉步。素日祇有欣喜之色。未見惱意。見人自會摩頂。三月二十五日。朗頓樓上見有寶頂帳房。房側向有核桃樹一株。稱舅舅核。是日午後。忽見樹上棲有大白鳥一隻。旋即騰翅飛往南方。繼又返回。繞房樓三匝。於是向西飛去。本處老人等言云。達拉岡布神山之上。現出佛星之說。今此幼孩能認前輩所喜之物。惟年歲甚幼。而一切靈徵異兆。迥與素常不同。闔藏僧俗。無不傾心信服。當由駐藏大臣將前因上奏。謹查得工噶仁青之子羅布藏塔布克甲木磋。若蒙免其入於金本巴瓶籤掣。卽作爲第

十三世達賴喇嘛之呼畢勒罕。在於布達拉坐牀時。則西方生靈無不感怵鼓舞。心滿意足。庶可期其昇平之福。隨於光緒三年。由第八世班禪額爾德尼會同掌辦事務通善濟隴呼圖克圖。并色拉布賚繡噶勒丹三大寺。以及札什倫布商上供職僧俗番官等。公同叩稟。旨覆允許。

四年正月十二日。在貢湯德娃尖寺。由第八世班禪額爾德尼剃髮授戒。取定法名阿旺羅桑圖丹嘉錯直占旺楚雀賴藍布爾解旺德。五年六月十三日。迎至布達拉坐牀。補放濟隴呼圖克圖阿旺班墊曲結堅參爲正榮增師傅。奉諭准其使用玉冊金印。以及黃轎黃鞍黃韁黃圍幔。賜黃哈噠一。佛一尊。念珠一串。鈴杵一份。并賞給第十三世達賴喇嘛之父工噶仁青公爵。寶石頂戴花翎。按照定章。於是取銷呼畢勒罕名號。八年正月十三日。榮增師傅通善濟隴呼圖克圖。爲第十三世達賴喇嘛傳授小戒。教授經典。十一年。第十三世達賴喇嘛親至藏攢集大昭。爲國祈福。十四年。第十三世達賴喇嘛之父公爵工噶仁青出缺。賞給與達賴之兄頓柱奪吉。

公爵。寶石頂戴花翎。親往布賚綳色拉二寺念經。十五年。第十三世達賴喇嘛親赴前藏攢招。集衆僧念經。爲國祈福。

二十年。第十三世達賴喇嘛之榮增師傅第穆呼圖克圖。奏請清廷。與副榮增師傅普爾覺沙布隆羅布藏楚稱降白甲磋。補放正榮增師傅。并與布賚綳寺沙布隆羅布藏隆朶丹增稱勒。補放副榮增師傅。二十一年正月十一日。在於正榮增師傅普爾覺沙布隆羅布藏楚稱降白甲磋前。承受大格隆大戒。是年。第十三世達賴喇嘛已十八歲。於十一月初二日。遵照定制。掌管西藏教政事務。并前輩所得玉冊玉印金印。二十四年。因瞻對與明正成訟於明正土司。乃將三瞻地方。賞給第十三世達賴喇嘛管理。親赴色拉布賚綳噶勒丹三大寺。熬茶講經。恭照至尊宗喀巴佛遺經。認真宣衍。並照第五世第七世達賴喇嘛舊規。會集數萬格昔。講宣黃教眞經。燃燈熬茶布施事畢。仍回布達拉。

俄屬西伯利亞。爲布里雅德族所居。因鄰外蒙。俗尙佛教。其喇嘛常往來於蒙



藏各地。時有多爾智者。布里雅德族也。穎敏有才。深通俄蒙各語。俄皇優遇之。賜勳章。給巨資。命往西藏留學。學識超衆。被選爲第十三世達賴喇嘛之讚尼。讚尼者。問答之意。卽達賴喇嘛問答之教師也。先是。黃教未來。記某喇嘛豫言。異日佛教紊亂。將底滅亡時。北方之國。有佛法大王出世。統一之。此時多爾智卽指俄皇爲北方佛法大王。常告以英國將來侵略西藏之可畏。中國政府不足恃。惟俄國是將來佛教之唯一保護國。爲教旨。且指示俄國版圖。與黃教經文之豫言。以證明之。日後第十三世達賴喇嘛之欲親俄。卽本乎此。俄人陶什夫。佛教徒也。常往來於拉薩與聖彼得堡之間。覩西藏深仇英人之奪取哲孟雄。於二十四年。攜俄皇所饋之珍寶。赴拉薩。勸第十三世達賴喇嘛聯俄以親邦交。謂中國方懾於英人威權。已不足恃。倘藏民無力禦外。勢必受英人虐待。將見廢宗教奴人民。後患何堪設想。倘乘此時。求援於俄。俄必能盡力驅逐英人在藏之勢力。且可勸令俄皇信佛教。俄皇信。斯全俄人民俱皈依佛法矣。二十五年。陶什夫復赴藏。攜俄皇請第十三世達賴喇嘛遣使赴

俄之函。又攜俄皇贈以教主禮服一襲。翌年九月。第十三世達賴喇嘛遣倉倪。隨陶什夫至俄。晉謁俄皇於黑海離宮。二十七年夏。復遣使至俄。於七月七日。晉謁俄皇與俄后。待遇極隆。

二十五年。第十三世達賴喇嘛親赴前藏。攢集大昭。時適慈禧皇太后六旬萬壽。專派巴雅爾堪布甲木養曲墊來京。呈進貢品。二十六年。按照前輩達賴喇嘛遺規。親往噶勒丹寺。瓊科爾結昌杼桑葉暨山南一帶寺宇。燃燈作喜。二十七年。第十三世達賴喇嘛自行掌管闔藏教政。駐錫布達拉。並入貢清廷。

二十九年。英人知日俄之戰。殆不能免。中俄兩國。俱無暇西顧。遂乘機命楊赫斯巴。率遠征隊入西藏。時英兵進至距拉薩三日程之時。第十三世達賴喇嘛在布達拉宮殿聞之。不忍藏民之蹂躪。卽召噶勒丹寺之大喇嘛。授之印璽。託以代行職權。伴七名之侍衛東行。時光緒三十年五月十七日也。英兵於六月二十二日。直抵拉薩城下。藏民死者無算。寺宇焚劫尤甚。擄掠財物。運至印度者。絡繹不絕。英人楊

赫斯巴。乃與色拉布賚綳噶勒丹三大寺之堪布池巴暨僧俗大會。締結有名之拉薩印藏條約。

時第十三世達賴喇嘛。由西藏東入青海。俄人多爾智尙爲讚尼。引布里雅德族人七十名護衛之。擬乘此機以赴俄都。翌年春。至於甘肅之傾。沿途禮拜者羣集。競傳日俄於滿洲開戰。俄人連敗之事。第十三世達賴喇嘛聞此風說。遂公言。我之此行。爲欲赴蒙古庫倫。見大喇嘛哲布尊丹巴呼圖克圖也。乃駐於西寧之塔爾寺。清廷先聞第十三世達賴喇嘛之東走。次覩西藏當英俄環伺要衝。非亟力整頓。殊難恢復主權。而固國防。乃遣使勸第十三世達賴喇嘛來朝。第十三世達賴喇嘛於三十四年四月。自西寧塔爾寺入京。八月壬午。清廷遣御前大臣博迪蘇往保定。迎勞第十三世達賴喇嘛。九月庚寅至京。尋於仁壽殿覲見。十月戊午。賜第十三世達賴喇嘛宴於紫光閣。壬戌。慈禧太后萬壽節。倍賜筵宴。第十三世達賴喇嘛祝嘏進方物。懿旨加封誠順贊化西天大善自在佛。歲賜廩餼萬金。第十三世達賴喇嘛駐

節京師。而關懷藏事。寢食未遑。惟仍力并千方百計。籌劃安藏之策。迨奏請清西太后德宗。與英交涉。積日漸久。事始成熟。而英亦允撤兵回印矣。時清廷急議籌邊。番僧土司與之抗。降旨詰問。第十三世達賴喇嘛面請派軍駐藏。德宗下議理藩院。允如所請。十月。兩宮崩御。溥儀嗣位。奉到上諭云。

達賴喇嘛於萬壽節。執禮甚恭。殊堪嘉獎。歸藏之後。更望恪遵主國典章。所有事物。勿庸直接奏明皇帝。具報駐藏大臣。令其代奏。靜候勅裁。欽此。

英既立約撤兵。維時藏中羣龍無首。曠日持久。是以僧俗庶衆。極盼第十三世達賴喇嘛回藏。重秉教政。有如大旱之望雲霓。因而舉行宗教儀式。朝夕游行。而三大寺僧伽及全藏庶衆。又復推舉代表。遠入中土。以表歡迎。先行者方抵北京。繼之者僅達山西。而甘肅青海沿途之僧俗。尙絡繹不絕。第十三世達賴喇嘛遂於此盛大歡迎之中。於其年十一月二十八日離京。由嘉峪關入於蒙古。以至庫倫。訪第八世哲布尊丹巴呼圖克圖。並介紹之於駐庫倫之俄國領事。俄領電達聖彼得堡。俄

皇贈第十三世達賴喇嘛以馬隊之服裝器械四百具。繼由西寧過青海。在陝甘途中。屢聞趙爾豐於川邊地方。勵行改流。籌建行省。並派兵入拉薩。至宣統元年十二月二十五日。始返藏。及抵拉薩。又與駐藏大臣聯豫。情感不洽。是年。四川督軍趙爾巽。已奉諭派兵進藏。乃於六月。由成都派鐘穎率兵一混成協。歷川邊而入藏。七月。抵川邊之打箭爐。十二月。抵拉里。是時第十三世達賴喇嘛行抵拉薩未久。而川軍即行入藏。沿途騷擾。目覩此情。極爲疑慮。藏番嘗拒川軍之入境。川軍大破之。適有隨營委員張鴻升。欲諂媚聯豫。借步兵數十名。由小路捷徑。趨赴拉薩。遽於市街叢人之中。開槍斃一佛公。連傷數人。第十三世達賴喇嘛乃請副欽差溫宗堯上山。要求須切實保護人民寺院及黃教等語。溫宗堯以職責所在。當然奉行。及返商之於正欽差聯豫。聯豫不允所請。第十三世達賴喇嘛遂於川軍進入拉薩之次夕。即宣統二年正月初四日。離布達拉宮。率親隨數人。沿江西走。將抵江孜。時江孜駐有英軍。急電倫敦請訓。覆電囑妥爲優待。速送大吉嶺。由印度總督善爲供給。修一寺以

居之。清廷謬採駐藏大臣聯豫之主張。於二年正月十六日。詔奪第十三世達賴喇嘛名號。黜爲齊民。電令聯豫。依例仿求靈異小兒。立爲第十四世達賴喇嘛。二月乙亥朔。聯豫請以噶勒丹寺池巴羅布藏丹巴。代理前藏事務。

第十三世達賴喇嘛行抵印度。英人極表尊重。竭誠招待。幾微畢舉。而第十三世達賴喇嘛不願因人而立。一切供應。概行謝絕。飲食起居。皆由自給。後至者雖合官吏僧俗。幾達三千餘衆。亦均莫不如是也。滯留印度。瞬息幾及三年。宏揚佛法。編譯經典。不遺餘力。梵土佛教。日益隆盛。川軍在藏。驕縱日甚。藏衆倍增憤懣。維時適值辛亥政體改革。民國元年。武漢革命之報。傳至拉薩。駐藏川軍。乃叛駐藏大臣聯豫而獨立。在拉薩譁變。亂軍搶劫色拉寺。恣意擄掠。慘殺藏人。深滋嗟怨。西藏三大寺僧衆。遂乘機而起。羣謀自衛。遣使赴印。而復迎請第十三世達賴喇嘛回藏。高倡西藏獨立自治。不駐漢官。不紮漢軍。扣其給養。川軍於困苦備嘗之餘。至八月間。由印度浮海返國。英人乘之。伸其勢力於西藏。遂於八月十七日。由駐華英使。提西藏

問題覺書於中華民國北京政府之外交部。反對袁世凱所用聯合五族之五色國旗。第十三世達賴喇嘛已於民國二年六月二十四日。由印度噶倫堡出發。九月歸抵拉薩。駐錫布達拉。宣告獨立。時袁世凱爲民國大總統。發川滇之兵攻之。大破藏番於川邊。乘勝西進。旋因英駐華公使向北京政府提出覺書。軍事隨之停止。

二年五月。中國政府向英提議。於倫敦召開會議。英政府主張西藏政府。應派員加入。會議地址。爲印度邊境之大吉嶺。後移於森姆拉。開幕於二年十一月十三日。閉幕於三年四月二十七日。終至決裂而散。六月六日。英使提覺書於中國外交部。提議四月二十七日中英藏三方委員。於森姆拉簽字之藏案專約。實爲解決西藏問題之唯一法案。六月十三日。外交部以公文答覆英使。不同意其所提議之內外藏境界問題。三年歐洲大戰起。英人無暇東顧。會議遂擱置焉。

第十三世達賴喇嘛。兩次出亡。倍受磨折。兼之駐印日久。時與歐人接觸。回藏後。卽勤求治理。致力政教之刷新。昕夕從公。未遑寢食。茲記其重要者如次。

一、發揚佛教。令全藏寺廟喇嘛。誠心修經論道。而使宏大佛教。
二、立嚴格之忠孝規律。家諭戶曉。勒石以示警惕。而感化藏衆。
三、修明懲戒律例。以懲盜賊姦淫。但免死刑。
四、禁止殺生。不許人民捕魚獵鳥。
五、禁藏衆服用奢侈品。而尤對於烟酒。絕對不許沾染。
自是藏衆。深感第十三世達賴喇嘛之德政。尤仰之教化。日臻邳治。得未曾有。不惟衆庶安居樂業。而惠及蟲魚。亦感終身無喪生之患。西藏至此。乃真成佛地。窮世界當無一地。能如其安定者也。

西藏自第十三世達賴喇嘛由印回藏後。二十年來。日臻隆盛。宏揚佛教之外。刷新政治。如訓練藏軍。設警佈防。修築鐵道。增置郵電。整理財政。提倡教育。種種建設。不遺餘力。藏地民衆。經此勵精圖治之訓練。一切智識。較前大有進步。外人既欽羨其治理。復覬覦其富藏。拉薩都市。恒不斷外人踪跡。於時握有西藏全土教務要

權之三大寺。內部極爲複雜。意見頗不一致。綜之可分爲新舊兩派。舊派之代表爲布賚紉寺。其主張素甚趨向中央。新派之代表則爲色拉寺。均係青年喇嘛。素主獨立。第十三世達賴喇嘛之一切主張與行動。多取決於新派之幹部。尤以軍官中新派人員爲夥。故頗有勢力。舊派均係元老。在藏常操中樞要政。英人屢欲入藏。主持政權。民國十三年十月某晚。先唆使藏政府下之親英派僚屬。逼走第九世班禪額爾德尼。更欲推翻第十三世達賴喇嘛。另組新政府。詎料各大寺數萬喇嘛。恐佛教之淪亡。力予反抗。並監督政府。禁止英人入境。時第十三世達賴喇嘛。早已洞悉英人之多方甘言利誘。欲遂其私。乃善運智慧。應付有方。苦心孤詣。未墜術中。雖因川釁與中央久未續交。但全藏之領土主權。幸皆完整無缺。撤毀洋房。停職親英青年。雖祇致力於藏中政教之治理。實未嘗一日忘情於中央。恒思乘機恢復舊有關係。以符五族共和建國之真諦。時中國政府於民國三年所派遣之西藏辦事長官。因中藏問題之未解決。迄未入藏。設駐藏辦事長官行署於印京。於時行署秘書長李

嘉詰。報告藏事促進會云。

自民二森姆拉會議。界案爭執。擅行簽字。致撤使停議。其時藏人慮我另尋解決途徑。由藏官履禮。向英定購步槍五千枝。用以防我。未交槍款。歐戰適起。英人自顧不遑。無暇侵略。乃一意籠絡達賴。背叛中國。歐戰停止。英國即遣白爾勾誘堅桑朗噶。人藏大肆野心。向藏當局。條陳改革三事。甲、廢剃度。乙、提寺產。丙、徵僧兵。其意蓋欲唆使藏人。練兵叛華。彼得坐收漁人之利。不期下三大寺僧。及一般藏民。表示反對。彼見風勢未順。計未得售。遂提出槍款問題。要求割讓藏南邊境。與不丹毗連之麥隅。爲抵償。藏人不允。彼復以築紀念室爲名。要求割讓拉薩一部。三大寺僧及藏人。仍靳而不予。並宣言寸土皆屬中國。我等不能自主。堅桑朗噶與三大寺。幾至絕裂。英人鑒於藏人保衛土地。及排斥英人之心極堅。近乃更變計劃。以類似藏人之哲孟雄人。連顛入藏。督辦拉薩警察。將一切內政。完全攬入掌中。上年。又由印度購槍五千枝。大砲三尊。

機關槍數十架。招募藏兵九十餘名。並以大吉嶺爲駐藏英兵大本營。隨時換防。添派超過條約原數。藏中僧俗人人側目。英以第一步計劃已告成功。現又準備侵略路權。其進取計劃。一由西力古里至低斯達中。分支至大吉嶺。一由阿薩密至白馬崗。分支直達滇邊與緬甸。其由西力古里至低斯達中之西。沿扛多一帶之汽站路。已經修築竣工。由扛多至廈司馬一百餘里之汽車道。亦在建築之中。以大勢觀之。由印至藏之交通。其完成之期。當不在遠。屆時路政兩權。皆握英人掌中。不第藏人不能支持。中央縱欲援藏。其如崇山峻嶺。何。全藏恐非我有矣。至班禪出走。係受親華嫌疑。達賴左右。欲奪取後藏地盤。迫其納餉二三千磅（一磅合華銀五十兩）。軍糧菁稞十萬尅。並將其重要辦事員。置之於獄。班不得已。始率所部。潛行離藏。入京云云。

十七年。蔣總司令北伐完成。蒞臨舊都。偶遊雍和宮。感中央與西藏關係中斷日久。絕非國家之福。而於戎馬倥傯中。卽遣代表持文入藏慰問。第十三世達賴喇

嘛固自喜出望外。私幸宿願可償。藏衆尤驚喜欲狂。故代表在藏。倍受隆重待遇。第十三世達賴喇嘛派遣北京雍和宮住持貢覺仲尼堪布。代表入都。重圖團結。國民政府爲迅速解決中藏間之一切糾紛。俾完成一統。遂遣派西藏駐京代表貢覺仲尼堪布入藏。宣達中央德意。二十年春。第十三世達賴喇嘛旋派貢覺仲尼爲駐京全權總代表。偕同阿旺堅贊、阿旺札巴、曲批圖丹等來京。商辦藏案。並竭力表示擁護中央。維持統一。且呈請設立辦事處。以避免如曩日之交涉。事事假手於外人。中央深嘉其誠。許其在南京康定北平。設立西藏辦事處。俾便直接交涉。乃對於西藏懸案。尙未着手。以西康甘孜所屬大金寺僧衆與白利村夷人之爭產細故。康藏又起糾紛。

甘孜縣屬之大金寺喇嘛。與白利村夷人之爭地糾紛。因漢軍處理不善。大金寺喇嘛乃求救於藏。始由局部衝突擴大而成。中央曾於民國二十年三月。派唐柯三人藏調查真相。藉便調解。唐在鑪霍勾留。達半載之久。與藏方代表瓊讓。協定解

決甘案條件十項。繼因劉文輝及康藏人士紛紛反對。終未正式簽字而去。唐去後。劉文輝卽聯絡青軍。於二十一年四月二十八日。與藏方作戰。期以武力收回失地。結果藏軍退入金沙江以西。旋因川戰暴發。成立岡拖停戰條約。各劃江而守。後因川戰結束。劉文輝全軍退駐雅安。經營邊地。藏方因受某國之慫恿。卽派出稽代本爲代表。函邀德格知事姜郁文。赴隆達會議。要求川康軍於二十二年十二月二日。卽藏曆十一月五日。讓出德格、甘孜、瞻化、朱倭各地。如逾期無明白答覆。則由藏方自行出兵收回。旋經姜電向西康屯殖司令唐英及步二旅旅長鄧驥請示。唐當令姜嚴詞拒絕。除向劉文輝請示外。並令甘孜張我戎團嚴密佈防。同時復在甘孜、白利、玉隆一帶。調集民兵八百餘人。幫助川康軍防守要隘。又派人分赴三岩、稻成、鄉城、白玉各縣。宣慰夷酋。勸其勿附和藏方。當分別委以土營營長及隊長等名義。以資聯絡。藏軍現在前方者。約三千餘人。由代本五人率領。復有大金寺喇嘛二千餘人。爲其前鋒。槍械均係英國製造。並先派千餘人渡金沙江。因此前方情勢。日趨險

惡。與康軍發生衝突。參謀本部與蒙藏委員會據報。去電制止雙方軍事行動。中央除電令不得有軍事行動外。並令電致劉湘。囑協助駐康各軍。制止異動。以固邊陲。參謀本部邊務組。電致劉文輝及青海馬麟。指示防範藏軍機宜。蒙藏委員長石青陽。召見第十三世達賴喇嘛駐京代表貢覺仲尼。囑電勸達賴。以國家爲重。遵守和約。各駐原防。靜候中央解決。貢覺仲尼將請中央迅派大員前往調解。另訂適當和平辦法。石青陽擬定調解康藏糾紛辦法。將請劉文輝讓出大金寺青柯寺。交還原喇嘛執管。使流亡在外之喇嘛。得有所歸。至康藏界限。仍依去年雙方和約。以金沙江東西爲界。互不侵犯。石已分電拉薩與劉文輝。勸各接受。消弭禍亂。免中央西顧之憂。第十三世達賴喇嘛於十二月十一日。電復蒙藏委員會。遵令轉飭前方。制止軍事行動。康藏糾紛。將趨緩和。藏方派代表稽代本。定十二月十七日。與康方德格江縣長重開會議。蒙藏委員會於十二月十六日。再電拉薩。不得發動軍事。聽候處置。第十三世達賴喇嘛電覆駐京代表貢覺仲尼。略謂藏方對青藏和約。並無毀棄

之意。現仍照約保持和平。仰轉電青方。勿生誤會。蒙藏委員會爲消弭康藏糾紛。曾呈准行政院。恢復大金寺。收容無宿無食之喇嘛。以抑亂萌。而靖西陲。

第十三世達賴喇嘛因天年已屆。如日之西沉。預知髮白逝世。回歸天上。電令各處。命辦逝世後所需用之各項物品。二十二年十二月十七日。卽藏曆水雞年十月三十日。午後酉時許。第十三世達賴喇嘛自知將去。卽在丈室。聚集布達拉宮之全體司倫噶倫及第九世班禪額爾德尼之代表安欽呼圖克圖等。作遺囑曰。

爾等不聽我訓誨。吾將去矣。師兄班禪在南京。中央有力。應速請彼回藏。維持政教。前藏後藏緇素人等。應聽班禪之教誨。中央和平。救吾等之苦惱。於戲。

遂於當晚戌時入寂。享年五十晉九。藏中黎庶。驚聞噩耗。悲哀如喪考妣。官方乃宣布全藏持喪四十九日。且禁民間歌舞。男子須衣白色孝服。婦女則撤簪飾。各商店須閉門。並撤去境內旗幟。不僅全藏高僧羣集三大寺。作盛大長期之追薦。卽散布全藏之數千寺院。皆如三大寺。爲之唸經禱告。三大寺並派喇嘛多人。分赴雲南阿

敦子。西康康定。青海西甯等各寺廟誦經。祈祝第十四世達賴喇嘛早日轉世。以慰渴望。具徵藏衆愛戴之熱忱。西藏一切教政事務。遵遺囑暫由大弟子司倫噶廈負責主持。康藏衝突。現經雙方解釋。當已平息。仍以金沙江爲界。各守原防。西藏駐京辦事處。於二十日午刻。接到西藏司倫噶廈自拉薩寄來之正式官報。文曰。

南京西藏駐京辦事處鑒。達賴佛座。於藏曆亥月三十日（即國曆十二月十七日）下午七時半圓寂。藏中事務。暫由司倫及噶廈負責處理。希安心供職。并呈報中央。詳情容後另電知照。西藏司倫噶廈印。

西藏駐京辦事處駐京代表貢覺仲尼、阿旺堅贊、阿旺札巴、曲批圖丹等。接報後哀悼異常。即於當日通電拉薩弔唁。文曰。

拉薩司倫噶廈鈞鑒。來電奉悉。極深悲痛。敬祈轉飭康藏軍。請勿發生軍事行動。靜候中央辦理。職處自當仍本佛座遺旨。照常供職。維持中藏關係。西藏駐京辦事處。

並將原電譯呈國民政府、軍事委員會、行政院、參謀本部、蒙藏委員會各機關。貢覺仲尼等並於該日午後五時。親率各代表赴薩家灣鐵道部官舍。晉謁行政院院長汪兆銘。及蒙藏委員會委員長石青陽。面陳第十三世達賴喇嘛圓寂經過。及今後藏中教政。依教例暫由司倫噶廈伊倉等。共同負責維持各情。汪等除向貢覺仲尼等表示哀悼外。並同蒙藏委員會委員長石青陽。擬就慰唁電文。交貢覺仲尼。請其譯成藏文。轉致拉薩司倫及四噶倫。表示弔唁。同時呈請國民政府。特行追薦辦法。國府當局以第十三世達賴喇嘛。主持西藏教政。傾向中央。鞏固邊圉。於十二月二十一日。特發明令褒崇。文曰。

西藏達賴喇嘛。教思宏溥。覺性澄明。衛國安民。懋著勛績。方冀住世悠長。安邊闡教。茲聞圓寂。震悼良深。達賴喇嘛。應追贈護國宏化普慈圓覺大師封號。一切褒助典禮。務極優隆。着由行政院。飭主管部會。會同議定。呈候施行。以昭黨國懷遠旌賢之至意。此令。

蒙藏委員會委員長石青陽。於二十一日。特去電拉薩致唁。原文云。

拉薩司倫噶廈伊倉并轉全藏僧民均鑒。驚聞達賴外朗圓寂。震悼殊深。遙念西陲。彌增關懷。除呈請中央從優褒卹。及令蒙古青康平熱五臺各寺廟。唵經外。特電致唁。石青陽叩。

行政院院長汪兆銘。於二十二日電藏弔唁。原文云。

拉薩司倫噶廈伊倉并轉全藏僧民均鑒。達賴大師圓寂。驚聞噩耗。震悼良深。緬懷勳勤。尤切感愴。已頒明令追贈封號。除督同主管部會。議定喪禮。用示尊崇外。特電致唁。汪兆銘叩。

第十三世達賴喇嘛圓寂後二十八日。藏中全體僧官代表。大會於布達拉宮。一致決議。監禁第十三世達賴喇嘛重要隨員。隸掌內務軍事之宮壁。及其親屬梯董。佛章。德拉中等三人。當此訊洩出後。宮壁之父。卽携盧比五萬枚。化裝遠遁。後在大隆戈獲。解回拉薩囚禁。均被嚴鞫。被判流徒往公坡提默伊旭納買寺。終其生財。

產亦沒收歸公。他如搽隆。則遠遁江孜。作媚外運動。二十三年一月十五日。西藏司倫噶廈伊倉及僧俗官民。開全體大會於布達拉宮之帕却格學瑞菩薩像前。舉行宗教儀式。推選攝政。其儀式一循布達拉成例。先將具有攝政資格者人名書之紙上。納入麵粉製之丸中。更將丸置於銀盤中。上覆綢布而封其口。卽以此盤供於像前。誦經祝福。復更去布。取盤向像前旋轉。以落下之丸爲中選。此種儀式。藏名達指。意爲祈禱。於時選擇結澤熱振呼圖克圖。爲西藏之攝政。新攝政旣揭曉。全藏臣民皆大歡喜。蓋攝政爲第十三世達賴喇嘛生前所眷愛。兼且神通廣大。夙嫻法術。

西藏駐京辦事處。於二十三年一月二十五日夜。接西藏司倫噶廈伊倉及僧俗官民全體大會電稱。公舉熱振呼圖克圖代攝第十三世達賴喇嘛職權。轉報中央鑒核。電文曰。

南京西藏駐京辦事處鑒。至尊無上達賴佛之職權。在佛未轉世。及轉世後未登座期間。現經大會公舉熱振呼圖克圖代理。熱振自弱靈異昭著。智慧第一。

道行學問。全藏信仰。此次大會一致推舉。並向布達拉宮帕却格學瑞菩薩像前。虔情占卜。最爲吉祥。所有全藏政教大權。決定迎請結澤熱振呼圖克圖總攝。至軍事政治一切事宜。仍由司倫噶廈負責辦理。西藏司倫噶廈印。

行政院爲尊重全藏民意。經會議照准。呈請國府。任命熱振呼圖克圖總攬全藏政教大權。國府已令覆照准。汪院長於一月三十一日。特電貢覺仲尼等知照。原電文曰。

本京西藏駐京辦事處貢覺仲尼處長暨諸代表。並卽譯轉西藏司倫噶廈伊倉及僧尼官民全體均鑒。三十日行政院會議議決。卽日呈准國民政府。以熱振呼圖克圖代攝達賴佛職權。深信熱振呼圖克圖。必能益閱智慧。敷施教化。翊奉中央。以副翊教保民之至意。特電知照。行政院院長汪世。

蒙藏委員會奉行行政院令。召集主管人員。詳討優待隆施典禮。以誌崇德。規定兩種辦法。呈送中央鑒核。列舉如左。

甲、致祭辦法。

國民政府特派大員赴藏致祭。清例。凡蒙古汗親王郡王等。

應派散秩大臣一員致祭。乾隆年間。第六世班禪額爾德尼。

在京圓寂。卽派親王致祭。今國民政府特派參謀次長黃慕。

松致祭。亦援祭親王例。

一、頒給玉冊玉印。

大員到藏後。應先舉行授冊授印典禮。

二、頒給祭文。

清例。蒙古汗親王郡王等。均由內閣撰擬滿漢祭文。交。

致祭大員齎往。現頒給達賴文。應用漢藏合璧文字。

三、頒給祭品。

清例。蒙古汗親王。用牛犢一頭。羊八頭。酒九瓶。郡王川。

牛犢一頭。羊六頭。酒七瓶。現在達賴祭品。似應比照親。

王例。從優辦理。

四、發給治喪費。

乙、追薦辦法。

在南京爲第十三世達賴喇嘛。開追悼大會。按乾隆年間。第。

六世班禪額爾德尼在北京圓寂。上諭輟朝一日。除派親王致祭外。并敕令近畿各寺廟喇嘛。唵經四十九天。以昭隆重。

一、組織追悼會籌備處。

擬請由院令派各關係部會。編製預算。共同組織。

二、屆時國民政府特派大員代表致祭。

子、本京各機關。各派代表致祭。

丑、京內外各團體各寺廟。准其推派代表致祭。但邊遠地方。不及來京者。得自行追悼。

三、唵經四十九天。

漢經請道行高尙之法師主壇。藏經請第九世班禪額爾德尼主壇。

四、頒給祭文祭品。

如前例。用國民政府名義。

南京國民政府自擬定辦法之後。並飭蒙藏委員會等各機關。在京舉行追悼大會。

於二月六日。成立追悼會籌備處。八日並通電全國。文曰。

各省政府各級黨部各機關各團體各報館知照。案奉行政院令。以達賴大師圓寂。應崇典禮。乙項內載。在京舉行追悼大會等語。飭由蒙藏委員會。會同各機關部會。共同組織追悼會籌備處。妥爲籌備等因。經第一次籌備會議決定。追悼會日期。定於本月十四日舉行。籌備處地址。附設蒙藏委員會內。追悼會地址。設於考試院考場。以上各項。均經呈請核准在案。現本處已於本月六日。正式成立。京外各處。若派員來京致祭。懇請先行電示。贈送禮品。亦請逕寄本處收轉。除詳細辦法。另登各報逕告外。特電奉達。達賴大師追悼會籌備處叩陽。

二月十二日下午六時。南京特發專電文曰。

西藏問題。自達賴逝世後。形勢變化。中央除派專使黃慕松前往致祭外。對於解決西藏問題。極爲注意。茲因黃氏啟行在即。已舉行會議數次。大致有所決

定。聞對藏政策。決秉總理遺教。以民族平等爲原則。除外交國防及各國通商等重要交涉。歸中央負責外。其他問題仍由藏政府自行處理。班禪回藏後。決以藏民意旨爲意旨。中央並將促進其建設。完成近代之自治政府。爲溝通中藏隔膜。決恢復駐藏辦事處。對於達賴班禪原有薪俸及三大寺津貼。一律仍照前清律例照給。並勸藏地青年。至內地就學及服務中央。以敦感情。又爲避免藏民誤會起見。派軍入藏之議。業已取消。但對藏軍加以訓練。使合於時代化。而鞏固國防。駐藏大員由中央遴選廉潔人員擔任。如有貪污及虐待情事。容許藏民隨時控告嚴懲。關於交通方面。先完成主要各汽車道及飛行場。並豁免中藏間一切關稅。保護藏商至內地貿易。西康劃界糾紛。如藏方承認中央有宗主權。對外交涉秉承中央命令辦理。仍照藏方意見。亦無不可。對外國劃界。將向英國交涉劃清。以免糾紛。又聞近有人向中央建議。在拉薩辦一漢藏報社。宣揚政教。消除隔閡。

二月十四日晨。南京考試院試場。舉行第十三世達賴喇嘛追悼大會。考試院門首及會場明遠樓等處。均紮柏彩。警廳派警戒備。市府派樂隊奏樂。蒙藏委員會全體職員。分別招待。戴傳賢石青陽晨起。即親臨照料。八時許。分班致祭。與祭者二千餘人。其追悼秩序如次。

一、就位。

二、肅立。

三、奏樂。

四、主祭者蒞大師座前行獻禮。

五、主祭者復位。六、行三鞠躬禮。七、奏樂。

八、禮成。

中央派汪兆銘代表主祭。葉楚傖陪祭。國民政府林主席。派參軍長呂超致祭。行政院代表褚民誼。立法院代表梁寒操。司法院代表謝冠生。考試院代表戴傳賢。監察院代表鄭螺生等致祭。暨政府在本京所屬各機關。以及北平、山東、山西、河南、陝西、察哈爾、安徽、湖北、廣東、雲南、青海等省。均派代表蒞會致祭。每次祭畢。均由西藏駐京代表貢覺仲尼、阿旺堅贊等分別答禮。迄下午四時止。始告禮畢。國民政府代表主祭時。並由呂參軍長宣讀祭文。詞曰。

維中華民國二十三年二月十四日。國民政府謹薦馨香。致祭於護國弘化普慈圓覺大師達賴喇嘛之靈曰。崑崙之西。恒水之源。代生聖哲。法統是傳。宏惟大師。撫期應世。定慧夙成。道真點契。爰躋法座。大闡宗風。天人供養。衛喀欽宗。二諦圓融。一明朗澈。咒鉢生蓮。談經點石。方期慧命。爲壽無量。安邊宏教。護國綏疆。覺路爰開。靈山遽返。花雨晨飛。金棺夕掩。度生乘願。悲智無涯。還依雙樹。更隕三車。慧日常明。心燈不息。式薦苾芬。靈兮來格。尙饗。

是日並分兩處。唵經追薦。道場法事。備極莊嚴。第九世班禪額爾德尼大師。九至時祭堂行禮。率領喇嘛十五人。駐明遠樓誦藏經。首都各寺高僧四十八名。在雞鳴寺誦經追薦。追悼會十四日結束。唵經則定三日。第九世班禪額爾德尼在南京行轅。每日仍爲第十三世達賴喇嘛唵經追薦。定期十日完畢。二月二十四日。國府明令。擬給第十三世達賴喇嘛治喪費。文曰。

茲特給護國弘化普慈圓覺大師達賴喇嘛治喪費五萬元。着由行政院轉飭

財政部。如數撥發。此令。

中央特派參謀次長黃慕松。爲致祭第十三世達賴喇嘛專使。初國府於二十三年正月十二日令云。

特派黃慕松爲致祭護國弘化普慈圓覺大師達賴喇嘛專使。此令。

特在參謀本部邊務組。成立專使行署駐京辦事處。國府於二月十六日。頒發銅質關防一顆。文曰。特派致祭護國弘化普慈圓覺大師達賴喇嘛專使行署關防。象牙小章一顆。文曰。特派致祭護國弘化普慈圓覺大師達賴喇嘛專使。代表中央。往藏致祭。並宣示中央德意。視察邊疆情形。磋商恢復駐藏辦事處。溝通漢藏關係。關於致祭冊封之事。均仿前清辦法。用玉冊玉印。賜加封號。以金燈爲上祭供品。並特製銀質之第十三世達賴喇嘛遺像。交拉薩布達拉宮。永遠供奉。玉冊用上好白玉。仿清季冊封之制。上刻冊封全文。銀質遺像。全部用銀。以大師照片照雕。下坐蓮花臺。金質海燈計二座。一重二十兩。一重十兩。週身雕刻佛教花紋。供於第十三世達賴

喇嘛遺像之前。燈中用牛油燃點。終年不熄。裝包在首都之追薦祭品禮物。備携入藏。並購織錦綢緞。贈送教政領袖。黃氏以此次赴藏。隨帶物件太多。故有八十餘件。先命秘書王良坤參議蔣致余二人。定三月十八日。先行携帶至滬。乘輪赴印。轉往拉薩。其他隨員先期塔民主輪來川。過萬到渝。黃氏於四月二十六日。由京乘中航機飛漢。轉飛成都。與劉湘會晤。率同隨員。賚祭品赴藏。代表致祭。於五月十四日赴康。西抵甘孜昌都入藏。藏方臨時執政熱振呼圖克圖。通飭昌都各地。於黃專使經過時。務必歡迎。並負責保護。復派代表由拉薩赴康藏邊地迎迓。八月二十五日。黃氏抵拉薩。西藏僧俗官民。如司倫噶廈三大寺堪布及民衆數百人。至郊外歡迎。熱烈之狀。爲向來所未有。黃氏覘禮大招三大寺布達拉。晉謁熱振呼圖克圖。並擇藏曆十月半大吉日。卽國曆九月二十三日。參用漢藏禮。遵照規定致祭辦法。在布達拉宮第十三世達賴喇嘛靈前。舉行祭奠。並行追贈冊封典禮。頒給玉冊玉印祭文祭品。中央接電後。令於是日晨。特轉知全市各機關團體市民。一律懸旗誌慶。黃氏

擬於年內返京。西藏駐京代表貢覺仲尼等。於十月之初。接西藏噶廈來電。令轉陳藏民。感謝中央冊封致祭第十三世達賴喇嘛之盛意。貢等接電令後。於十月五日。電呈行政院。轉陳謝悃。汪院長接電後。六日電覆貢等。並令轉達藏方嘉慰。漢藏情感。日臻融洽焉。

第四章 班禪額爾德尼

第一節 班禪額爾德尼先世源流

本師圓滿無等正徧知佛釋迦獅子。卽彼處圓滿。乃印度之東。撈叻拉之南。漢印毗連處。爲海所隔。距印較近之小部洲。俗名阿薩陟。嘎鴉。梵名悉堤達尼鴉。雜叻拉。藏言戎且巴眼。華言功德城市。如是無量廣大地中所建之德。充滿粳集大塔。先是。拘那含牟尼佛出世時。遇凶荒。有比丘發願。爲利益饑饉衆生。於是十二日程之區域內。天降粳米。衆皆飽悅。其比丘救饑後。餘粳以神力合之。遂爲大塔。名吉祥充滿粳集塔。其基周廣。距離四十降察。每降察二里。其上臺上四大天王。以珠寶嵌巖。作

三十七柱。四方門內。法界體性口壇城。其上臺上七十五護法像。間以二十八塔中二十八宿。以嚙拉嘛室哩喀石。立二十八柱。四方門內。金剛性壇城。其上寶瓶爲徧入天。以天斗用白琉璃所修。東方門內。德聚宿壇城。其上升法輪頂。廣博峻極。其外城如山巖。狀如石山。兩重圍繞。一日之力。甫繞一週。內者外道。摩訶擦三者。咸皆景仰。各盡其力。精進供養。作禮圍繞。彼諸外道。以爲天斗自在。天宇摩女神梵天等所住之宮內教法者。則以爲世尊所說一切無上續之奇特處。在塔寶瓶內時圓滿。

本師釋迦牟尼佛。印度金剛座成道之次年三月十五日。眷屬圓滿。北香拔拉國王月善。爲金剛手所變化。父名日光。母爲尊勝佛。母與九十六部小國王。依其神力。會議於龍樹所在地。印度之南。德山附近。德聚粳堆塔中。法圓滿。本師釋迦牟尼佛說時輪續十二千伽陀。變現時輪。皆倚者壇城。隨在護持。自茲爲始。逮傳國王帝釋威嚴者。月施大自在。雜色權居。是爲前七法王。次二十五部主。第一文殊稱。第二白蓮。第三賢善。第四尊勝善。第五知識。第六紅手。第七徧入藏。第八日稱。第九

至善尊勝。第十勝海王。第十一難日。第十二雜。第十三色。第十四月光。第十五無限。第十六護地。第十七護德。第十八獅子。第十九壓伏。第二十大力。第二十一無滅。第二十二人獅。第二十三大自在。第二十四無限尊勝。第二十五神武輪。是二十五部聚中。始末二法王。雪嶺者係西藏別名。至尊現沙門相。徧覺班禪精進智善釋教法。日善善尊勝德善。當往昔無量劫前。爲塞己目屈轉輪王時。於寶性如來所發無上菩提心。一切証熟行三者。至究竟極樂國土。無量光自性雖已成佛。又於無數世界。應機顯現無量化身。誘導無量衆生。詣速解脫甚深道等。雖百舌莫能盡述。無上續論云。

以大悲眼觀世界。

照了衆生悉無餘。

法性身中雖不動。

善能變現種種相。

如是說故。據此略陳歷生事蹟如左。

第一世。大長者須菩提。生於印度儼了特達村。父爲婆羅門富家。於釋迦牟尼佛前。出家爲弟子。際九峯山上。十方道場。諸佛菩薩降臨。徧滿虛空。覺悟天人。度脫無數。而轉三世諸佛母般若波羅密多法輪時。善依問答。於上解脫者。決斷疑網。而得授記。

第二世。第一部聚文殊稱國王。生於北方香拔拉國。父權集天國王。母后雜色。其時爲甲申年。曾依時輪根續十二千伽陀。而作簡續。癸亥年圓寂。

第三世。大法師勒單姐特。意謂善解妙具。生於印度東方國王家。爲德尊勝文殊龍樹祖師之第一弟子。立中道分明自續如日之禮。以宏揚佛法。

第四世。大智杜鷓足法師。生於印度。爲龍樹菩薩弟子。抉擇真空見。宣揚佛教道。

第五世。五明通者阿比雅吠喇。生於印度東方婆羅門族。嘗爲金剛座方丈。以講辯著三者。宏釋教於十方。

第六世。著節班顛阿抵沙。生於印度東方斗母雜哈爾之邦。伐拉城市。父爲國王格瓦把。意謂德具善母拔。老卯奧色你堅。意謂勇母光曜。親至西藏。顯揚佛教。至七十歲。色身入於法身。

第七世。大革西繞籠瓦老勒。已翁乃生於後藏臧拉倒獎之羅龍村。宣揚噶黨教。八十歲圓寂。

第八世。阿閣黎朵爾吉熱里崩。瓦生於印度東方。那冷答拉國王家。修無上密宗。得悉地。卽身至烏里澗。意謂騰天極樂。

第九世。大班的答金本。已翁乃生於印度。最勝地明通。顯密二續。究竟護持。於金剛座梵院等。大爲宏法利生。已。色身入於法身。

第十世。巴哈瓦巴喇法師。生於印度最勝地。悉通諸法。得見本尊度母。依仙丹及妙丹等。作自他事已。至烏里澗。

第十一世。格老洒瓦枯把哈瑟。生於後藏野汝答拉克處。宣揚佛教大義。尤於密教。

大爲闡明。如日烜赫。以身淨變幻身。意淨義光明。二者雙合得。雙入金剛之身。

第十二世。仰門答克保哈節。生於西藏。雨列兒色瓦龍處。父國王。檀醫術。名烏索戔板。

母松打若傑馬。生於己未年。爲密臘。乃把如日大弟子。大爲宏法利生已。癸酉年

七十五歲圓寂。

第十三世。洒恰班的答袞嘎

甲諾

三。生於後藏汝拉巴

爾答

洒甲。父巴爾請俄得保。母里

尼甲木。既善五明。顯密一切續。尤爲闡揚。天命國王闊爾臺。聘至漢地。國王因地

神爲患致病。作法卽愈。有術者幻爲大村法。師擲以米。所變不能收。遂名爲變幻

村。因得奇響。歎未曾有。漢藏各地。宏揚佛法。至辛亥年七十歲。於變幻村圓寂。

第十四世。甲洛瓦容敦得爾節巴。生於後藏沙魯大寺附近市鎮之南。甲申年。了達

諸密。得起正二分三昧。天命果干魯國王。聘至漢地。於山東省會相見。國王大悅。

賜金印冊封等。褒揚無量。旋返西藏。乙巳年。八十二歲圓寂。

曩昔藏衛雪地。佛法雖盛。大抵依密者謗律。依律者謗密。顯密如冰炭之不相

授第五世達賴喇嘛大小戒。清太宗崇德七年冬十月。與第五世達賴喇嘛及藏巴汗固始汗之使等。同至盛京。贈以金剛大師之號。自是命使常往來焉。明思宗崇禎十六年。卽清太宗崇德十年。青海固始汗。因後藏之藏巴汗壓抑黃教僧伽。遂攻滅之。以其地居班禪額爾德尼。駐節札什倫布寺。管理梵院。宏闡黃教。自是威望大隆。藏蒙各處。咸來尊崇。號之爲博克達。而從受金剛如意珠輪秘密灌頂法者無算。於清康熙元年壬寅二月十三日圓寂。享年九十有六。

第六節 第五世班禪額爾德尼

第五世班禪額爾德尼。法名羅布藏伊喜巴桑布。意謂意善聖智。於清康熙二年癸卯七月十五日。在後藏桑脫甲嚕若臧地方轉世。父名沙不仲索諾木汪札爾丹。母名澤丹卜疵。六年丁未。至札什倫布寺坐床。所有宏法利生廣大行狀。詳如大世紀所載。三十四年乙亥四月甲辰。聖祖遣使冊立羅布藏伊喜巴桑布。爲班禪呼圖克圖。五十二年癸巳春正月戊申。詔封後藏班禪呼圖克圖爲班禪額爾德尼。如

達賴喇嘛例。頒給金印金冊。註明札什倫布各寺廟地方。屬班禪額爾德尼管理。班禪額爾德尼之名始於此。藏名江抵任補清。意爲護持寶飾。乾隆二年丁巳七月初五日午後。圓寂於札什倫布寺內。色身入於法身。享年七十有五。

第七節 第六世班禪額爾德尼

第六世班禪額爾德尼。法名羅布藏巴勒墊伊喜。意謂有德聖智。於清乾隆三年戊午七月初三日。在後藏向札喜策爾地方轉世。父名湯拉。母名寧達旺木。六年至札什倫布寺。三十年賜金冊。四十五年。高宗七旬萬壽。第六世班禪額爾德尼來京祝釐。於七月丁酉。至熱河之避暑山莊。在淡泊誠敬殿晉謁。清曠殿賜坐。賜茶果。高宗御製詩以紀事。

祝釐遠至鬯宗風。三接欣於避暑宮。敬一人而千萬悅。垂名冊亦乃予同。
雪山青海胥增怵。色鬪精金許獻衷。初見宛然舊相識。本來如是非神通。

七月庚子。高宗御萬樹園。賜第六世班禪額爾德尼等宴。賞賚金幣有差。高宗御製

詩成什紀事。

聖僧永祐永棲遲。神御巍臨欲觀宜。今佛云當拜古佛。古時希有見今時。
舊藩新部益生敬。設席承筐共受釐。中外一家逮葱嶺。大清萬載鞏天禧。

高宗更寫山莊內白蓮筵頭。贈第六世班禪額爾德尼詩曰。

本是出塵體。塞湖託淨真。卻紅色俗韻。條白業良因。

風拂香含慧。露承淡沃神。寫圖合誰贈。無著與天親。

八月己酉。庚戌。辛亥。戊午數日。高宗御卷阿勝境。賜茶果。庚申。壬戌晚。高宗御萬樹園。賜觀火戲。乙丑賜宴。詔仿後藏札什倫布寺式。建須彌福壽寺於熱河以館之。高宗御製須彌福壽之廟碑。其詞曰。

黃教之興。以宗喀巴爲鼻祖。有二大弟子。一曰根敦珠巴。八轉世而爲今達賴喇嘛。一曰凱珠布格埒克巴勒藏。六轉世而爲今班禪額爾德尼喇嘛。是二喇嘛。蓋遞相爲師。以闡宗風。而興梵教。則今之班禪額爾德尼喇嘛。實達賴喇嘛。

之師也。達賴喇嘛居布達拉。譯華言爲普陀宗乘之廟。班禪額爾德尼居札什倫布。譯華言爲須彌福壽之廟。是前衛前藏所由分也。辛卯年。曾建普陀宗乘之廟於避暑山莊之北山。以祝釐也。亦以土爾扈特之歸順也。今之建須彌福壽之廟。於普陀宗乘之左岡者。則以班禪額爾德尼欲來覲。而肖其所居。以資安禪。且遵我世祖章皇帝建西黃寺於京師。以居第五世達賴喇嘛之例也。然昔達賴喇嘛之來。實以敦請。茲班禪額爾德尼之來覲。則不因招致。而出於喇嘛之自願來京。以觀華夏之振興黃教。撫育羣生。海宇清宴。民物敕寧之景象。適值朕七旬初度之年。並爲慶祝之舉也。夫朕七旬。不欲爲慶賀繁文。已預頒諭旨。而茲喇嘛之來。則有不宜阻者。蓋國家百餘年昇平累洽。中外一家。自昔達賴喇嘛之來。至今亦百餘年矣。且昔爲開創之初。如喀爾喀額魯特。尙有梗化者。今則重熙休和。喀爾喀久爲世臣。厄魯特亦無不歸順。而一聞班禪額爾德尼之來。其歡欣舞蹈。欲執役供奉。出於至誠。有不待教而然者。則此須彌福

壽之廟之建。上以揚歷代致治保邦之謨烈。下以答列藩傾心向化之惓忱。庸可已乎。既爲記。復作讚言。

印度既廻遙。佛教亦式微。梵僧捨天竺。多臨衛藏地。自唐代已然。

是爲發源處。一譯猶云近。三乘無舛訛。宗乘向東昌。誠如佛所記。

衛藏雖檄外。實在震旦中。達賴及班禪。宗喀巴高弟。前後燃智燈。

三車之綱領。眞文與滿宇。於是溯軌躅。蒙古衆林林。莫不傾心向。

皈依三寶門。神道易設教。茲聞班禪來。如嬰兒遇母。觀化闡宗風。

誠爲吉祥事。布達拉既建。倫布不可少。擇向興工作。亦以不日成。

都綱及寢室。一如後藏式。金瓶映日輝。玉幢揚風舞。自成動靜偈。

朗標色空喻。以是善因緣。資無礙法喜。祝嘏尤其小。所欣象教宏。

舉似西域居。無來亦無去。上人演法輪。蠢蠢普超度。佑我無爲治。

雨順與風調。衆生登壽世。慧炬永光明。合十作讚言。初非爲一己。

如懸大圓鏡。遍照於十方。而鏡本無心。廻向亦如是。

八月甲戌。高宗自熱河回鑾京師。第六世班禪額爾德尼隨駕。接見於南苑德壽寺。嗣又駐錫西黃寺。講經宏法。禮敬供養。不可悉數。賜玉冊玉印。十一月患痘。圓寂於北京之西黃寺。享年四十有三。色身入於法身。高宗爲之輟朝一日。敕命親王致祭。并令近畿各寺喇嘛。唵經四十九天。翌年春。舍利金龕西歸。駕幸西黃寺拈香送之。而留其高弟子羅布藏敦珠布者。領班第二人。住持須彌福壽寺。傳授藏經律。選內地喇嘛百八十人習焉。四十七年。詔命於西黃寺之西。建清淨化城塔院。藏第六世班禪額爾德尼經咒衣履。高宗御製塔記賜之。

清淨化城塔記

蓋聞有爲者非法。法本無爲。常住者非道。道歸無住。大慈氏以宏濟爲願力。自無始劫來。妙明圓覺。普利人天。俾大千衆生。歡喜安隱。各滿願欲。此慧燈所以續於長明。法輪所以資乎善轉也。庚子秋七月丁酉。聖僧班禪額爾德尼自後

藏越二萬里來觀。於是乎山莊有札什倫布之建。肖其所居以資安禪。逾月。送之京師。供養於黃寺。乃十一月丙子。忽示寂。茲剎。辛丑二月丙辰。以舍利送還後藏。計自來觀至示寂。自示寂至還藏。屈指各及百日。其間去來因緣。真不可思議。恩命於寺之西偏。建清淨化城塔院。藏經咒衣履。誌勝因也。初。班禪之來賓也。以海宇清宴。民物熙和。樂觀華夏之振興黃教。而蒙古諸藩一聞是事。無不欣喜頂戴。傾心執役。內地人民。亦延領企踵。奔走皈依。以爲國光吉祥善事。於震旦國土。宣揚宗乘。成就無量功德者焉。豈知指筏尋源者。不可以証覺海。攀梯求徑者。不可以陟靈山。生滅同源。去來一法。遂乃入寂。莫非宣教。蓋自飛錫竺乾時。早已了然無礙。故山莊授記之日。卽留高弟羅布藏敦珠布等於札什倫布。傳習經律。宣揚正法。亦猶如來涅槃所說。我有無上心法。悉付摩訶迦葉。爲汝等作大依止也。然則有爲者非法。常住者非道。豈不信然。而清淨化城之與札什倫布。闡宗風揚妙諦。是一是二。亦不待重提絮論矣。讚曰。

| | | | | |
|--------|--------|--------|--------|--------|
| 黃教盛衛藏。 | 鼻祖宗喀巴。 | 達賴及班禪。 | 轉輪應說法。 | 出世渡衆生。 |
| 如普賢願海。 | 班禪後藏來。 | 震旦最勝因。 | 以無量功德。 | 受無量供養。 |
| 以無量功德。 | 受無量讚頌。 | 皆以普渡故。 | 而作是因緣。 | 是爲大成就。 |
| 去來本了然。 | 佛說無生法。 | 妙用大寂光。 | 慈悲發宏願。 | 種種示法身。 |
| 於大千世界。 | 作無量利益。 | 一切有情屬。 | 各各普渡竟。 | 善哉菩提心。 |
| 衆生隨分受。 | 宣布大法音。 | 持受天人師。 | 楞伽照無邊。 | 四諦十二因。 |
| 功德大成就。 | 湛然歸虛空。 | 虛空歸虛空。 | 大乘性體是。 | 得至於涅槃。 |
| 是爲第一義。 | 卽此示涅槃。 | 一歸無爲法。 | 如失琉璃珠。 | 競爭大海中。 |
| 其光所照耀。 | 徧滿閻浮提。 | 又如寶鬘雲。 | 須臾卽消滅。 | 而於空虛中。 |
| 普覆大千界。 | 舍利歸西天。 | 於此建經幢。 | 法嗣闡宗風。 | 廣示正覺路。 |
| 讚法偈真詮。 | 生滅相如是。 | | | |

乾隆四十七年歲在壬寅長至月吉日御筆

第八節 第七世班禪額爾德尼

第七世班禪額爾德尼。法名羅桑巴爾丹巴里比尼麻却古勒朗甲巴桑波。於乾隆四十七年壬寅四月初八日。在後藏桑巴壤節特翁地方轉世。四十九年甲辰。迎至札什倫布寺。五十五年庚戌。廓爾喀犯藏。侵入札什倫布寺中。肆行擄掠。並將塔上鑲嵌綠松石珊瑚等挖去。高宗命福康安率兵討平之。五十七年壬子七月二十七日。廓爾喀遣人繳出前此搶掠札什倫布之金冊並銀物等件。嘉慶八年癸亥。來拉薩傳受大戒。諸所宏法利生。詳於大世紀。十五年庚午。換給第七世班禪額爾德尼金冊。咸豐四年甲寅正月初九日圓寂。享年七十有三。色身入於法身。

第九節 第八世班禪額爾德尼

第八世班禪額爾德尼。法名羅桑巴爾丹且節惹克巴打里別汪却巴桑波。於咸豐五年乙卯。歲星宿和合之吉日黎明。緣母丹請且酸。生於桑脫布甲補嚕桑。大張顯密二教不墜之傘。高立有頂。既以若彼無數事跡。護持有緣衆生。復爲彼諸有

情。於世間豐盛觀念綦切者。顯現有爲無常之理。以資勸導。乃於光緒八年壬午七月十六日圓寂。享年二十有八。色身入於法身。

第十節 第九世班禪額爾德尼

第九世班禪額爾德尼。法名節村老桑土丹且吉尼瑪哥洛郎甲把桑波香厄列。於光緒九年癸未正月十二日。星宿圓滿會合吉日。西康達克保處。依大清淨佛母當且掃抹。現希有先兆而生。十四年戊子正月十五殊勝日。剃度錫名。大衆歸誠。迎請至後藏。德寢甘爾桑宮中。三月丙寅。德宗賜第九世班禪額爾德尼呼畢勒罕哈噶念珠如意。十七年辛卯。受戒爲沙門。九月癸丑。德宗詔諭。於明年正月坐床。升泰蘇呼諾們罕往視。頒寄敕書珍物。十八年壬辰正月初三日。迎至札什倫布寺升法座。大謙會時。雖帝釋千目。瞻仰之不足。梵天八耳。諦聽之不厭。如是令聞。如天鼓音。至於有頂。十方諸佛菩薩。稱揚讚歎。天雨寶華。徧滿虛空。一切天神持明者。會大啟善善之門。一切金剛空行母。以吉祥音宣說眞寶等。如一切珍品。積聚而成。廣大

希有。善緣之力。以是雪地一切穎秀衆生。似得歡喜地之悅豫。壬辰年正月十三日。據海會上首。爲導有緣衆生。循解脫道之次第故。自幼童時。卽本思念加行二者。依善知識。比勒起至德。聚密集之一切疏。以聞思修三。講辯者二。持護增三等。知淨賢希有所行於厥父第二主尊。融如熟金之教藏。說行雙合。以爲護持。時自滿螢火疇亦無比。今於節尊且節林麻親波海世紀中。以我草頭一滴之智。微爲有緣衆生。開其信心而略說。

世尊眷懷衆生。備極憐憫。恒依四攝。廣施惠育。復以衆多善巧方便。引入甚深解脫道。對諸僧刹。無遠近分別。壹是率由廣大供奉。俾三輪所作。如新月夏水。隨時增長。興造身口意倚之次第。亦明高樂巴密臘菩薩像。以熟金爲之。高八十肘。內裝之臟。依大德垂範。主心木上。書寫陀羅尼訖。四種舍利。盈滿甚貴。衆寶莊嚴美麗。如衆生眼福會集之所。凡見聞者。能於根內植解脫種。如是妙像。建修旣竣。散天花以開光。億萬五種之供雲等。奉獻無數。爲佛教增長。發廣大願。佛父子二。無量壽宗喀

巴祖師像各一千。創造賢劫千佛等身口意一切施爲。非吾說所能盡。

當來後四代中。現圓滿時至尊。自爲神武輪。卽令豫爲隨持。衆多有情。足跡所至。教義普遍。對彼無數衆生。傳與心所願欲灌頂。隨賜記行訣戒等。能降三毒煩惱。妙藥法門。疇欲修持時。德雙入之王。亦如指諸掌。於善知第二主尊口之秘要。堪能受持深廣等法輪。轉繼續不斷之法布施。爲窮乏疴羸饑饉衆生。所開虛空藏門。行財布施。維時煩惱濁一切衆生。於此無常世間。微細安樂。中心怦動需財寶等。爲茲常見無理一切羣迷。及兵匪肆殺時。與之講善惡取捨等。依法財門善巧方便。令其和睦。不使爭鬥。及對鳥獸。一切生命等。行無畏布施。恒常對衆生憐憫護持。行慈布施。如是依四攝法善隨護持。乃至究竟一切智佛位。爲作嚮導。於光緒三十一年乙巳。偕英人臥克納而至印度。於金剛座等殊勝處之聖像上。裝金開光。散天花獻供。爲利益衆生發大願。得內外一切信心。讚歎供養花鬘。及印度鄰近諸國。讚歎供養。恭敬承事等。廣大信奉。英人藉迎英儲爲名。到印待以王禮。會晤英皇太子。於翌年

三月。回至西藏札什倫布寺。宣統二年庚戌。移駐拉薩。主宰教政。復蒞漢蒙藏各處。吉祥輪莊嚴之足。發心如白蓮之味。普遍十方。攝有緣具信衆生。如蓮華上。羣蜂畢集。供獻饗事。聞甚深妙法。見行不合一切外道。亦同生信。如是盛德大業。在過去知行具足之上師中。疇無與比。至於見行不合一切外道。能得其信仰者。於先達大師。更未之有聞。

至尊上師。自己不忘信心堅固之弟子時。輪金剛等灌頂記訣之一切。時刻護持。後四代現圓滿爲神武輪時。初期會合成就賢愚一切有緣衆生。均於解脫道顯密二宗中。爲之懸記。如是普知班禪大國師。於民國十四年乙丑二月二十日。至北京。駐錫中南海之瀛臺。暨觀世音道場南海普陀。文殊道場五臺等殊勝處。躬親往謁佛像。裝金奉獻衣服。其他供品無數。爲將普通釋教差別。宗喀巴教令其增長。俾一切衆生安樂。置於圓滿時之大筵等。發真實大願。心念口說。當此之時。見諸尊佛。與之晤言。諸多希有景象。聖德深潛。外不彰露。晉謁北京政府當局。陳述西藏情況。

政府以內政未靖。無暇西顧。十六年丁卯。設駐平辦事處於福佑寺。冬赴遼甯。駐錫瀋陽外攘關外之實勝寺。俗呼皇寺。

十七年戊辰三月。第六路前敵總指揮兼二十二軍軍長賴心輝。爲第九世班禪額爾德尼派遣四川代表宮敦札西呈請內附事。呈國民政府文云。

爲據情轉呈事。按據班禪派遣四川代表宮敦札西呈稱。爲呈請鞏固國防。挽救弱小事。緣西藏佛教。以達賴班禪爲主教。蓋西藏佛教普及之地。人民無不尊重信仰。達賴及班禪也。達賴駐於前藏拉薩。班禪駐於後藏之札什倫布。而其政治主權。前藏有一藏王。後藏有一夏白吐藩王。均直接由清政府委任。凡民財諸政。雖自行裁斷。尙須時同駐藏大臣商行。當光緒二十九年時。藏王登莫鋪。被達賴及諸大臣同謀定罪。拘禁逼死。從此教政兩權。咸歸達賴專職管握。宣統元年。達賴由京回藏。備聞邊務大臣趙爾豐至。在西藏竭力經營。整頓川軍大隊行進。藏官見勢不逮。日漸消滅。乃欲聯英爲外援。時受運動。忽聞漢

軍已越江達。而西札營相距拉薩。祇有數日途程。於是達賴畏罪。潛逃印度。時清帝聞達賴已出。曾宣布罪狀。褫革其名號。適時駐藏之聯欽差鐘統領等。請班禪到前藏。各民政事。同心合作。自此後藏僧民與漢軍。互相爲援。一切餉糈。莫不臂助。至民國元年。達賴乘機回藏。驅逐漢官。解散漢兵。宣言西藏獨立。隨卽侵犯西康。佔十餘縣地。解決邊軍。彭日升統領全部。是達賴妨害於中國。與中國仇怨之一點也。繼而擴充軍備。重興差役。對於班禪及後藏僧民。因爲親漢之故。嫉恨在心。乃勢迫借詞定罪。罰鉅金資。班禪無奈其何。只得就力量能及者。莫不遵從唯唯。繼又迫令每年納餉銀五萬兩。每兩合華銀五十兩。軍糧菁稞十萬石。並將後藏重要辦事人員。置之於獄。班禪見事不佳。無辜定罪。迫令如是。只得將所有數百年儲存佛用器具。以及金銀名馬。一概寄獻達賴。再三要求而不免。不得已。率隨從騎。潛行離藏入京。達賴聞班禪潛行。遣重兵追趕。幸未受遭危險。今班禪數千里苦苦到北京者。思漢藏自吐蕃與大唐和親。

以來。歷宋元明時皆朝貢中國。清代更爲接近。直接管握政治。西藏之主權。均在於中國。民國成立。五族共和。民心無不仰賴。如裸如襁。相提相携。維持西藏佛教之秩序。解決政治之腐敗。皆求援於漢。殊英帝國主義者。日張其勢。種種侵略之利牙。自西侵蝕。可謂危極矣。藏若失亡。康亦莫保。斯時不惟康藏唇亡齒寒。國家其必爲動搖矣。敝班禪觀念及此。非鬪爭個人之利權。所以遠來中原。急急再三要求者。欲求中央政府。以期早日解決康藏邇後之政策。並求脫離英人之侵略。鞏固國防。使萬民相安。廣化佛教。班禪不勝最大希望。今敝班禪到京四載。常見內部各省。戰事尙未解決。並在分裂中。對於康藏未顧及。現尙有他國派員來謁敝班禪。並許幫助擔任一切。敝班禪志尙未屈。宗旨正大。豈能輕盼他國相助。故損我國國體。當此漢藏一家。族類相關。但川甘雲三省。與康藏歷史素起鞶韉。乃最密切者。惟獨四川。故凡關於康藏諸務。時常仰賴川省爲前題。中央爲後盾。是以鞏固國防。拯救康藏民衆於水火。惟諸軍長是

賴敦以庸才。自前年由京奉命代表川甘後。於今夏進藏。盤桓數日。關於康藏最近情形。略有所聞。達賴新運大批槍彈到藏。與英人日益親善。對於內務政治方面。分出新舊兩派。以宗教關係。事事無不由中竭力挽回舊派。卽宗教喇嘛也。事雖如此。惟軍財主權。概歸新派掌握。如英國走狗之類。至於路政鐵道。已達大吉嶺。又由杠多至復司馬。開修馬路。均有數萬里許。尙繼續進修。倘不速圖挽救主力之方。則西藏之進。終歸於他國所有。不爲中國有矣。前彭統領駐康時。已失去十餘縣分。人民苦於藏關苛虐。鶴淚狐悲。無他伸屈。日望真正國民軍人出關。現所有未失之南北兩路。計十一縣分。自反正以來。多數長官。敷衍搪塞。只圖個人充囊之計。常爲民衆之要求。且重捐卡款。使民生計日迫。不能解決。於是盜賊蜂起。强悍稱雄。自康定以西。惟獨巴塘有少數軍隊。亦不成其偉大事業。不過虛名而已。至於行政及商業。日漸縮小冷落。現康屬有許多無識僧民。以爲西藏恃有英人援助。日趨文明。建築旅屋。圖以保險樂居。凡

是邊民無依歸。深受頻年兵燹之苦。雞犬不寧。生計愈演愈窮。大有印度亡國前轍之形。蓋自趙爾豐經營西康以來。迄今將近十餘年。皆高談治邊。遠爲吶喊。而實際一無確定實行。又無明瞭之表示。是以康事愈趨愈混亂。藏人覩此現象。乃鼓吹嗾使定鄉鹽井德榮各縣人民。將地方縣知事相繼驅逐。圖收漁人之利。此卽最近康藏之情形也。以上所呈各節。敬懇我軍長垂念康藏人民。一致擁護川局。各表親善。努力合作。向西進行。則可挽回主權。只享國民幸福。不然。達賴靡弱。大受英人野心侵略。康藏人民。流離悲痛。慘烈胡底。對於國防。曷可勝言。瀝血陳書。不勝迫切待命之至。等情。據此。查西藏關係國防。今班禪篤念救國。情殷內附。未便拂其所請。理合據情轉呈。伏候鈞裁。謹呈。

國民政府。

第九世班禪額爾德尼。因欲解脫信願堅固有緣衆生。轉深廣法輪。令一切心善保瓶。悉皆圓滿。卽赴海拉爾。旋抵達爾汗。旗溫都旗。東蘇尼旗。西蘇尼旗等。

處。宏法利生。並於斯時在南京設駐京辦事處。遼寧開蒙旗會議。應副司令張學良召。屆時列席。會畢。仍赴西蘇尼旗德王府百靈廟。啐經。僧俗等衆。均來皈依。禮儀之隆。歎爲希有。乃於蒙旗各地。傳時輪金剛大爲志求灌頂五次。二十年五月四日。由瀋滄臨首都。五日。出席國民會議。第九世班禪額爾德尼謹誌頌詞。略曰。

西陲遠人。得與盛會。曷勝榮幸。主席行總理主義。完革命全功。秉承遺教。召集國民會議。協謀國是。訂定約法。行見青白永揚。華夏光輝。三民長作全球楷模。禪傾誠內向。願政府軫拯藏民於塗炭。近以康藏紛顛和平。伏望諸公宏紓偉議。整飭邊疆。本總理濟弱扶困之訓。鞏國家主權領土之基。毋棄西方寶藏。是則班禪額手稱慶而心禱祝者。

是年七月一日晨十時。國府册授第九世班禪額爾德尼。護國宣化廣慧大師法號。在國府大禮堂舉行受職典禮。于右任代主席。授印並致詞。第九世班禪額爾德尼致答詞。文曰。

班禪東來。於今九載。幸我主席統一南北。奠定國家。始能恭謁首都。敬修觀禮。私衷慶幸。莫可形容。乃逢國民政府奉行先總理遺教。召集國民會議。得與盛會。榮幸方深。更蒙政府俯念微忱。頒賜嘉號。今日赴府祇領。益增慚悚。此後惟有盡宗教之本能。虔誠祈禱。護國基於永安。宣化育之宏遠。運廣長舌。譯述三民主義。啟慧悟心。領化蒙藏人民。誓據肝膽。圖報涓埃。謹貢愚忱。肅陳謝悃。并給册授文。文曰。

廣納宇宙。知微亦復知彰。溥化黔氓。有德斯能有衆。班禪額爾德尼。撫輯藏服。翊戴中央。敷教元黎。効忠民國。實闡無爲之妙諦。琳膚無上之殊榮。允宜授予護國宣化廣慧大師稱號。朗燭意珍。奉揚休命。德音普遍。布三民五權之宏規。法鐸昭垂。彰六度萬行之妙用。祇服琳典。益鬯宗風。國民政府主席蔣中正。繼由文官參軍內政蒙藏四長。送第九世班禪額爾德尼出國府。典禮局將國府備贈禮物。計一、銀質鼎一座。二、琺瑯質鼎一座。三、貢緞八疋。四、繡花屏四幅。五、彩綾四

卷等。以極精緻之玻璃盒盛之。運送三元巷班禪招待處。胡漢民戴傳賢並贈觀音像一座。黃絹題詞一幅。絹聯一對。玉魚一雙。銀鑪一座。三日。國府二次常會。規定年俸條例如下。

護國宣化廣慧大師。年俸定爲十二萬。由中央按月發給。其個人費用及隨從僧徒生活等費。均由年俸內開支。每月再由中央津貼辦事費三萬。所有招待費。一律停止。

旋以海拉爾蒙民。屢次端請前往講經。乃於七月八日由京起節。十日抵平。二十日抵瀋。二十三日。首途呼倫貝爾。二十九日抵海拉爾。歡迎極盛。卽於其處唸經。宣化蒙民。旋西行駐錫百靈廟。

二十一年十月七日。第九世班禪額爾德尼由百靈廟蒞平。寓中南海大禮堂行轅。並分別致電南京國民政府。中央黨部。南京各院部會。江西九江蔣委員長。太原綏靖主任閻錫山。報告抵平。同時並電察哈爾省政府主席宋哲元。綏遠省政府

主席傅作義。致謝招待盛意。初、北平各大德籌備時輪金剛法會。近以大師業已抵平。於日前在北平故宮太和殿建壇設醮。開始誦經。十月十三日。法會發起人等特通電全國募捐。以襄盛舉。原電文云。

頻年水旱兵戈。憂患相來。欲求運會之轉移。端賴人心之感已。西域時輪金剛經理留易數相同。依法修持。確能轉移世運。安邦定亂。同人等特於上年發起時輪金剛法會。敦請法主班禪國師。來主其事。承蔣總司令與張副司令各爲協助。使創舉之法。推闡發揚。茲者國師寶錫。已於魚日抵平。佳日開醮。至儉日修習各部無上密法。傳受時輪金剛經灌頂。並修護謨火供。以資祈請。護國息災。濟幽和顯。對於各省有連年陣亡官兵。災傷黎庶。追悼超薦。其私家或團體等。欲薦先資福。均可加入本會。以資酬願。而作功德。其各寺廟等。應於此數日間。唸誦護國仁王般若及金光金剛等經。更願各地達官長者。居士婦孟。自勸勸他。多助寡助。均可先後彙交北平雍和宮本會事務處。庶幾功德普施。祥和

召致仁望仁風。曷勝宏歌。時輪金剛法會。張學良、朱慶瀾、熊希齡、王九齡、趙恒惕等同叩元（十三日）印。

大德段芝泉。因恭屆勝會。特作時輪金剛法會緣起文云。

密宗部中。時輪金剛推爲首列。世尊成道期年後。顯現法身。在鷲峯山說般若波羅密多經時。併在印之德聚纒集塔中。請時輪金剛經。香拔喇國王月善。親爲記錄。其國在印度之北境。地形圓。內有如蓮蕊之大雪山。花分八瓣。推行四遠。兩瓣相距。中間長河。靈氣所鐘。形狀奇異。月善歸來。造大壇城於馬拉雅大林之中。貯經於其間。相傳四十三世。多地藏文殊及遣邊威德諸明王所化現。後八百年。班禪希羅幹及低薩且幹。布教於印度希利巴喇波的。及波藥羅慧。并先後傳至西藏。綿長至今。未嘗稍輟。此時班禪國師及安欽呼圖克圖。適來與辛大法師動法會之議。向者。震旦緣熟。達摩東來。一花五葉。宏揚於華夏。時輪金剛又何獨不然。小之救一國之災。大之乃滅全世界之浩劫。其他及

身成佛者。更不暇以數記也。但向在印藏。結緣不廣。所以歐洲之戰禍。東隣之震陷。我國念餘年之擾攘不已者。無非同業之感。召有以致之。因果循環。世人不察。負佛悲憫之懷。要之亘古未聞之奇異。今已相繼而不絕。倘劫再見。恐千百倍於前。更有出人意料之外者。仰體佛之大慈大悲。普度宏願。速登衆生於彼岸。皆莫時輪金剛若也。今屆末法之際。人心澆漓。又值大陸之衝。寰宇比鄰。啟發益廣。不惟灌頂學人。功成圓滿。卽在四十里內。當傳法之日。虔心觀想。亦得灌頂之效。其他一覩壇場。一聆法音。能脫一切罪戾。亦可結他日往生之緣。雖然。佛法無量無邊。大千世界。莫不函育其中。何災害頻加而不已。良由衆生困於情欲。自拔無術。無緣難度。深盼悲心信願之士。普爲傳播。速其醒悟。俾知法會離逢。回頭是岸。自當爭先馳赴。勿待事後追悔云爾。

復有文殊變化法王所駐北平一切佛教會衆。至心勸請。因副所願。於第十六丁卯之壬申年九月二十二。釋尊由天降世殊勝之日。卽國曆十月二十一日。在太和殿

修建時輪金剛法會息災救劫道場。由安欽呼圖克圖長教。包林材曉兩堪布傳教。其下並有誦經喇嘛二十餘人。是日上午六時半。第九世班禪額爾德尼蒞壇誦經。至十二時下壇。下午二時起。舉行灌頂典禮。復繼續講經。至下午五時退座。計自二十一日至二十四日。共開法會四日。二十五日憩息。二十六日續開一日。下午五時。法會圓滿。因欲開示時輪原因。向衆宣講德時輪預備之次第。求其對法發信心。決知故。故特詳叙緣起及經歷。是亦成規也。此有三。本法最初本師云何說之理。中季如何盛行於香拔拉國及印度之聖處。末後如何譯至西藏。並由大恩本師起。至根本上師止。未嘗中廢繼承情形。均宣揚無遺。如是元佛德時輪如童七灌頂。及大無上灌頂。大金剛阿闍黎主灌頂。圓滿傳授。如是等佛身口意無量。所作隨喜。

十二月十二日。由平起節。十四日蒞京。晉謁總理陵墓。行謁陵禮。列席三中全會。將建議關於蒙古邊防問題。並與中央要人。接洽宣化內蒙各地事宜。預定北返後。駐錫百靈廟。轉赴內蒙各旂宣化。二十四日晨十一時。在國府大禮堂。就西陲宣

化使職。舉行就職典禮。行禮後由林主席授印。繼行宣誓禮。張繼監誓。第九世班禪額爾德尼舉右手。用漢文宣讀文官誓詞畢。張繼致詞。林主席致詞。第九世班禪額爾德尼致答詞。其原詞云。

班禪自來中土。已及十年。無補時艱。深滋內疚。本年春季。蒙政府授以西陲宣化使。才慚樛櫟。義切苞桑。頃者入京展覲。於本日宣誓就職。恭聆訓詞。嗣後當竭盡忠誠。宣揚德意。冀以宗教之力。効命中樞。振導人心。挽回末劫。邊陲康樂。僧俗咸歡。謹此致答。

於時首都各大德。擬於寶華山大寺。籌建十二大願道場。誦經七日。爲國家祈禱和平。並請第九世班禪額爾德尼主壇。二十二年一月二十三日。第九世班禪額爾德尼。出席蒙藏委員會紀念週。演講西藏過去之歷史。佛教之來源。中央與西藏之關係。文云。

西藏在二千六百年以前。幾無人烟。後有印度王之一後裔。由印度來至西藏。

西藏人見其像貌舉動與衆不同。於是奉之爲王。尊稱之爲彥赤增布。西藏之有國王。卽自此始。

彥赤增布之後裔。繼續爲王。至於二十餘代後。至唐朝之時。有王子名松村積布。迎娶唐之文成公主。和尼泊爾國王之女爲后。因文成公主而迎來釋迦牟尼佛像。因尼泊爾國王之女而迎來至尊墨雪多吉佛像。故彼極爲信佛。於是派大臣吞米桑布札。與西藏之有志青年。前往印度學習文字。吞米桑布札。研究極有心得。回至西藏。遂創造藏文。翻譯若干經書。並規定關於政教之各種制度。西藏之有文字。以及各種制度。卽自此始。

當松村積布之時。西藏已統一。佛教盛行。再傳三世至默瓦葱。又與中朝之敬欽公主結婚。生一王子卽赤松德貞。卽位之後。聘請印度之大博士錫瓦槎噶。馬拉喜拉上師白瑪雌迺等。翻譯顯密二教若干佛經。其時中原又有若干高僧來至西藏。且建修若干寺院。此時西藏之佛教。可稱一時之盛。當時所翻譯

之各種密宗經書。後人稱爲舊經。

自默瓦葱再傳三代至郎達瑪。在西藏之佛教頓生波折。其原因由於郎達瑪不信佛教。將所供之佛尊暨所譯之佛經。盡量燒燬。將信教之喇嘛。盡力驅逐。於是佛教因之衰弱。結果郎達瑪被拉魯白多吉刺死。其後人亦奔散四方。其中有一後裔逃往安日。遂在安日爲王。

郎達瑪死後。其子郎德月松繼位。前日出亡各地之高僧始陸繼歸來。其後裔之在安日者。有拉喇嘛亦西月及詳秋月二人。立心恢復佛教。由印度聘請覽吉白登阿得夏到後藏。并歡迎其高足弟子杖登把吉亦確迺及其他有學識之徒衆。講究佛學。翻譯經典。於是佛教在藏。較前赤松德貞之世。更爲興盛。此時所譯若干之顯密經書。後人稱爲新經。

後人稱赤松德貞時所譯之佛經爲舊經。稱拉喇嘛亦西月及詳秋月時所譯之經爲新經。其實一切顯密之佛經。僅翻譯之時間有先後之不同。而於佛經

中之意義。並無若何之差別。故實不能有新舊之分也。

其後西藏無統一之王。彼此內爭。相傳於其時曾被中原征服一次。後至元時。曾派兵來藏。維持治安。其軍官回藏時。向元帝陳述經過。並稱薩迦班直達勢力之盛。此元帝藏人謂之噶登王。於是噶登王特聘請薩迦班直達到中原。薩氏到甘肅蘭州。大傳其法後。竟未前行即死於此。蘭州之人蓋造一塔以盛其屍。至今尚在。

元噶登王之子接帝位後。又聘請薩迦班直達之孫子卓根却吉帕巴至中原。卓氏向元之君臣宣講。結果給灌頂及諸經。元帝大喜。尊封卓氏爲國師。并付以西藏屬其管理。卓氏歸時。途經西康青海至前後藏。沿途調查各地戶口。計數有十三萬。故今尚有十三萬之名。

薩迦班直達之後裔。如是在藏掌權者。約有七十五年。其後有臣拔莫逐巴等。起而推翻薩迦之權。於是有拔逐勒東積雪仁奔巴藏王等。先後各立小國。但

此時西藏與中原往還繼續不斷。先後有喇嘛根親，却各月色，及親郎去札三位，積瑪人等到中原。

其後即在五百七十五年以前之明朝時，宗喀巴大師到西藏整理佛教。於佛經教義有違反者，則除而去之。於是佛教如紅日東昇，大放光明。世人稱之爲黃教。原此黃教非有若何之特新創造，不過除去舊有之積弊，恢復原來佛教之真精神耳。故黃教在西藏稱爲革魯八，卽爲善良規則之意。

明永樂時，曾幾次聘請宗喀巴大師到中原，但大師以適當振興宗教之際，事實上不能離開西藏，故派遣其弟子降清，却吉釋迦亦希代表降氏至中原，對佛教大爲宣傳。明之君臣極端崇拜，於是中原爲黃教之大施主。

大師之大弟子吉超、凱珠、吉更登祝三人，與其若干徒衆，努力宣傳，建修若干宏大寺院。於是黃教勢力極爲擴大。蒙藏康青無不普遍。達賴第三世鎖囊嘉槎，受蒙古王阿登歡迎，而至蒙古。達賴喇嘛之名，卽由此蒙古之王所供獻。此

時明帝對之封贈亦多。

自此以後。自凱珠起至第四世班禪羅桑却吉結村。與自吉更登祝起。至第五世達賴喇嘛昂汪羅桑甲村。會商派代表四清却吉到中原。時值滿清當政。極爲尊敬。故特冊封達賴班禪。及頒發金冊印信。後來青海方面。雖有固始丹增却吉。率兵侵藏。佔領後藏之西德等地。自稱藏王。但其對於班禪達賴。則仍極端崇拜。

清順治時。又聘請達賴班禪到中原。班禪因年逾八十又三。不便於行。至中原者。僅達賴五世。達賴至。清帝封贈。甚爲優厚。其後固始丹增却吉之子丹增達亨。繼爲藏王。世代相承。至康末雍初。準噶爾帶領蒙兵侵入西藏。其時衛藏又發生內鬨。於是清廷派兵平亂。亂平。卽指派後藏普拉四郎達吉爲藏王。王乃革興制度。銳意振作。其時清廷派遣駐藏欽差二人。率相當防軍。駐守西藏。以保護達賴班禪。并合理藏政。乾隆四十五年。班禪第六世班登亦惜。又入中原。

清廷照前封贈。禮儀仍極優隆。中藏間之感情。亦特別融洽。民國成立以後。駐藏大臣撤去。漢藏之間。於是隔膜。感情漸衰。康藏民衆。感受不小痛苦。余目不忍觀。乃仰仗我政府德威。入至內地。至今已十有餘年。對政府愧無若何貢獻。對民衆愧未有何裨益。余學術淺陋。西藏歷史不能詳述。僅將所知者略陳如此。

我亦曾至東西兩蒙。雖略知其情形。但以蒙古毗連內地。其要多爲世人所知。不待余再詳述。不過當余去年由此赴蒙之時。承政府及蒙藏委員會之委託。時記在心。未嘗或忘。故在海拉爾方面。余已將中央政府愛護人民之至意。詳爲宣述。兩月之後。適值東北事件發生。東盟途經。因之斷絕。在海拉爾爲中日俄三國交界之地。甚恐變化莫測。尤其恐錫林果勒盟。將受他人誘惑。更有以宣傳維持人心之必要。故不敢辭却勞苦。卽由北路經過外蒙邊地。以至內蒙各盟旗。籍宗教以廣爲宣傳中央之意旨。及幫辦蒙民之一切設施。並力說五

族應堅固意志。切實聯絡。故蒙古各王公民衆。悉爲感動。力行團結。乃派代表來京。凡此。皆爲諸位所知者也。

現在又蒙政府委余以宣化西陲之職。余爲實踐責任。不久即將赴西陲宣傳文化。提倡宗教。使蒙藏民衆明瞭中央實際之意旨。與五族聯合之必要。余對此責任。極願負擔。至康青兩省。雖有名詞上之區別。其實皆爲蒙藏之區域。何以言之。因藏之名詞。有大藏小藏之分。大藏卽爲西康。而青海之南。多屬西康民族。又青海之北。多屬蒙古民族。故謂康青卽爲蒙藏區域。亦無不可。且如其他宗教風俗文字。皆與蒙藏相同。故余對於西陲一隅。極願盡責宣化也。

但余學識疎淺。甚望諸位時錫南針。以匡不逮。蒙藏委員會委員長及諸位過去對於藏蒙事務甚爲熱忱努力。余謹代表蒙藏同胞。深誠致謝。過去蒙藏地方。雖對中央似無若何供獻。但五族一家。且爲我國國防。關係極爲重大。在宗教上又爲佛教來源之地。今以毗連外國國境。若不共同設法力圖保全。一旦

被他國佔領。則宛如一人之被截去其手足。証以今之外蒙。我國於政府方面。其感受痛苦爲何如也。余深望諸位詳察外蒙之過去。而多注意於蒙藏之將來。及早設法。籌使宗教興盛。則政治自然昌明。現在余謹祝委員長諸委員康健。并前途勝力。

旋因華北事起。北平軍分會電邀第九世班禪額爾德尼。西行宣化。蒙古各盟旗。亦來電迎請講經。乃與中央各要人晤商。準備赴蒙古各地宣化。於二月七日離京。九日抵平。籌設西陲宣化使署於青海。並遣安欽呼圖克圖入藏。十二日離平。十四日抵綏。十六日起程赴百靈廟。五月二十三日。率堪布隨從等八十餘人。先後至錫林果勒盟及烏蘭察布盟等處。在各地大小寺院設壇。唵經宣化。宣揚中央愛護蒙民德意。歷五越月。復將數萬牛羊馬匹現金等。分捐各大小寺院。令各喇嘛按年唵誦作基國宏德大經。祝中國永慶昇平。嗣卽駐錫百靈廟。旋以內蒙自治問題發生。協助中央策劃大計。後以內政部長黃紹雄蒞蒙。復協助之辦理蒙事。中央深倚重之。

乃於十月十八日。國府令曰。

護國宣化廣慧大師西陲宣化使班禪額爾德尼。矢忠黨國。願力恢宏。前膺宣化使命。寒暑過征。勿辭勞瘁。上以闡揚中央之意志。下以激發蒙族之忠忱。德音廣被。吟域胥融。頃者國難未已。疆隅多故。該使力鎮危疑。維繫邊局。着念勤勤。尤深嘉慰。特予崇褒。以彰殊績。此令。

當第十三世達賴喇嘛寂世之夕。第九世班禪額爾德尼令百靈廟各招全體燃燈。二十里內晝夜通明。誦經三日不斷。蒙地緇素。當時均莫明其妙。及後南京班禪駐京辦事處。來電報告第十三世達賴喇嘛入寂消息。衆人始知第九世班禪額爾德尼。已預知第十三世達賴喇嘛之入寂。十二月二十八日。第九世班禪額爾德尼。電達內外蒙古青海西藏各王公寺院。暨各地辦事處。各按級守禮。共誦大經。追薦誌哀七日。電文略曰。

項據京電。駭悉達賴大師於本月十七日圓寂。惡耗傳來。哀痛欲絕。衆生不幸。

我尤獨傷。前歲曾遣安欽呼圖克圖入藏。正欣追隨有日。忽聞達師解脫。宇宙頓晦。回望西土。彌益愴懷。除呈請政府。從優追封隆典祭悼外。仰各寺處於奉文日起。誌哀七日。停止娛樂宴會。并通知喇嘛寺廟整理委員會。轉知當地各寺院喇嘛。一律虔誦大經。追薦祈禱。呼畢勒罕早日轉世。以維藏局。而安衆生。此諭。班禪額爾德尼印。

南京國民政府於二十三年正月。屢電第九世班禪額爾德尼。請火速晉京。籌商邊事。並列席全會。及任建壇追薦第十三世達賴喇嘛之主壇。百靈廟喇嘛。以第九世班禪額爾德尼即日晉京。特唵經五日。請大師掌法輪。蒙人冒風雪爭往頂禮者千有餘人。第九世班禪額爾德尼在百靈廟行轅。親寫一經。追薦第十三世達賴喇嘛。藏名霄登鈕覺索德。漢譯爲祈禱達賴靈覺早臨之意。並以十萬元分匯印藏康青蒙五地。爲超薦第十三世達賴喇嘛香火之資。遂於二十三年一月十五日。由百靈廟起節。二十四日蒞京。翌晨七時謁陵。九時列席全會。接見西康諾那呼圖克圖及

烏肅拉木楞司令嘉木樣呼圖克圖代表黃正注。歡迎第九世班禪額爾德尼入藏。以安邊圉。初。西藏拉木楞嘉木樣呼圖克圖於一月十七日。電致中央。文曰。

南京國民政府勛鑒。東北淪陷。西陲堪憂。現值達賴圓寂。班禪遠在蒙疆。藏事無人主持。羣衆失首。情勢危急。嘉木樣歷來分掌教務。時以國是爲重。威望班佛鎮危定傾。伏祈急令班禪大師。速定善策。兼程入藏。主理一切。免受外惑。固我邊圉。國防幸甚。中華幸甚。嘉本樣呼圖克圖叩。

二月二十日上午十時。第九世班禪額爾德尼在國府禮堂宣誓。就國府委員職。林主席領導行禮。中央派葉楚傖監誓。并致詞。旋由大師答詞曰。

班禪歷代以來。受國家優禮。惟以承祖國之教澤。奉國家之法令。上弘下化。饒益衆生爲務。幸賴三寶加被。四恩保佑。得以五百餘年奉職無缺。感激之情。匪可言喻。數年以來。班禪屢次受政府之優遇。此次又兼中央選任爲國府委員。今後益當竭盡至誠。仰體總理天下爲公之心。推行主義。弘揚大法。以期弼成。

國家之統一。建設人民之幸福。促進世界之和平。尤望中央諸位長官同志。及全國僧俗大眾。惠愛有加。時施法教。敬祝民國萬歲。國民康樂。主席健康。政府同人百事如意。

二月二十五日。爲第九世班禪額爾德尼誕辰之期。林汪于等。均饋送珍品。大師以現當國難期間。又值第十三世達賴喇嘛圓寂。故對各方致送禮物。均一律辭謝。並懇辭賓友往賀。誦長壽經一日。行財佈施。澤及寡孤。戴院長對大師三度入京。兩番赴蒙。護國宣化。財法兼施。深致感佩。因撰一聯爲贈。文曰。

慈無量。悲無量。喜無量。護無量。壽命亦無量。

施吉祥。愛吉祥。利吉祥。宣吉祥。世界同吉祥。

西藏自第十三世達賴喇嘛圓寂後。藏中人士紛紛電請第九世班禪額爾德尼回藏。於時青海各呼圖克圖。於二十六日。電致蒙藏委員會。請第九世班禪額爾德尼迅速回藏。主持大計。原電云。

蒙藏委員會委員長石青陽鈞鑒。頃奉班禪大師電。達賴圓寂。各大小寺院。應
嗥經追薦等因。藉此國難未已。星殞西方。藏中主持無人。西陲可慮實深。懇請
鈞會。轉請中央。迅請班禪大師入藏。主持一切。以安西陲。而慰羣望。無任感禱
之至。青海土觀呼圖克圖、阿嘉呼圖克圖、丹噶爾呼圖克圖、又發曹冷里雅呼
圖克圖等叩。

三月十九日晨十一時。第九世班禪額爾德尼。應中央大學校長羅家倫之請。前往
出席總理紀念週。並講演西藏政教之始末。由其秘書長劉家駒翻譯。文云。

釋迦預言。

今天把西藏的政教始末。簡略地談一下。最初西藏地方

沒有人煙。全是大山大海和毒蟲猛獸所佔據。釋迦牟尼所說之白蓮經上曾
說。佛圓寂後二百年。吾道將盛行於雪國（指西藏）之預言。其後西藏各地
之海水。日漸乾涸。而成陸地。蒙觀音大士與佛母加被。由諸天往生人間。然後
人類逐漸繁殖。上有安日三地。中有衛藏四區。下有多康六高原之稱。

一世藏王。

發現人類後不久。有印度王蝦畢族後裔。被充至西藏。即遇藏人數名於田野間。藏人見之。觀其容貌潔淨。舉動溫文。咸以爲天子降臨。用木轎六人。肩回城內。立之爲王。此卽西藏第一世藏王仰趾曾布。數傳至拉托。日業增盛。建築雍布拉槓宮殿。屋頂上由天空落下邦公卡甲巴等佛經。捧回家中供養。此時西藏尙無文字。不明內容。但該王夢見佛祖開示云。再傳數代後。卽可明瞭。於是名此經爲仰布桑瓦。朝夕供奉而祈禱。則諸願成就。又傳數代至藏王松贊槓布。其人係觀音大士所轉身。頭頂上生有無量光佛。

藏文來源。

該王卽派多數青年往印度研究佛經。其中有吞米桑布札者。獨得深造。精通印度文語。回藏後。爲便利翻譯佛經計。依印度文而創造藏文。將梵語中不用之五音母除去。又添加藏語中應用之音母假卡等六字。造成藏文字母三十個。及拚音綴句文法。又翻譯佛經多部。

中藏聯姻。

唐太宗以文成公主嫁給該王。並贈釋迦佛像。此像在西

藏是很著名的。此後中藏卽有聯姻的關係。中藏一切制度法律。均以佛經爲原則而奉行。至此又傳三世至彌勒佛轉身之藏王耻松德增。

舊經時代。

此王在藏廣修佛寺。又由印度迎接堪布錫瓦初法師白

馬桑巴堆等班直達（博士）祝討（高僧）來藏。翻譯顯密兩宗之佛經。佛教於是大盛。王母是由中土而來。名敬欽公主。又傳三四世至藏王朗大瑪。暴虐無道。焚經燬佛。又命佛徒一律還俗。佛教衰落約四五十年。以上一段。後人卽名之曰舊經。又稱佛教初盛時代。以後雖有藏王之宗族。但各自稱霸。不相統屬。

新經時代。

此時期中。有一代王族後裔。曾求降於中國。其後有無量

光佛轉身之覺吉阿得厦並班直達八人。由印度請來宣講佛法。門徒中如觀音大士轉身之卓登巴等最有名。申述佛法。尙慈悲及發菩提心愿等事。彼等曾作廣大之宣講。並將密宗傳於受器者。此時卽有卓墨麻巴各尼日桑等翻

譯。相繼輩出。廣譯密宗顯教經文。此時佛教又復昌明如昔。後人即稱爲新經。宗派甚多。其後有葛當巴、恰青巴、措文加巴、噶菊巴不同之宗派甚多。此等宗派。因法師之意見規則稍有不同。究其主義。並無新舊各派。著名法師。經內地固始汗王迎至中土者亦多。此時能將全藏政治統一者。亦有數代。惜年代不久。有力之各城市均多自主。

黃教創始。明永樂年間。文殊佛轉身之宗喀巴出世。將顯密兩宗加以整理。摒除後世所添加之意見。恢復原有之真義。名之曰黃教。永樂皇帝召彼入京。未及去。派弟子降青缺吉到中土。宗氏所建築之寺院。即今之噶登寺。爲黃教之總寺及發源地。其徒扎希白登建白棒寺。降青缺吉建色拉寺。吉更敦珠建扎什倫布寺。此四寺即西藏著名之四大寺也。

二大弟子。宗氏大弟子結操、凱珠。此二人一係無量光佛。和觀音大士所轉身。繼掌衣鉢。世世轉生。即達賴與班禪是也。宗喀巴弟子中曾到內地

朝拜皇帝者。卽第五世達賴和班禪羅桑缺尖。西藏政治。自藏王朗大瑪被刺後。各自稱霸。幾經政變。但宗教反而昌盛。其後達賴五世及班禪羅桑缺尖。入京朝謁。清皇清廷以優禮待之。卽爲中藏佈施結緣之始。其後固錫丹增却吉及其子丹增達亨爲藏王。尊崇佛教。政治清明。彼卽將後藏獻給班禪。前藏獻給達賴。分土治理。

蒙兵侵藏。未幾準噶爾帶領蒙兵侵入西藏爲王。清廷始派兵來藏。平定準噶爾之亂。卽指派後藏四郎大吉爲藏王。王乃革興制度。銳意振作。乾隆時始派駐藏欽差二人輔佐班達。駐守西藏。並兼攝藏政。此時西藏卽爲中國之領土矣。凡藏中外交軍事及重要政務。均須商同欽差稟明清廷。始得執行。其他地方事務或任免噶倫以下官吏。一同欽差商酌辦理。秩序井然。互相來往者。亦日漸增多。感情亦極融洽。皆佛教之力也。

崇信佛教。

因全藏人不分老少僧俗。無不崇奉佛教。上之政治法律。

下之風俗及生活。莫不表現佛化精神。凡法律所不能及者。宗教即可輔助之。此種政教合一之制度。行於西藏甚爲合宜。再班禪到內地十餘年後。見總理之三民主義與佛教之慈悲救世互相吻合。信仰之餘。深感總理所講的忠孝仁愛信義和平。都是救人救自己的大道。將來傳播到蒙藏。一定會歡迎的。因爲宗旨同佛法是符合的。

四攝度生。

今天順便把佛經上化人利他的四攝度生的要義約略的談一下。假如能實行起來。不但革命可以成功。就是一切政治教育都會有不可思議的進步和發展。四攝法第一是佈施攝。你如存心救人。先要觀察所要救的人。是歡喜財的。就佈施財。設如他是歡喜法的。我就佈施法。使他因是而生親愛之心。愛我之道。現在之人。善言犧牲。實卽佈施之義也。第二是愛語攝。隨衆生的根性。用好聽的話和和霽的顏色來安慰他的心。或用比喻來使他明白其中的善惡。使其因是而生親愛之心。皈依我道。近人從事宣傳感動

他。往往不依此法而失敗。第三是利行攝。起身口意之善行利益衆生。使之由是而生親愛之心。歸依我道。這條就是要叫人以身作則。盡力推行。第四是同事攝。以法眼觀衆生之根性。隨其所樂。分形示現。同其所作。使霑利益。由是而令其歸依我道。此條就是叫我們要善與人同。人有善行。我助成之。已有善行。亦必令人同作。使共收善果。以上四攝。因時間的關係。略舉大意。不及闡詳。但望各位舉一反三的來採行這法。用以施教施政。將來定會得不可思議的效率。

希望諸生。

貴校是中國最高的學府。國人對諸位希望甚大。中央設

校來造就諸位。其用意就是希望諸位將來建設一種新事業。來救中國。救世界。各位自己不遠千里而來。求學的目的。並不是爲個人升官發財。都是想把學問造好。將來作救人救世的工作。這就是釋造佛救世菩提願了。

國府林主席。以晚近國難未已。災劫頻仍。非提倡佛學。不足以救正人心。挽回

災劫。曾邀請第九世班禪額爾德尼。往杭州佛教會。唵經數日。以資倡導。第九世班禪額爾德尼。頗表同情。且亦因久慕滬杭名勝。欲往一遊。及行政院秘書長褚民誼。抵滬。復與滬埠佛教同仁接洽。嗣褚氏返京。與戴季陶等商洽。以此次第九世班禪額爾德尼赴杭。機緣殊勝。已徵求滬佛教界段芝泉、王揖唐、許世英、屈文六、王一亭、黃涵之、關炯之等之同意。爲時輪金剛法會之發起者。褚氏二日致屈氏電云。時輪法會。在京徵求發起人。有戴傳賢、居正、林翔、石青陽、趙丕廉、黃慕松、謝健等。並已致電浙省魯滌平主席及杭州周象賢市長。請保護招待。并約當地官紳入會。特聞。及後戴氏由京抵滬。卽接洽招待第九世班禪額爾德尼來滬轉杭。主持時輪金剛法會事宜。協商舉行日期及地址。嗣卽在滬假雲南路仁濟堂爲辦事處。組織理事會。推舉理事。十八日。開首次常務理事會。決議京杭設分辦事處。並函中國佛教會。轉函各省大叢林大德。一致參加。弘揚佛法。推舉理事。分向各省募捐。杭州事務所設菩提寺。南京事務所設公餘聯歡社。並聘請榮增、嘎沁導師。超一法師。程文淵居士。

翻譯第九世班禪額爾德尼修法時之開示。及灌頂次第規則。假大安旅社爲譯場。致函北平古物陳列所。假用前次太和殿所用之檀城木架幡幢等物。迎請蒙古喇嘛三十餘衆。並攜帶法器數十箱。蒞杭。並擬訂宣闡計劃大綱十則。宣闡方針四則。又關於各地善信參加法會薦亡延生事宜。亦訂有辦法六條。志願書式兩種。分載各大報。以便周知。

啟建時輪金剛法會募捐啟

曩歲班禪大師北來。曾請來杭傳法。時以機緣未熟不果。二十年夏。平津人士。倡請修建時輪法會。籌備經年。遂於翌年秋。在太和殿舉行。越七日圓滿。灌頂受法者。衆逾十萬。爲中土未曾有之勝會。東南善信。以道路遠阻。參加者鮮。所願未償。耿耿於懷。頃 大師蒞京。同人復申前請。得邀 慈允。定於本年四月二十八日（夏曆三月十五日）起。假西湖靈隱古寺。啟修時輪金剛法會。謹爲我十方善衆。略宣其義。

語曰。福生有基。禍生有胎。種因得果。不爽毫釐。自古已然。於今尤烈。我國年來。天災人禍。內憂外患。相逼而來。生民之苦。逾於殘唐五季。况值列強。爭擴軍備。殺人武器。日新月異。公約破棄。經濟衰頹。世界大戰。一觸即發。將來慘痛之鉅。而且廣。當更甚於前數十倍。可斷言也。此大禍之來。乃爲果報成熟。而其所以招致之者。乃由於共同造因。欲圖挽救。惟須群衆一心。始能感而通之。是以古人一遇災祲。上者罪己。下者修省。遂足以感召天和。消患無形。今則人心浸以衰矣。非仗佛力之加被。末由消除此浩劫。

時輪一經。爲無上密乘五大金剛之首。上論日月星辰。下訖草木沙石。配以人身精氣脈絡。精此學者。如遇日月剝蝕。風雨愆期。率以一身驗之。而皆準其廣大精微。實屬不可思議。且六道含情。遇此勝因。雖未詣壇。凝念觀想。能得灌頂。或未如儀求法。但一聞鈴聲。一睹壇儀。乃至聞時輪金剛名者。得亦深種佛根。若經上師回向所及。而預此會者。又能虔誠存想。則無間遐邇。必同受法。

益不特息災已也。依西域大德留記。昔第一班禪。曾作香拔喇部主。未來且復生彼土。今請其化身應緣。據理當有殊勝功德。昔元明清代。供養喇嘛。主持國醮。著爲例典。班禪爲我國師。值茲喪亂頻仍。舉世恐怖之秋。自應虔情叩請。假借法力。爲國內消災患。爲世界祈和平。惟茲事體大。需費甚鉅。非少數人士所應爲功。應請十方善信。不分國土種族。各量其力。廣行布施。庶幾積土成山。細流歸海。同種善因。消除共業。轉禍爲福。胥在此舉。

第九世班禪額爾德尼。於四月二十六日蒞杭。駐錫靈隱行轅。翌日休息。二十八日始在靈隱舉行時輪金剛法會。是日上午八時半。大會全體人員。焚香至朱莊迎候。由靈隱寺和尚響愚前導。至九時。第九世班禪額爾德尼抵法壇陞座。各居士善信。一一參見。旁列喇嘛堪布和誦金剛經。續行響樂。繼由第九世班禪額爾德尼主講。裝播音機播送。至十時許退座。於大悲閣休息午餐。下午一時三十分至四時誦經畢。第九世班禪額爾德尼卽說時輪灌頂攝授弟子之開示。到會聽衆計有二

千餘人。說法時用播音機擴大聲音。聽者莫不獲受法益。二十九日午刻。第九世班禪額爾德尼率諸喇嘛開始建造壇城。壇城者。時輪金剛法之曼荼羅也。建造伊始。先作淨壇法事。由第九世班禪額爾德尼及兩堪布。登壇城基地。衆喇嘛環列壇側。相和唵誦。奏樂。第九世班禪額爾德尼等三人在壇基上安置八方標柱。每安置時。由一人捧柱。兩人蹲跪作法移時。除東方建立雙柱外。餘七方各安一柱。嗣在東方雙柱處設案供。第九世班禪額爾德尼大師在中央向東對之持誦咒語。以爲加持。兩堪布南北對立。相和持誦。最後撤去東方案供。由第九世班禪額爾德尼用淨水洒壇。在中央用水書梵字於壇基。仍作法移時。加黃粉末於其上。復將供案置於其前而退。此爲淨壇之儀式。壇基形式。用赤色土。高約盈尺。徑約一丈之圓形臺。外周用木框圍之。於東西南三方各立兩柱。高約三尺。相距尺許。柱之外側。畫以金剛杵。此其大概也。第三日仍誦經作壇城。第四日爲五月一日休息。仍造壇城。從第五日起。卽五月二日。約一星期間。均造壇城。由各喇嘛誦經。五月三日。法會奉第九世班

禪額爾德尼之命。設千僧齋。午刻舉行。第九世班禪額爾德尼則於七日、八日、十日、午後二時。升座爲大衆說法三天。其說法大要如次。(一)說顯教與密教。是互有關係。不可偏廢。(二)密乘須以顯教爲基礎。(三)顯教要義。學佛當發菩提心。真實心。密宗亦然。(四)先要皈依上師。恭敬上師。凡教我一字一行。皆當感恩。因爲我人學佛都要上師指導。(五)依顯教程序。學佛先要知人生痛苦。然後痛苦意義。方能真實明了。(六)說無常之理。學佛人當以了脫生死爲第一要義。至十三日起。行灌頂大法。第一日開示時輪金剛法源流。第二日正式灌頂。第三日授七衆灌頂。並於三日內散給法米吉祥草紅繩藏花紅帶等法物。十七日。修燒護摩法。十八日。恭送壇城。並分給各善信壇城寶石粉。功德至此圓滿。

十八日午。駕臨昭慶寺。爲該寺新建戒壇所供佛像開光。並允各善信之請。於蒞寺開光之便。爲衆傳法。是日所傳者爲觀世音法。繼授六字真言無量光佛心等咒。二十二日離杭赴滬。寓外交大樓。自當道以迄市民。均竭誠招待晉謁。參觀新市

府。又參加市府之園游會。滬市民衆。開盛大之歡迎會。及各團體設宴歡迎。應佛教會之請。公開講經。時青海各王公代表與薩班智達呼圖克圖。自青過平來京。於五月二十九日抵滬。晉謁第九世班禪額爾德尼。代表青海全體王公。端促大師回藏。三十日。第九世班禪額爾德尼返京。繼因首都亢旱。民不聊生。特於七月一日晨十時。分東西南北四組。在陵園雨花臺清涼山雞鳴寺四處。命喇嘛等舉行法事祈雨。並在寓內唸經祈禱。午後二時完圓。午後五時半。乃大雨傾盆。水深盈寸。於時藏政府司倫噶廈及三大寺教首。開聯席會議。一致決定。歡迎第九世班禪額爾德尼回藏。並選推強巴瓊瓦格不西羅桑棍容三人。爲歡迎代表。卽日由拉薩起程入京。七月十四日。第九世班禪額爾德尼蒞平。八月十一日。假道包頭。九月四日離綏。轉赴伊克昭盟之杭錦旗宣化。駐錫阿王府講經。接見各蒙古王公。旋以該盟七旂。紛派代表迎駕。前往講經。九月二十九日。電致北平班禪駐平辦事處。文曰。

駐平辦事處鑒。自抵伊以來。各級僧俗官民。紛紛前來膜拜。數逾萬衆。除隨時

誦經祈福。開示宣慰外。茲復應全盟之請。擇於陰曆九月七日。在阿王府安福寺。唵誦丹貞灌頂大經。爲地方祈福。藉以宣揚中央德意。融洽輿情。而固邊陲。惟此間交通疏阻。消息滯塞。平中新聞。尙希隨時擇要見告。班禪額爾德尼印。十一月五日。赴阿拉善旗。誦經宏法。駕臨塔爾寺。西抵青海宣化。

第五章 安欽呼圖克圖

安欽呼圖克圖。誕生於清光緒十年正月初一日之後藏司喜地方。託生之始。天空現虹。室發異香。少卽薙髮於札什倫布寺。八歲修法。日誦萬言。目覽心傳。終身無忘。年屆二十。開悟佛理。閉觀寺中。四歷寒暑。榮任札什倫布寺紀康部導師。居職三載。復閉觀於捨巴紀康部。爲時三年三月三日。修大威德金剛法。繼任傳承部導師。法號安欽多鏗鏘。華言大咒金剛持也。師自泊登戒法。徧修顯密。名道日新。緇素欽揖。且寡言幽默。通而不耀。第九世班禪額爾德尼深器重之。民國十三年冬。第九世班禪額爾德尼東來內地。師發大宏願。請駕西還。遂於民國十五年七月。假道梵

土。浮海東來。北抵文殊道場。晉謁第九世班禪額爾德尼。懇請回藏。宏法利生。因駐鎮海閉觀焉。二十年秋。南抵首都。與第九世班禪額爾德尼。籌劃返藏之策。因機緣未屆。勿成。回五臺。二十二年春。復蒞舊都。發啟時輪金剛法會於故宮之太和殿。再與第九世班禪額爾德尼。磋商入藏之議。乃於二月二十四日。首途赴京。三月十二日。由京抵滬。十三日午。應中國佛教會宴。下午說法。即晚乘輪。浮海轉印入藏。越亞東江孜。四月三日抵拉薩。晉謁第十三世達賴喇嘛於布達拉宮。恭候起居。奉交第九世班禪額爾德尼手書。并述班佛在華宏法近況。謂昔日兩方情感之齟齬。原於左右互相讒搆。嫌隙日深。致釀事端。第十三世達賴喇嘛聞之。極相嘉納。因思第九世班禪額爾德尼來漢已久。備受勞頓。懇請即行西來。協力治藏。並邀安欽呼圖克圖電達勸駕。速返後藏。主持教政。其時拉薩三大寺執政暨闔藏縉素。均願第九世班禪額爾德尼早日返藏。繼復晉謁布達拉宮。第十三世達賴喇嘛已悟髮白逝世之兆。乃親筆修函第九世班禪額爾德尼。具道誠款。請駕西返。一應各事。當即辦妥。

并面訴安欽呼圖克圖。參觀歷來修建寺宇鑄刻大藏經板等之治藏教績。至十一月。第十三世達賴喇嘛患疾。咳嗽甚劇。奉召晉謁。不能多言。殆後病劇。又來招致。欲再行面囑。然已不及矣。復與三大寺喇嘛協議後事。留藏八月。乃於二十三年一月中旬。偕拉薩三大寺代表西抵後藏。三月三十日。抵噶倫堡。四月十九日。自加里吉。打乘輪返港。第九世班禪額爾德尼與蒙藏委員會聞訊。均派員赴滬迎迓。二十三日抵滬。翌晨蒞京。第九世班禪額爾德尼在行轅設席歡宴。蒙藏委員會於二十五日開歡迎大會。五月三日。接蔣委員長電邀赴贛。七日蒞杭。駐錫中天竺延壽山房。參與時輪金剛法會。六月二日。赴贛謁蔣委員長。致第十三世達賴喇嘛遞蔣氏親筆函。及所贈送之珍貴禮品。并詳述西藏最近情況。與第九世班禪額爾德尼回藏事宜。十一日返京。協助第九世班禪額爾德尼。開設法會。拯救首都亢旱之災。七月十一日蒞平。傳法密藏院等處。時自藏來迎第九世班禪額爾德尼之丁吉呼圖克圖興薩呼圖克圖。亦先後駕臨舊都。九月七日。國民政府命令云。

安欽多鐸鏘。夙紹宗傳。宣揚正旨。近歲馳驅萬里。誠感邊眈。懋德殊勳。深堪嘉尚。着給予普靜法師名號。以示褒獎。此令。

十一日起節。十三日抵首都。晉謁中央各要人。協商第九世班禪額爾德尼入藏之議。二十四日晨十一時。在國府大禮堂。由林主席舉行册封典禮。國府給予普靜法師名號册文。文曰。

闡揚至教。資翊護於一心。宣布德音。懋勳勤於萬里。安欽多鐸鏘。早聞正法。夙抱仁棕。舌燦蓮臺。播宗風於上座。誠開金石。施法雨於西陲。宜頒給普靜法師名號。於戲。導揚麻命。宣正誼而益虔。遠樹風聲。合遐方而贊化。祇承令典。益顯華褒。

十月三日赴滬。上海佛教淨業社等團體。請安欽呼圖克圖講經。並傳授密宗各法。於五日午間開始。其程序五日傳上樂金剛法。六日傳密集金剛法。七日傳空知金剛法。八日傳觀音法。九日乘輪離滬。十一日抵港。換輪赴印。轉入西藏。會晤黃專使。

協商第九世班禪額爾德尼入藏事宜。擬於明春。仍假海道過平。歡迎第九世班禪額爾德尼。同行返藏焉。



220.9

41372

4927

v.1

釋妙舟編纂

蒙藏佛教史

(四) 2.7

5.17

登記號數 41372

類碼 220.9/4927

卷數 v.1

備註

注 意

- 1 借閱圖書以二星期為限
- 2 請勿圈點、評註、污損、折角
- 3 設有缺頁情事時請即通知出納員

臺灣省立臺北圖書館



國立中央圖書館台灣分館



3 1111 001377165